


বন্ধ-সাধন ।



শ্রীকালীনাথ দত্ত প্রণীত ।



মূল্য ৷০ আনা মাত্র ।

উৎসর্গ পত্র ।

পরম ভক্তিভাজন

শ্রীমন্নহর্ষি দেবেন্দ্রনাথ ঠাকুর প্রধান আচার্য্য

মহাশয় শ্রীচরণ-কমলেষু ।

আর্য্য,—

আমার জীবন-বৃক্ষের প্রথম ফল “ব্রহ্ম-সাধন” আমি আপনার চরণে উৎসর্গ করিলাম । আমার ধর্ম-জীবনের বীজ আপনার মুখামৃত হইতে প্রসূত, অঙ্কুরিত ও বর্দ্ধিত হইয়াছে । আপনার সেই অমৃতবর্ষী উপদেশ সকল,—যাহা ব্রাহ্মসমাজের বেদী এবং সিদ্ধুরিয়াপটীর ব্রহ্মবিদ্যালয় রুইতে নিঃস্যান্দিত হইয়া আমার এই মলিন প্রাণে এক অপূর্ব স্রোত খুলিয়া দিয়াছিল— তাহা কস্মিন্ কালেও আমার জীবনে বিস্মৃত হইবার সম্ভাবনা নাই । সেই পরমৌষধি সেবনে আমার যৌবন-সুখভ চাঞ্চল্য প্রশমিত হইয়াছিল, এবং বিগত পঞ্চত্রিংশৎ বৎসরকাল আনাকে সম্পূর্ণরূপে ঈশ্বর বিন্ধিত হইতে দেয় নাই । যদি এই সুযোগ আমার ভাগ্যে না ঘটত, কোন্ বিষয়াবর্ত্তে যে আমি ডুবিয়া মরিতাম, তাহার নিশ্চয়তা কি ? সে সময় আপনার প্রেমোজ্জ্বল মুখশ্রী চক্ষে দর্শন বা চিত্তে স্মরণ করিবা মাত্র, আমার মৃত-প্রাণে জীবন সঞ্চার এবং অন্তরে ঈশ্বর ক্ষুদ্রিত হইত । আমার

জীবনে এমন দিন কাটিয়া গিয়াছে, যখন আমি, যেখানে—যতদূরে থাকি না কেন, আপনার বহির্কীর্তীর দক্ষিণ দিকের দ্বিতল গৃহের মধ্যে আপনার পরম পবিত্র সন্নিধানে নিয়ত কাল বাস করিতাম, এবং সেই মধুর ভাব-যোগে জৈশ্বর সহবাস-সুখ উপলব্ধি করিতাম। দুর্ভাগ্যক্রমে এই অপূর্ণ অবস্থা আমার জীবনে অধিক কাল স্থায়ী হয় নাই। শীঘ্রই প্রতিকূল ঘটনা সকল আসিয়া আমার সেই সৌভাগ্য হরণ করিল। কিন্তু ইহার স্মৃতি আজিও আমাকে গন্তব্য পথে সহায়তা করে। এই জন্য আমার ধর্মতত্ত্বের প্রথম ফলটি আমি আপনার চরণে উপহার না দিয়া থাকিতে পারিলাম না। যাহা আপনার হস্তে রোপিত, অঙ্কুরিত ও পালিত হইয়াছে, তাহা যে আপনারই পিতৃ-চরণে উৎসর্গীকৃত হওয়া স্বভাবের বিধান, তৎপক্ষে সন্দেহ নাই।

আপনি যখন “সমদর্শী”তে “হিন্দু ও গ্রীহদা জাতির বিশেষ ধর্মভাব” প্রস্তাবটি পাঠ করিয়া লেখকের নিকট আপনার সমস্তোষ প্রকাশ করেন, এবং পরে যখন বন্ধুমুখে শ্রবণ করি যে, সেই লেখকের “আত্ম-দর্শন” প্রস্তাবটি “তত্ত্ব-কৌমুদী” পত্রিকায় পাঠ করিয়া সেই প্রবন্ধের চতুঃপার্শ্বে আপনার অল্পকূল মন্তব্য নিজ হস্তে লিপিবদ্ধ করিয়া রাখিয়াছেন, তখন আমি এই উভয় প্রবন্ধের মূলে আপনার পিতৃস্মরণ করিয়া মনে মনে আপনারই চরণে কৃতজ্ঞতা উপহার প্রদান করিয়াছিলাম। এখন এই দুই প্রস্তাব অন্য কয়েকটির সঙ্গে “ব্রহ্ম-সাধনের” অন্তর্ভুক্ত হইল। “এ সমস্তই যে আপনার রোপিত বৃক্ষের ফল”—এ কথা কি আমি ভুলিয়া থাকিতে পারি? সেই ফল আদ্যো-

ପାଞ୍ଚ ପ୍ରତ୍ୟକ୍ଷ କରିয়া আপনার ଅନୁଗ୍ରହের সমস্ত ଶ୍ରୁତି আমার
 ଅନ୍ତରେ ଜାଗରୁକ ହইয়া উঠিল ;—তাই আজ এই অনুপযুক্ত
 উপহারটী লইয়া আপনার চরণ প্রান্তে উপনীত হইলাম । ইহার
 প্রেতি আপনার স্নেহ-দৃষ্টি পতিত হইলে আমি আপনাকে
 কৃতার্থ জ্ঞান করিব ।

কলিকাতা ।	}	প্রাপ্ত,—
১১ই মাঘ, ১৮১৪ শক ।		শ্রীকালীনাথ দত্ত ।

সূচী-পত্র ।

—ঃঃ—

নিগূঢ়-প্রেম	১
চরিত্র-সংগঠন	৯
শাস্ত্র,—পুরাতন ও নূতন	১৮
সাধনের অবস্থাত্রয়	১৪
প্রসঙ্গ	৩১
সদালাপ	৩৫
অচ্যুত-পদ	৩৬
ভাবাঙ্গগঠন	৪৩
প্রকৃত আত্ম-দর্শন	৫৪
আদর্শ ব্রাহ্মসমাজ	৭০
ভয়, জ্ঞান ও ভক্তি	৭৬
হিন্দু ও খ্রীষ্টা জাতির বিশেষ ধর্মভাব	৮৯


—

শুদ্ধিপত্র ।

—••—

পৃষ্ঠা	পংক্তি	অশুদ্ধ	শুদ্ধ ।
৭১	১২	প্রকৃত	প্রাকৃত
৮০	৮	জ্ঞান-মিশ্র	জ্ঞান-মিশ্রা
"	২১	উজ্জ্বাসিত	উজ্জ্বসিত
"	২৪	থাকে	থাকে ।
৮১	১	সুবিমল	সমল
"	১২	জ্ঞামূলক	জ্ঞান-মূলক
৮৬	৭	অদৃষ্টের	অদৃশ্যের
"	৮	অদৃশ্যের	অদৃশ্যে
৮৭	১৪	অপরিশোধনীয়	অপরিশোধনীয়
"	১৯	নিরুত্তি	নিবৃত্তি
৮৮	২	বাহার	বাহার
৮৯	১৬	"আশা"তে	"আশা"তে
৯০	৭	কোন শ্রেষ্ঠ	কোন কোন শ্রেষ্ঠ
৯২	৪	পরিব্যাপ্তি	পরিব্যাপ্ত
৯৪	১৩	অমলক	আমলক
৯৬	৫	দেখে না	দেখেন না

—



প্রথম পরিচ্ছেদ ।

নিগূঢ় প্রেম । *

উপাস্ত্র দেবতার প্রতি নিগূঢ় প্রেম অন্তরে উদয় হইলে, উপাসকের হৃদয় একটা নূতন অবস্থা প্রাপ্ত হয় । প্রেমের বে সমস্ত লক্ষণ সচরাচর উল্লেখিত হইয়া থাকে, সে অবস্থা তাহার অতীত । সে অবস্থা এই যে, সাধক তাঁহার অন্তরস্থিত প্রেমকে গোপন করিতে অত্যন্ত স্পৃহান্বিত হন । তিনি তাঁহার প্রাণের প্রিয়তম দেবতাকে অন্তরের অন্তরতম প্রদেশে অতি সন্তুর্পণে রক্ষা করিয়া সেই অতীন্দ্রিয় দেশে তাঁহার সঙ্গে গোপনে মিলিত হইতে চান । তিনি লোকের চক্ষুকে ভয় করেন, সুতরাং সে চক্ষুর অন্তরালে গিয়া তাঁহার সত্য শিব মন্দের মূর্ত্তি সন্দর্শন করিয়া প্রিয়-জন-সমাগম-সুখ অনুভব করেন । তিনি সে ভাব কেন সযত্নে গোপন করিতে ভাল বাসেন, কেন লোকের চক্ষুকে ভয় করেন ? এ প্রশ্নের গূঢ় কারণ আছে । তিনি এ জ্ঞাত ভয় করেন না যে, লোকে তাঁহাকে উৎপীড়িত করিবে । নির্ঘাতন-ভয়

প্রকৃত সাধকের অন্তরে প্রবেশ করিতে পারে না। তিনি
 এজন্ম তাঁহার অন্তরের ভাব গোপন করেন না যে, লোকে
 সে ভাবের আভাস না পাইয়া তাহার সুখান্বাদন হইতে বঞ্চিত
 থাকে। এরূপ সঙ্কীর্ণতা প্রেমিক হৃদয়ে কখনও স্থান পায় না।
 তাঁহার ভয়ের ও হৃদয় ভাব গোপনের কারণ সম্পূর্ণ স্বতন্ত্র।
 তাহা এই জন্ম, পাছে অপ্রেমিক নিষ্ঠুর সংসার তাঁহার সেই
 নিগূঢ় ভাবের জন্ম তাঁহার প্রাণের প্রিয়তম পদার্থকে উপহাস
 ও বিক্রপের বিষয় করিয়া ফেলে। তিনি লোকের সহস্র
 অপমান ও নির্যাতন অনায়াসে অক্ষুৰ্ণ হৃদয়ে সহ করিতে পারেন,
 কিন্তু তাঁহার প্রাণের প্রিয়তমের প্রতি লোকে যে একটি উপহাস
 বাক্য প্রয়োগ করিবে, তাঁহার অন্তর প্রদেশে প্রতি নিয়ত যে
 প্রেমের তরঙ্গ উঠিতেছে লোকে তাহাকে যে বিক্রপের বিষয়
 করিয়া তুলিবে, তাহা তিনি কখনই সহ করিতে সক্ষম নহেন।
 তিনি বিক্রপ ও উপহাসপরায়ণ সংসারের সম্মুখে তাঁহার প্রিয়
 স্নহদের প্রিয়তম নামটীও প্রকাশ করিতে ভীত ও সঙ্কুচিত হন।
 তিনি হয়ত এক সময়ে নির্ভীকচিত্তে তাঁহার উপাস্ত দেবতার
 মহান্ নাম বজ্রধ্বনিতে প্রচার করিয়া হরন্ত সংসারকে পরাস্ত
 করিয়াছেন ; কিন্তু যখন তাঁহার হৃদয়-ভাবের সেই উদ্ভাল তরঙ্গ
 প্রশমিত ও ঘনীভূত হইয়া নিগূঢ় প্রেমের আকার ধারণ করিল,
 তখনই তাঁহার অন্তরাকাশে বজ্জা, ভয়, গোপনেচ্ছা প্রভৃতি
 আবির্ভূত হইয়া সেখানে যুগান্তর উপস্থিত করিল। তাঁহার
 মুখে আর কথাটীও নাই। সংসার যতদূর পর্য্যন্ত সহ করিতে
 শিখিয়াছে, তিনি ততদূর পর্য্যন্ত আত্ম প্রকাশ করিতে কখনই
 সঙ্কুচিত হন না ; কিন্তু তাঁহার ভিতরের কথা তাঁহার সম-হৃদয়

নিগূঢ় প্রেম ।

দুই একটা বন্ধু বান্ধব ভিন্ন আর কেহ শুনিতে পান না । বাহিরের লোকে মনে করিতে পারে যে, তাঁহার ভাবের স্রোত বন্ধ হইয়াছে ; কেননা, তাহারা তাঁহার নিকট যে সকল উপদেশ বাক্য শ্রবণ করে, তাহা তাদৃশ সতেজ ও জীবন্ত নহে । তিনি যখন ইহাদের সঙ্গে ধর্ম্মালাপ করেন, তখন সেই অগাধ প্রেমের সমুদ্রের যে গভীর স্থানে তিনি নিমগ্ন হইয়া বাস করিতেছেন, সেখানে থাকিয়া তিনি ইহাদের সঙ্গে আলাপ করিতে অসমর্থ ; সুতরাং তাঁহাকে অনেক দূর উপরে ভাসিয়া উঠিয়া ইহাদের সঙ্গে আলাপ করিতে হয়, স্বস্থান ভ্রষ্ট না হইয়া তিনি বাহিরের সঙ্গে মিলিত হইতে পারেন না । কিন্তু সেখানে তাঁহার অন্তরের ভাব স্পষ্টরূপে প্রকাশ করিতে পারেন না । লোকে কেন না মনে করিবে, তাঁহার ভাবের স্রোত বন্ধ হইয়াছে ? লোকে বাহির হইতে যেরূপ দৃষ্টিগোচর করে, তদনুসারেই বিচার করিয়া থাকে । নিগূঢ় প্রেমিকের প্রচার-ক্ষেত্র সুতরাং তাদৃশ বিস্তৃত হইতে পারে না । তিনি যতই প্রেমের অগাধ সাগরে প্রবিষ্ট হন, ততই তাঁহার প্রচার-ক্ষেত্র সঙ্কীর্ণ হইতে সঙ্কীর্ণতর হইয়া যায় । তিনি মনের কথা ব্যক্ত করিবার জন্য দুই একটা লোক অন্বেষণ করেন এবং সৌভাগ্য ক্রমে যদি কখন প্রাপ্ত হন, তবে প্রাণের দ্বার খুলিয়া আপনিও কৃতার্থ হন, অন্তকেও কৃতার্থ করেন । এরূপ সঙ্গী যদি না মিলিল, তবে তাঁহার মৌনব্রত কে ভঙ্গ করে ? সে অবস্থায় তাঁহার হৃদয়ের ভাব তিনি যে প্রকাশ করিতে অসমর্থ, তাহা নহে ; উপযুক্ত লোক মিলিলে তাহা তখনই সহজে প্রকাশ হইয়া পড়িল । না মিলিলে সে ভাব অন্তর্নুখে আরও গভীর প্রদেশ ভেদ করিয়া ক্রমশই

নিমগ্ন হইতে লাগিল, হৃগ্নম প্রদেশের অলৌকিক শোভা দেখিতে দেখিতে চলিল ।

প্রেমের শাস্ত্রে সাধনের গুহ্য কথা প্রকাশ করিতে নিবেদ আছে । যিনি তাহা যেখানে সেখানে প্রকাশ করেন, তিনি কখনই প্রেমিক নহেন । যিনি সাধনের নিগূঢ় ব্যাপারকে লোকের উপহাস ও বিদ্রূপের লক্ষ্য হুলে আনিয়া নিক্ষেপ করিতে পারেন, তিনি প্রকৃত সাধক নহেন । তিনি প্রেম-শাস্ত্রের মৰ্ম্মানভিজ্ঞ নিষ্ঠুর বণিক মাত্র । তিনি তদ্বারা সংসারের পণ্য দ্রব্য বিনিময় করিতে চান,—সংসারের মান সঙ্কম জয় করিতে চান । এরূপ নীচ লক্ষ্য সিদ্ধি করিবার জন্ত ভিতরের গুহ্য কথা প্রকাশ করিলে, তাঁহাকে প্রেম-রাজ্যের অধিকার হইতে বঞ্চিত হইয়া প্রকৃত সাধক-সংসারের কুপার পাত্র হইয়া থাকিতে হয় । তিনি আপনিও উপহাসাম্পদ হন, এবং প্রেম ও ধর্ম্মের উপরে সংসারের উপহাস ও বিদ্রূপ আনয়ন করেন । তিনি আপনিত নষ্ট হইলেন, কিন্তু বাঁহার নাম এতদিন প্রচার করিলেন,—বাঁহার নাম এতদিন সাধন করিলেন, তাঁহার নামেও লোকের অবিশ্বাস বর্দ্ধিত ও কলঙ্ক সঞ্চিত করিয়া গেলেন । হে সাধক ! তুমি কোন্ প্রাণে এরূপ নিষ্ঠুর ও কঠোর হইবে,—তুমি কোন্ প্রাণে তোমার উপাস্ত্রের নামে কলঙ্ক আনিবে, এবং তাঁহাকে লোকের উপহাস ও বিদ্রূপের সামগ্রী করিবে ? তোমার কেমন প্রেম, জানি না ; এই নিদারুণ কার্য্য করিতে তোমার মনে ব্যথা লাগিবে না ? স্বার্থ-সাধনের জন্ত তুমি অনায়াসে তোমার এতদিনের ইষ্ট দেবতাকে হৃগ্নমগ্রস্ত করিয়া যাইবে ! হে প্রেমিক, দ্বন্দ্ব হও ; তোমার

আপনার মস্তকে তোমার সমস্ত দোষভার গ্রহণ কর এবং প্রেমের অনুরোধে তাঁহার পবিত্র মহৎ বশকে অক্ষুণ্ণ রাখিতে চেষ্টা কর ; নচেৎ তোমার রক্ষা নাই ।

নিগূঢ় প্রেম আপনাকে আপনি জানে না । প্রকৃত প্রেমিক আপনার প্রেমের বিষয় আপনি অবগত নহেন । তিনি যে তাঁহার প্রেমাস্পদকে সর্বাস্তঃকরণের সহিত ভাল বাসেন, তাহা তিনি নিজের অনুভব করিতে সমর্থ নহেন । নিগূঢ় প্রেম আপনাকে দেখিবার সময় অন্ধ হয় । নিগূঢ় প্রেম শ্রোতোগামী, স্মৃতরাং উন্নতি দেখিতে পায় না ।

নিগূঢ় প্রেমিক প্রেমের অনুরোধে যে সকল কার্য্য অনুষ্ঠান করেন, তাহা অতি মহৎ ও অসাধারণ হইলেও তাঁহার প্রেমের চক্ষে অতি অকিঞ্চিৎকর ও যৎসামান্ত বলিয়া প্রত্যয়মান হয় । তিনি প্রেমের অনুরোধে গুরুতর ত্যাগ স্বীকার করেন, কঠোর ব্রত ও তপস্বী পরিগ্রহ করেন, প্রাণান্ত পরিশ্রম স্বীকার করেন, এবং প্রচুর দুঃখ কষ্ট বহন করেন ; কিন্তু তৎ সমস্তই তাঁহার প্রেমের চক্ষে অতি 'ক্ষুদ্র, অতি তুচ্ছ, অতি লঘু ও অতি স্বল্প-
বুল্য । নিগূঢ় প্রেমিক আপনার কার্য্য কলাপ দেখিবার সময়ও অন্ধ হন ।

নিগূঢ় প্রেমিকের মুখে তাঁহার প্রেমের বাখ্যান কখন শুনিতে পাইবে না । তাঁহার রসনা আপনার কার্য্য কলাপের বর্ণনায় কখনই প্রবৃত্ত হয় না । প্রসঙ্গ উপস্থিত হইলে, তাঁহার মুখে কেবল তাঁহার প্রেমাস্পদের গুণ বর্ণনাই শুনিতে পাইবে, আর কখন কখনও তাঁহার নিজ কার্য্য কলাপের নানাবিধ ক্রটির কথাও শুনিতে পাইবে ।

নিগূঢ় প্রেম আপনার ক্রটি ও দোষ দেখিবার সময় হৃদয় প্রথর ও স্তব্ধ-চক্ষু । অত্বের চক্ষে যাহা একটা সামান্য ক্রটি, নিগূঢ় প্রেমিকের চক্ষে তাহা একটা গুরুতর অপরাধ; তাঁহার চক্ষু তখন একটা অণুবীক্ষণ যন্ত্র । তিনি যখন আত্মানুসন্ধান করেন, তখন তিনি আপনার গুণানুসন্ধানে কখনই প্রবৃত্ত হইতে চান না; কিন্তু দোষ ও ক্রটির অনুসন্ধানে প্রবৃত্ত হন । আপনার দোষ ও ক্রটি দর্শনই তাঁহার আত্মানুসন্ধান, সেই জ্ঞানই তাঁহার আত্ম-জ্ঞান । তিনি কি সাধে তাঁহার গুণানুসন্ধানে বিরত থাকেন? তাঁহার যে চক্ষু দোষ দর্শন কালে স্বভাবতই বিস্ফারিত হইয়া উঠে, গুণের দিকে তাকাইলে তাহা আপনা হইতে সঙ্কুচিত ও নিম্নীলিত হইয়া যায় । সে দিক তাঁহার নিকট নিবিড় অন্ধকার । নিগূঢ় প্রেম অত্বের দোষ ও ক্রটি দেখিবার সময় সঙ্কুচিত হইয়া যায়,—তখন তাহার সে কঠোরতা নাই । নিগূঢ় প্রেমিক সর্বদা ক্ষমাশীল, কিন্তু শাসনে পরাজুখ নহেন ।

নিগূঢ় প্রেমিক কি সুখী?—তিনি সুখী বটে, কিন্তু আত্ম-সুখে সুখী নন । তাঁহার সুখ, তাঁহার প্রেমাস্পদের সুখ দর্শন করিয়া । তাঁহার সুখ, তাঁহার ইষ্ট দেবতার সেবা করিয়া । যে কোন সুখ, আনন্দ তাঁহার সম্মুখে উপস্থিত হয়, তাহা তিনি নিজে ভোগ করিতে পারিলেই সুখী হন না, তাহা তাঁহার প্রেমাস্পদের চরণে উপহার দিতে পারিলেই—নিবেদন করিতে পারিলেই সুখী হন । তিনি পূজা করেন, কিন্তু সুখ চান না; তিনি সেবা করেন, কিন্তু আনন্দ চান না । আনন্দ উপস্থিত হইলে আনন্দময়ের চরণে উপহার দিয়া, তাহা বাহার সম্পত্তি—বাহার প্রাপ্য, তাঁহাকে দিয়া কৃতার্থ হন ।

নিগূঢ় প্রেমিকের হৃৎকি কি?—তঁাহার বিস্তার হৃৎকি। তঁাহার হৃৎকি,—তঁাহার নিজের ও অপরের জীবনে তঁাহার প্রেমাস্পদের মুখচ্ছবি অক্ষুট দেখিয়া। তিনি সর্বত্রই তঁাহার প্রেমাস্পদের মুখচ্ছবি উজ্জ্বল, নির্মল ও প্রফুল্ল দেখিতে চান; না পাইলে তঁাহার হৃৎকের অবধি থাকে না। ব্রহ্মহীন নর নারী তঁাহার হৃৎকের কারণ, ব্রহ্মহীন সংসার তঁাহার হৃৎকের কারণ। কেন না, সেখানে তঁাহার প্রেমাস্পদের মুখচ্ছবি অক্ষুট বা বিকৃত দেখিতে পান। তঁাহার হৃৎকি, তঁাহার নিজের অপরাধ দেখিয়া;—তঁাহার হৃৎকি, অশ্রুর হৃৎকি, কষ্ট, অজ্ঞান ও মালিন্য দেখিয়া;—তঁাহার হৃৎকি, চতুর্দিকের অনাথতা দেখিয়া এবং আপনার পাপ, আনন্দ ও ক্রটি দেখিয়া। তঁাহার চক্ষুর শোকাশ্রু সেই জন্ত বক্ষস্থল বহিয়া পতিত হয়।

নিগূঢ় প্রেমিক অশ্রুর স্বক্কে অপরাধ ভার নিক্ষেপ করেন না, কিন্তু সমস্ত বিষয়ে কেবল নিজের উপরে সকল দোষ ও ক্রটি আরোপ করেন। জগতে পাপ ও কষ্ট দেখিয়া তিনি মনে মনে আপনাকে দিক্কার দেন এবং গোপনে অশ্রুপাত করেন।

নিগূঢ় প্রেমিকের চিন্তা কি,—কার্য্য কি? কিসে আপনার ও অশ্রুর আত্মাতে তঁাহার প্রেমাস্পদের ক্ষুধা হয়, কিসে সেই ক্ষুধার অন্তরায় সকল নিকাসিত হয়, এই চিন্তা। তঁাহার কার্য্য, সেই অন্তরায় সকল নিকাসিত করা এবং সেই ক্ষুধা সাধন করা। নিগূঢ় প্রেমিক সে জন্ত কোন ক্রেশকে ক্রেশ বোধ করেন না, পরন্তু তাহাতে সুখানুভব করেন। নিগূঢ় প্রেমিক সেজন্ত কোন কার্য্যকে সামান্য বা হেয় জ্ঞান করেন না, কিন্তু অতি তুচ্ছ কার্য্যকেও মহৎ কার্য্য জ্ঞান করিয়া তাহার অহুষ্ঠানে

প্রবৃত্ত হন। যে প্রেম কার্য্যকে হেঁচ জ্ঞান করিয়া পরিত্যাগ করে, তাহা নিগূঢ় প্রেম নহে।

নিগূঢ় প্রেমিক মহৎ হইলেও আপনার মহত্ব দেখিতে পান না, তিনি বৃহৎ বৃহৎ কার্য্যের অনুষ্ঠান করিয়াও কখন আপনাকে মহৎ বলিয়া জ্ঞান করেন না। আপনাকে দীন ও সামান্ত বলিয়া তাঁহার দৃঢ় বিশ্বাস। সে বিশ্বাস কিছুতেই অপনীত হইবার নহে। লোকের প্রশংসাম্বনিত গুনিয়া, দেশে বিদেশে তাঁহার গুণকীর্ত্তন দেখিয়া তিনি অত্যন্ত লজ্জিত ও বিস্মিত হন; এবং মনে মনে বিশ্বাস করেন এবং মুখেও ব্যক্ত করেন যে, সে প্রশংসা অপাত্রে পতিত হইতেছে; তিনি তাহার সম্পূর্ণ অল্পপযুক্ত। নিগূঢ় প্রেমিক কখনও কাহারও প্রাপ্য সুখ্যাতি অপহরণ করেন না, বরং যাহারা তাঁহার কার্য্যে সহায়তা করিয়া থাকেন, তাঁহাদিগকে সমস্ত সুখ্যাতির অধিকারী বলিয়া সৰ্ব্বক্ষণ বিশ্বাস ও ব্যক্ত করেন। নিগূঢ় প্রেমিক নিন্দাতে ছুঃখিত হন না, বরং আপনাকে তাহার সম্পূর্ণ উপগুক্ত বলিয়া বিশ্বাস ও ব্যক্ত করেন। তাঁহার সুখ হুঃখের সঙ্গে নিন্দা প্রশংসার কোনও সম্পর্ক নাই।

নিগূঢ় প্রেমের বিশ্রাম আছে। যিনি কার্য্য করেন, তাঁহার বিশ্রাম আবশ্যক। তাঁহার বিশ্রাম সেই অনন্ত শয্যা। সেখানেই তাঁহার শান্তির শান্তি হয়।



দ্বিতীয় পরিচ্ছেদ ।

চরিত্র সংগঠন ।*

মানুষের আত্মবিকাশ কোন সীমা বা গভীর মধ্যগত হইয়া চিরদিন থাকিতে পারে না। “এই পর্য্যন্ত”,—মানবাত্মা এই ক্ষুদ্র মস্ত্রে দীক্ষিত হইয়া জন্ম পরিগ্রহ করে নাই। যে কোন সীমা ও গভীর উপরে দণ্ডায়মান হইয়া তাহাকে আহ্বান কর না কেন, তাহা স্বদূরব্যাপী হইলেও এক দিন না একদিন সে সেই সীমাকে অতিক্রম করিয়া দূর হইতে তাহাকে উপহাস করিতে থাকিবে। “আমিই গম্য পস্থা”,—এই গুরুবাক্য মানুষের সাময়িক সহায় হইতে পারে, কিন্তু চির দিনের সহায় হইতে পারে না। আজ যে আদর্শকে মস্তকোপরি রাখিয়া তুমি আপনাকে কৃতার্থ-মগ্ন বোধ করিতেছ, কাল তাহা তোমার পদতলে পড়িয়া অবলুপ্ত হইবে।

মানবের আত্মা যখন অনন্ত বিকাশ-প্রবণ, তখন তাহার সংগঠন কিরূপে সম্ভব হইতে পারে? অনন্ত ভবিষ্যৎ যাহাকে সংগঠন করিতে থাকিবে, সে কিরূপে এখানে এই অনন্ত মঞ্চের প্রথম সোপানে আপনাকে সংগঠন করিয়া তুলিবে? এই প্রশ্নের মীমাংসা তাদৃশ কঠিন নহে। মানবাত্মার অভ্যন্তরে যে সমস্ত অনন্তবিকাশোন্মুখ দিব্যাক্রম অব্যাক্ত অবস্থায় নিহিত আছে, সেই সমস্ত যখন সুব্যক্ত হইয়া একটি সম্পূর্ণ আকারে পরিণত হয়,

তখনই মানবের চরিত্র সংগঠন হইল, বলা যাইতে পারে । যতদিন সেই দিব্যাকৃতিটা সমস্ত অঙ্গ প্রত্যঙ্গের সহিত তাহার অন্তর্নিহিত গর্ত্বকোষ হইতে বহির্গত না হয়, ততদিন কোন চরিত্র সংগঠিত হইয়াছে, ইহা বলা যাইতে পারে না । মানবের চরিত্র আর কিছুই নহে, তাহার আভ্যন্তরিক উচ্চ প্রকৃতির আকার বা যথাস্থান-সমাবিষ্ট অঙ্গ প্রত্যঙ্গ গুলির সমষ্টি মাত্র । সেই আকার বা অঙ্গ প্রত্যঙ্গ গুলি যখন তদীয় বীজকোষ মধ্যে অপ্রকাশিত,—সুতরাং কার্য্যসাধনের অনুপযোগী থাকে, তখনই চরিত্র অসংগঠিত অবস্থায় রহিয়াছে, বলা যায় । যখন সেই আভ্যন্তরিক দিব্য প্রকৃতির অঙ্গ প্রত্যঙ্গগুলি কার্য্যোপযোগী হইয়া যথোচিত অনুষ্ঠান বা আচরণে সমর্থ হইল, তখনই চরিত্রটা সংগঠিত হইল বলিতে হইবে । সেই অঙ্গ প্রত্যঙ্গগুলি ক্রমে দ্রুতিষ্ঠ হইবে, ক্রমে বলিষ্ঠ হইবে, ক্রমে অনন্তের অভিমুখে বিকশিত হইবে; কিন্তু চরিত্রের গঠনটি নিয়তকাল সকল পরিবর্তনের মধ্যে একপ্রকার অপরিবর্তিত থাকিয়া যাইবে ।

সকল মানুষের চরিত্র একরূপ উপাদানে নির্ম্মিত হইলেও,—একরূপ অঙ্গ প্রত্যঙ্গ বিশিষ্ট হইলেও তাহার গঠন কোন দুই মানুষে একরূপ নহে । যেরূপ মানুষের দেহাকার ভিন্ন ভিন্ন, সেইরূপ মানুষের চরিত্রের গঠনও ভিন্ন ভিন্ন ।

সকল মানুষই উচ্চ প্রকৃতির বীজ লইয়া জন্মগ্রহণ করে । সেই উচ্চ প্রকৃতি পিতা মাতার মানসিক প্রকৃতির একটা আচ্ছাদন লইয়া ভূমিষ্ঠ হয় । সেই আচ্ছাদনটা সকল সময়ে পিতা মাতার বিভিন্ন বা সম্মিলিত মানসিক প্রকৃতির সম্পূর্ণ অনুরূপ নহে ; সেই মানসিক প্রকৃতি জনন কালে যে অবস্থায় অধীন

থাকে, সেই আচ্ছাদনটী সেই অবস্থা দ্বারা রূপান্তরিত হয়; তৎপরে সুদীর্ঘ কাল মাতৃগর্ভে বাস করিবার সময় মাতার বিবিধ মানসিক অবস্থা ও উত্তেজনা দ্বারাও রূপান্তরিত হয়। বিবিধরূপে রূপান্তরিত এই মানসিক আচ্ছাদনটী তাদৃশ নির্মল না হইলে মানুষের চরিত্র গঠনের বিশেষ অন্তরায় হইয়া দাঁড়ায়। তার পর, শৈশবকালে, পিতা মাতা, অগ্র্য্য পরিবার ও প্রতিবাসী বর্গের দৃষ্টান্তাদি দ্বারা, মানুষের সেই উচ্চ প্রকৃতি আর একটি আচ্ছাদন লাভ করে। সেই আচ্ছাদনটী তাদৃশ নির্মল না হইলে, তাহাও তাহার চরিত্র বিকাশের আর একটি অতিরিক্ত অন্তরায় হইয়া উঠে। তার পর, শিক্ষাকালে দেশের প্রচলিত সংস্কার, দেশাচার, নীতি ও ব্যবস্থা সমূহ হইতে আর একটি আচ্ছাদন লাভ করে। তাহাও তাদৃশ নির্মল না হইলে, তাহার চরিত্র সংগঠনের তৃতীয় অন্তরায় হইয়া দাঁড়ায়। এই ত্রিবিধ আচ্ছাদনের মধ্যে আমাদের উচ্চ প্রকৃতি নিপতিত। এই ত্রিবিধ আচ্ছাদন ভেদ করিয়া সেই প্রকৃতিকে আত্মবিকাশ লাভ করিতে হইবে।

মানুষের চরিত্র নির্মাণের ভার কেবল তাহার নিজ হস্তে নহে। যদিও পরিণামে এ ভার তাহার নিজের উপরে পতিত হয়, কিন্তু চরিত্রের প্রথম পত্তনে নানাবিধ অবস্থা আসিয়া তাহার বিকৃতির কারণ পূর্বেই সংঘটন করিয়া রাখে। জন্মদান কালে যদি পিতা মাতা নিজ নিজ দায়িত্বের অনুরূপ সতর্কতা অবলম্বন করেন, গর্ভভার বহনকালে মাতা যদি ভাবী সন্তানের যত্নলাকাজুকী হইয়া আপনার চিত্ত-বৃত্তিকে যত্ন পূর্বক যথাপথে নিয়োজিত রাখেন, শৈশবকালে পিতা মাতা ও পরিজনবর্গ শিশু সন্তানের অন্তর্দীক্ষণের অনুরূপ অবস্থার মধ্যে তাহাকে

যদি যত্নপূর্ব্বক রক্ষা করিতে আয়াস স্বীকার করেন, এবং অধ্যয়ন কালে যদি শিক্ষকেরা অহুরূপ সতর্কতা অবলম্বন পূর্ব্বক দেশের প্রচলিত কুসংস্কার, অনিষ্টকর দেশাচার, হীনীতি ও দুর্ব্ব্যবহার প্রভাব হইতে শিষ্যের মনোবৃত্তিগণকে রক্ষা করিয়া, তাহাকে আত্মবিকাশের অহুকূল সুশিক্ষা প্রদান করেন ; তাহা হইলে, মনুষ্য অতি সহজে আপনার উচ্চ প্রকৃতিকে বিকাশিত করিয়া চরিত্রকে সংগঠিত করিতে পারে। নচেৎ এই চরিত্র সংগঠনে বিবিধ প্রতিকূলতা নিবারণার্থ অনেক আয়াস ও যত্ন স্বীকার করিতে হয় এবং তাহা সকলের সাধ্যায়ত্ত নহে। নানা প্রতিকূল অবস্থার প্রভাব বশতঃ মনের গতি যদি ছরস্ত ও দুর্ব্বিনীত হয়, তাহা হইলে আত্মার উচ্চ প্রকৃতির বিকাশ সাধন যে কতদূর কঠিন কার্য্য, তাহা যাহারা দুর্ভাগ্যবশতঃ সেইরূপ ছরবস্থার স্রোতে পড়িয়াছেন, তাঁহারাই জানেন। সাধুসঙ্গ, সংগ্রহ পাঠ, সং প্রসঙ্গ, জৈশ্বর-নির্ভর প্রভৃতি আত্মবিকাশের যে সকল উপায় সচরাচর অবলম্বিত হয়, তাহাতে তাঁহাদের চিত্ত কিছুতেই আকৃষ্ট হইতে চায় না, এবং দৈবগতিকে এই সকল উপায়ের মধ্যে নিপতিত হইলে, তখন কেবল বিসদৃশ ও বিসংবাদী ভাব চতুর্দিকে দৃষ্টিগোচর করিয়া প্রাণ ব্যাকুলিত হয় এবং তাহা হইতে দূরে থাকিবার জন্ত স্বতঃই সচেষ্ট হয়। এ অবস্থায় দেব-কৃপা ভিন্ন আত্মবিকাশের আর অন্য উপায় নাই। এরূপ ছরবস্থাপন্ন আত্মাদিগের জন্তই বিজহ্ন লাভের প্রয়োজন এবং দেব-কৃপাই তন্নাভের এক মাত্র উপায়। যাহারা সুজাত, সুপালিত ও সুশিক্ষিত, তাঁহাদের এরূপ বিজাত হইবার তাদৃশ প্রয়োজন নাও থাকিতে পারে; কিন্তু যাহারা দুর্ভাগ্যবশতঃ কুজাত, কুপালিত ও কুশিক্ষিত,

দৈবকৃপালকৃ দ্বিজন্মলাভ ভিন্ন তাঁহাদের চরিত্র উদ্ধারের আর উপায়ান্তর নাই । এই দ্বিজত্ব লাভের পর, তাহাদের মনের দুর্বিনীত ও দুঃস্থ গতি অল্পে অল্পে ফিরিতে থাকে, তাহাদের ইচ্ছা পুরাতন পন্থা, পুরাতন সঙ্গ ও পুরাতন অভ্যাসের প্রতি বীতরাগ হইয়া নূতন পন্থা ও গতি অন্বেষণ করে, তাঁহাদের কর্তৃত্বশক্তি ও বিবেক ক্রমে ক্ষুণ্ণি প্রাপ্ত হইয়া স্ব স্ব কার্য্যে প্রবৃত্ত হয় এবং চরিত্র সংগঠনের সহায়তা করিতে থাকে ।

সুজাত, সুপালিত ও সুশিক্ষিতের পক্ষে চরিত্র-সংগঠনার্থ একরূপ দ্বিজত্ব প্রাপ্তির তাদৃশ প্রয়োজন নাই । ঈদৃশ দ্বিজাত অপেক্ষা ঈদৃশ সুজাত শ্রেষ্ঠ । সুজাত আত্মা ঈশ্বরের স্বাভাবিক নিয়মে ক্ষুণ্ণি ও পরিপুষ্টি লাভ করিতে থাকে । ঈশ্বরের কৃপা তাহার সহায়তার জন্ত সর্বদাই তাহার চক্ষের সমক্ষেই রহিয়াছে । যখন প্রয়োজন হইল, অমনি সতৃষ্ণ নয়নে চাহিবা মাত্র কৃপার স্রোত আসিয়া তাহার অভাবরাশি কোথায় ভাসাইয়া লইয়া গেল !

মানুষের চরিত্র, যাহা এই দ্বিবিধ উপায়ের অন্তরতর অবলম্বন করিয়া সংগঠিত হইল, তাহা তাহাকে নিজ হস্তে পোষণ করিতে হয় । এ বিষয়ে তাহার স্বাধীন ইচ্ছাই তাহার সহায় । অপর দিক হইতেও সাহায্য আইসে, কিন্তু নিজে অনিচ্ছু ও অনুরাগ-বিহীন হইলে শুদ্ধ বাহিরের সাহায্যে তাহার আর কি করিবে ?

সংগঠিত চরিত্রে বিবেকই রাজপদে প্রতিষ্ঠিত, স্বাধীন ইচ্ছা সেই রাজ আজ্ঞার বশীভূত । মনোরাজ্যে প্রবল ও পদস্থ বিবেকই অত্রাত্ত প্রবৃত্তিপুঞ্জের মধ্যে শক্তি-সাম্য রক্ষা করে । কাহাকেও কখন বঞ্চিত করে না, কাহাকেও কখন অন্তর

সমাদর করে না, কখন কাহারও প্রীতিপাভী নহে, কখনও কাহারো বিপক্ষ নহে।

এই মনোরাজ্যে বৃত্তি সমূহের মধ্যে দুইটি সম্প্রদায় দৃষ্ট হয়। একটি সম্প্রদায় স্বার্থপ্রমুখ, অপর সম্প্রদায়টি পরার্থপ্রমুখ। প্রথম দলটি পূর্বাঙ্কে বিকশিত হয় বলিয়া সচরাচর বলবান ও প্রভাবশালী; অতরাং প্রতিনিয়ত দ্বিতীয় দলের উপর তাড়না ও উৎপীড়ন করে। বিবেক, যখন স্বহস্তে রাজদণ্ড প্রাপ্ত হয়েন, তখন প্রকৃত ধর্ম্মানুসারে দুর্বৃত্ত দলকে দমনে রাখিয়া সাধুবৃত্তি দিগকে পালন করিয়া থাকেন। তুরধর্ম্মী দস্যুরা কখনই রাজার বন্ধু নহে, এই জ্ঞান চিরকালই রাজক্ষমতাকে পর্য্যুদন্ত করিবার চেষ্টা করে। যখন বিবেকের প্রাধাত্য অপ্রতিবাদে সংস্থাপিত হইল, মানুষের উচ্চ বৃত্তি সকল যথাযোগ্য স্থানে আসিয়া কার্য্য করিতে লাগিল, তখনই চরিত্রের সংগঠন হইয়াছে বলিতে হইবে। সংগঠিত চরিত্রে বিবেকই প্রধান হইয়া মানুষের উচ্চ প্রবৃত্তি সকলকে যথাযোগ্য, অসন প্রদান করেন, কিন্তু নিকৃষ্ট বৃত্তি সকলকে বঞ্চিত করেন না। এ অবস্থায় চিত্ত প্রকৃতিস্থ থাকিয়া স্বার্থ স্বাস্থ্য সম্ভোগ করে।

কিন্তু দ্বিজাত্য লাভহেতু মনোরাজ্যে যে সময়ে শুভ পরিবর্তনের সূচনা হয়, সে সময়ে অত্যন্ত সাবধান হইবার প্রয়োজন। জীবনের সে প্রতিক্রিয়ার প্রারম্ভে, তাহাকে কোন বাধা প্রদান করা বিধেয় নহে। সে সময়ে বাধা পাইলে, হয়ত প্রতিক্রিয়া অসম্পূর্ণ থাকিয়া যায়। প্রতিক্রিয়ার অবস্থার সম্পূর্ণ দূর্তি লাভ না হইলে, চরিত্রের গঠন অসম্পূর্ণ থাকিয়া যাইবে। প্রতি-
ষাভের প্রথম অবস্থা যদি অত্যন্ত বলবতী হয়, তাহা হইলে

তাহাকে অল্পে অল্পে সাম্যাবস্থার আনিবার চেষ্টা করিতে হইবে ; যদি সেই অবস্থা অত্যন্ত মন্দগতি হয়, তাহা হইলে সম্পূর্ণ প্রতিঘাত আনিবার জন্য উত্তেজক উপায় অবলম্বন করিতে হইবে ; যদি সে অবস্থা যথোপযোগী হয়, তাহা হইলে তাহাকে স্বাভাবিক গতিতে রাখিতে হইবে । প্রতিক্রিয়ার পরিণত অবস্থায় বিশেষ সতর্কতার প্রয়োজন । সেই প্রতিঘাতের পর যেন পুনঃ প্রতিঘাত উপস্থিত না হয় । প্রতিঘাতের পর সাম্যাবস্থা প্রাপ্তি হইলেই মঙ্গল ; নচেৎ ঘাত প্রতিঘাতের নিয়মের বশীভূত হইয়া একবার গুণ্যবল ও বারান্তরে পাপের বল প্রভ্রম্য পাইতে থাকে । যতদিন চরিত্র সাম্যাবস্থা প্রাপ্ত না হয়, ততদিন এই নিয়মের পরিবর্তনশীল তরঙ্গে একবার উর্দ্ধদেশ, আর বার অধোদেশ প্রাপ্ত হইতে থাকিবে । সময়ে সময়ে পরার্থ-প্রমুখ অর্থাৎ ধর্ম্যপ্রবৃত্তি সকল বিশেষ প্রবল হইয়া বিবেকের নিয়োগ উল্লঙ্ঘন পূর্বক স্বার্থপ্রমুখ বৃত্তিনিচয়ের উপর উৎপীড়ন আরম্ভ করে এবং মনো-রাজ্যের শক্তিসাম্য ভঙ্গ করে । স্বার্থপ্রমুখ বৃত্তি নিচয় দ্বারাই হউক আর পরার্থ-প্রমুখ বৃত্তি নিচয় দ্বারাই হউক, চিত্তের শক্তিসাম্য ভঙ্গ হওয়াই অনিষ্টের মূল । সুস্থ ও সবল শরীরে পিত্ত ককের মধ্যে এইরূপ বৈষম্য উপস্থিত হইলে জ্বরোৎপত্তি হয় । শরীরে এরূপ বৈষম্য একবার উপস্থিত হইলে, অনেক সময়ে তাহা হইতে জোয়ার ভাঁটার ত্যায় জ্বরকালীন বেগ ও মগ্নকালীন অবসাদের ক্রমাবর্ত্ত গতি বিধি হইতে থাকে । অনেকের জীবন এইরূপ ঘাত প্রতিঘাতের ক্রীড়ার সামগ্রী হইয়া আছে । বঙ্গদেশে বৈষ্ণব ধর্ম্মের প্রমত্তভাব সমাজের জর-বেগোপম উত্তেজনা প্রকাশ করিয়াছে, তৎপরে সেই সম্প্রদায়ের মধ্যে প্রবল পাপের

শ্রোত মথকালীন অবসাদের পরিচয় দিয়াছে। এমন কি, চৈতন্য দেবের জীবিতকালেও তিনি তাঁহার ধর্মের সংসারে এই প্রতিঘাতের পূর্বাভাস প্রাপ্ত হইরাছিলেন। তিনি বোধ হয় তাঁহার বর্ষায়ান্ সহযোগী নিত্যানন্দ প্রভুর অবস্থা দেখিয়াই বলিয়াছিলেন, তুমি বিবাহ করিয়া সংসারী হও, নচেৎ ধর্ম রক্ষা সহজ হইবে না। ব্যক্তিবিশেষের জীবনে এবং সম্প্রদায় বিশেষের ইতিহাসে এ কথার ভূরি ভূরি প্রমাণ দেদীপ্যমান রহিয়াছে।

কার্য্য, চিন্তা ও ভাব,—এই ত্রিবিধ উপকরণ যোগে মানব চরিত্র পুষ্টি লাভ করে। নূতন কার্য্য, নূতন চিন্তা ও নূতন ভাব, চরিত্রের প্রকৃত অন্নপান। আজ যে কার্য্য, চিন্তা ও ভাবে চরিত্রের পুষ্টিসাধন হইতেছে, কিছু দিন পরে তাহাদিগকে পরিবর্জন করিয়া নূতন কার্য্য, ভাব ও চিন্তা অন্বেষণ ও পরিগ্রহ করিতে হইবে। সৃষ্টির সর্ব্বত্রই এই নিয়ম। পরিগ্রহণ, পরি-রক্ষণ ও পরিবর্জন, এই নিয়ম সৃষ্টির সর্ব্বত্রই ব্যাপ্ত রহিয়াছে। মানুষের চরিত্র গঠনেও এই তিন শক্তি অলস নহে। এই তিন শক্তি যদি যথানিয়মে কার্য্য করিতে থাকে, তবে মানব চরিত্র অবাধে দিন দিন অনন্তের দিকে অগ্রসর হইবে। চিন্তা হইতে ভাবের উৎপত্তি, ভাব হইতে কার্য্যের উৎপত্তি। যখন দেখিবে, চিন্তা, ভাব ও কার্য্যের অন্নতা হইয়াছে, তখন বুঝিবে যে তোমার জীবনের মধ্যে পরিগ্রহণ শক্তিরও অন্নতা হইয়াছে। তখনই সাবধান হইবে। এক কার্য্য, এক চিন্তা, এক ভাব আত্মাকে কিয়দ্দিন পোষণ করিতে পারে,—চিরদিন পারে না। তাহাদিগকে স্বতঃই পরিবর্জন করিতে হয়। এই পরিবর্জন ভিন্ন

চরিত্র পুষ্টিলাভ করিতে পারে না। চিন্তা ও ভাবের নূতন ক্ষেত্র না পাইলে, চরিত্র হীনবল হইয়া স্থিরভাবে দণ্ডায়মান হইতে পারে না। চিন্তা, ভাব ও কার্য,—এ তিনের একটীর অভাবে চরিত্রের পূর্ণতা ভঙ্গ হইয়া যায়।

চরিত্র গঠন যে-বিজ্ঞানের অন্তর্গত, তাহা অদ্যাপি মানব সমাজে অনাবিকৃত রহিয়াছে। এদিকে লোকের দৃষ্টি অদ্যাপি ষথোচিত পরিমাণে আকৃষ্ট হয় নাই। জনসমাজ এখনও অপরা-বিজ্ঞান লইয়া ব্যস্ত আছেন, ধর্মসমাজ সকল পুরাতন শাস্ত্র কাহিনী লইয়াই মানবগণের পারলৌকিক সদৃগতির স্তোক বাক্য প্রয়োগ করিতেছেন। প্রস্তুত বিজ্ঞানের আলোচনা করিবার জ্ঞান কাহাকেও অগ্রসর হইতে দেখি না। এ শাস্ত্রের বেকন অদ্যাপি জন্মগ্রহণ করেন নাই। এখন এক প্রশ্ন, ব্রাহ্ম-সমাজ কি পুরাতন শাস্ত্র-প্রণালী অবলম্বন করিয়া ধর্মযাজন করিবেন, না মনুষ্য-প্রকৃতি সংগঠনের সুযোগ্য উপায় আবিষ্কার করিয়া পৃথিবীতে স্বর্গরাজ্য স্থাপন করিবেন ?

তৃতীয় পরিচ্ছেদ ।



শাস্ত্র,—পুরাতন ও নূতন ।*

শাস্ত্র কি ?—শাস্ত্র ঈশ্বরের সত্য, শাস্ত্র ঈশ্বরের আদেশ, শাস্ত্র ঈশ্বরের বাক্য । শাস্ত্র স্মৃতিরাং অনন্ত এবং ঈশ্বরের সঙ্গে নিত্য বর্তমান । ইহার বক্তা কে ?—ইহার বক্তা স্বয়ং ঈশ্বর । ইহার শ্রোতা কে ?—ইহার শ্রোতা স্মৃক্ষ চৈতন্য বিশিষ্ট ঈশ্বরোন্মুখ নর নারীর আত্মা । যদিও শাস্ত্রের শ্রোতা স্মৃক্ষ চৈতন্য বিশিষ্ট ঈশ্বরোন্মুখ নরনারীর আত্মা, কিন্তু তৎ শ্রবণের অধিকারী যাবতীয় নরনারী । ঈশ্বর শাস্ত্রস্বরূপ হইয়া প্রত্যেক নরনারীর আত্মাতে বাস করিতেছেন এবং প্রতিনিয়ত তাঁহার আদেশ ও সত্য প্রকাশ করিতেছেন । এ সত্য মানুষের স্থূল চৈতন্যে সাক্ষাৎ অনুভূত হয় না । ঈশ্বর পশু-পক্ষী প্রভৃতি ইঁতর প্রাণীর অন্তরে তাহাদের প্রাণ স্বরূপ হইয়া বাস করিতেছেন ; কিন্তু পশু-পক্ষী প্রভৃতি তাহা জানে না, কেন না তাহাদের চৈতন্য অত্যন্ত স্থূল এবং মায়া মোহে নিরবচ্ছিন্ন আচ্ছন্ন । মানুষ যত দিন তাঁহার ঈশ্বরকে তাঁহার অন্তরে স্পষ্ট অনুভব করিতে না পারেন, তত দিন তাঁহার চৈতন্য ইতর-জীবচৈতন্যের ত্রায় নিতান্ত স্থূল ও মায়ামোহে সমাচ্ছন্ন । কেবল প্রভেদ এই যে, মানবচৈতন্য বুদ্ধি-বিশিষ্ট এবং বিকাশ-প্রবণ ; এই জীব-চৈতন্যে সেই বুদ্ধি-শক্তি ও বিকাশ-প্রবণতার সমধিক অসম্ভাব দৃষ্ট হয় । মানব-চৈতন্য ক্রমে স্বকীয়

* তৎ-কৌমুদী ;—১৮০০ শক, ১লা বৈশাখ ।

স্থলস্থ পরিহার পূর্বক স্বপ্ন হইতে স্বপ্নতর হইয়া অনন্ত উন্নতির দিকে অগ্রসর হইতে পারে। ইহাতেই মানুষের এত মহত্ব, এত গৌরব। মানবীয় স্থল চৈতন্তে ঈশ্বরকে সাক্ষাৎ উপলব্ধি হয় না, এবং ঈশ্বরের আদেশ ও বাক্য সুস্পষ্টরূপে প্রকাশ পায় না। ঈশ্বর যে মানবাত্মাতে শাস্ত্রস্বরূপ হইয়া বাস করেন এবং প্রতি-নিয়ত তাঁহার আদেশ ও সত্য প্রকাশ করেন, ইহা কেবল মাত্র মানবীয় স্বপ্ন চৈতন্তে সুস্পষ্ট অনুভূত হয়। যত দিন মানুষ এই স্বপ্ন চৈতন্ত লাভ করিতে সমর্থ না হন, তত দিন তাঁহাকে পুরাতন শাস্ত্র লইয়া থাকিতে হয়।

এখন পুরাতন শাস্ত্র কি, তাহার আলোচনায় প্রবৃত্ত হওয়া যাক। যে শাস্ত্র, যে সত্য, যে আদেশ ঈশ্বরের মুখ হইতে সাক্ষাৎ শুনিয়াছি, এরূপ স্পষ্ট উপলব্ধি হয় নাই, তাহাই পুরাতন শাস্ত্র। ইহা আত্মার অবস্থাভেদে নানা রূপে প্রকাশিত হয়। প্রথমতঃ যে সমস্ত নীতি ও সত্য, যে উপায়ে হউক, সংসারে পূর্বাবধি প্রচারিত আছে, কতকগুলি লোক ঈশ্বরের দ্বারা তাহাদিগকে মাত্র করিয়া চলেন। ইহারা পুরাতন শাস্ত্রাবলম্বীদিগের নিম্নতম শ্রেণীস্থ লোক। ইহারা বেদ, কোরাণ বা বাইবেলের পন্থানুসরণ করেন। আর কতকগুলি লোক, কোন পুরাতন শাস্ত্র বিশেষের অনুসরণ না করিয়া, সহযোগীদিগের মধ্যে যাহাকে অপেক্ষাকৃত ক্ষমতাপন্ন ও বাক্পটু বিজ্ঞ ও সাধু দেখেন, অন্ধবৎ তাঁহারই কথার অনুসরণ করেন। ইহারাও পূর্বোক্ত নিম্নতম শ্রেণীর অন্তর্গত। অলৌকিক কার্য্য দ্বারা সমর্থিত না হইলে, ইহারা কোন সত্যকে সত্য বলিয়া গ্রহণ করিতে পারেন না। শাস্তি-ভয় প্রদর্শিত ও ফল-শ্রুতি কীর্তিত না হইলে, তাঁহারা কোন নিষেধ বিধির তাৎপর্য্য

বুঝিতে পারেন না। দ্বিতীয়তঃ কতকগুলি লোক, কোন লিপিবদ্ধ শাস্ত্র-বিশেষের বা অলোক-সামান্য মনুষ্য বিশেষের উপর নির্ভর না করিয়া, শুণ্ড প্রচারিত যে সমস্ত সত্য, তাহাদের অন্তরস্থ বিবেক সাগর দেয়, কেবল মাত্র তাহাদেরই অনুসরণ করেন। এখানে মানবীয় স্থূল-চৈতন্য অপেক্ষাকৃত বিশুদ্ধ ভাব প্রাপ্ত হইয়াছে। ইহারা অপেক্ষাকৃত আভ্যন্তরিক রাজ্যে প্রবেশ করিয়াছেন, ইহাদের চৈতন্যও অপেক্ষাকৃত আভ্যন্তরিক হইয়া উঠিয়াছে। ইহারা সত্য বুঝিবার জন্ত অলৌকিক কার্য্য দেখিতে চান না; ফলশ্রুতি ও শান্তিভয়ের তাদৃশ মুখাপেক্ষা করেন না। ইহাদের অন্তরে সত্যের সাগর পাওয়া যায়। ইহাদের হৃদয়াকাশে বিবেকের অরুণ ভাতি প্রতিভাত হইয়াছে। ইহারা শাস্ত্র বা মহাপুরুষ বিশেষের অবলম্বন যদিও পরিত্যাগ করিতে পারেন নাই, কিন্তু ইহাদের সে অবলম্বন অনেকটা শিথিল হইয়া পড়িয়াছে। তৃতীয়তঃ কতকগুলি লোক শাস্ত্র ও মহাপুরুষ নিরপেক্ষ হইয়া সহজ-জ্ঞান ও বিবেকের অনুরোধে নীতি ও সত্যের অনুসরণ করেন। ইহারা অন্তর মধ্যে সুবিস্তৃত শাস্ত্র দেখিতে পান, ইহারা বিবেকের নিকট সমস্ত তত্ত্ব শিক্ষা করেন। এখানে মানবীয় স্থূল চৈতন্য স্থূল চৈতন্যের অত্যন্ত সন্নিহিত হইয়াছে। ইহারা বিবেকের মধ্যে যদিও ঈশ্বরকে সাক্ষাৎ দর্শন করেন নাই, কিন্তু বিবেককে ঈশ্বরের প্রতিনিধি বলিয়া তাহার অনুসরণ করেন। ইহারা যদিও শাস্ত্র বিশেষ বা মনুষ্য বিশেষের মধ্যবর্তীত্ব পরিত্যাগ করিয়াছেন, কিন্তু বিবেকের মধ্যবর্তীত্ব পরিত্যাগ করিতে পারেন নাই। ইহাদের বিবেক ইহাদের ঈশ্বরের প্রতিনিধি হইয়া ইহাদের অন্তরে প্রতি-

নিয়ত বাস করিতেছে । * পুরাতন শাস্ত্রের সীমা এই খানেই শেষ হয় ।

এখন নূতন শাস্ত্র কি, তাহার আলোচনায় প্রবৃত্ত হওয়া যাক । ঈশ্বরের মুখ হইতে যে শাস্ত্র সাক্ষাৎ নির্গত হইয়া মানবীয় সৃষ্টি চৈতন্তে যাহা সাক্ষাৎ উপলব্ধি হয়, তাহাই নূতন শাস্ত্র । নূতন শাস্ত্রাবলম্বীদিগের নিকট বিবেক ঈশ্বরের মুখ, তাঁহার কেবল প্রতিনিধি নহে । ইহা বাহ্য-দর্শী স্থূল-চৈতন্তের অধিগম্য নহে, কিন্তু আভ্যন্তরিক সূক্ষ্ম-চৈতন্তের বিষয় । বাঁহারা এই সূক্ষ্ম-চৈতন্ত লাভ করিয়া নূতন শাস্ত্রের অধিকারী হইলেন, তাঁহাদের আর নীতি শাস্ত্রের অনুসরণ আবশ্যক হয় না, তাঁহারা প্রতিবারে ঈশ্বরের আদেশ শুনিয়া কার্য্য করেন । তাঁহাদের শাস্ত্র তাঁহাদের অন্তরে নিত্য বর্ত্তমান । তাঁহাদের শাস্ত্র চিরজাগ্রত, চিরজীবন্ত । যেখানে ঈশ্বর স্বয়ং সাক্ষাৎ বর্ত্তমান, সেখানে কে নীতিশাস্ত্রের মৃত বচন স্মরণ করিয়া তাহার অনুসরণ করে ? সেখানে ঈশ্বরই স্বয়ং শাস্ত্রস্বরূপ ।

এই নূতন শাস্ত্রে, পাপের শাস্তির জন্ত বা পুণ্যের পুরস্কার জন্ত, স্বতন্ত্র স্বর্গ বা নরক নাই । যিনি শাস্ত্র স্বরূপ, ঈশ্বর স্বরূপ হইয়া অন্তরে বাস করেন, তিনিই পাপের শাস্তা ও পুণ্যের পুরস্কর্ত্তা হইয়া অহরহঃ সেই অন্তরে বাস করিতেছেন । বাঁহারা এই সনাতন নূতন শাস্ত্র অবলম্বন করেন, তাঁহাদের ভূতকালের দিকেও দৃষ্টি নাই, ভবিষ্যতের দিকেও দৃষ্টি নাই ; তাঁহাদের দৃষ্টি বর্ত্তমানের উপর । পৌরাণিক শাস্ত্রের,—মহাপুরুষের দিকে ইহাদের লক্ষ্য নাই,—ভবিষ্যতে স্বর্গ ও নরকের প্রতি ইহাদের চক্ষু নাই ; ইহাদের দৃষ্টি অন্তরস্থ নিত্য বর্ত্তমান ঈশ্বরের প্রতি ।

লিপিবদ্ধ শাস্ত্র বিশেষের বা মহাপুরুষ বিশেষের নিষেধ, বিধি ইহাদের অবলম্বনীয় নহে । ইহাদের অবলম্বন, সেই নিত্য বর্তমান ভাগবৎ, বাহ্য অন্তরে প্রতিনিয়ত প্রোক্ত হইতেছে ।

এ নূতন শাস্ত্র প্রতিনিয়ত অন্তরেই স্ফূর্তি পায়, ইহা কখন বাহিরে ব্যক্ত হয় নাই । ইহা অব্যক্ত, চির অব্যক্ত । বাহিরে ব্যক্ত হইলেই ইহার মাহাত্ম্য চলিয়া গেল, ইহার নূতনত্ব দূর হইল;—তৎক্ষণাৎ ইহা পুৰাতন শাস্ত্র হইয়া গেল । এই শাস্ত্র ভাষায় অনুবাদনীয় নহে । লেখনীর মুখে বা রসনার অগ্রে এ ভাগবৎ স্ফূর্তি পায় না । এ শাস্ত্র অদৃশ্য ভাবে অদৃশ্য পথে বিচরণ করে । এ শাস্ত্র অকথিত ভাষায় অন্তরাকাশে স্ফূর্তি পায় ।

ঈশ্বরোন্মুখ আত্মা এইরূপে সময়ে সময়ে যে সত্য লাভ করিয়া ছেন, মৌখিক বাক্যে বা লিপিবদ্ধ শাস্ত্রে, তাহা চিত্রিত করিবার চেষ্টা হইয়াছে । কিন্তু মানুষ যখন উপলব্ধ সত্য প্রতিপ্রসব করিবার চেষ্টা করিয়াছেন, তখনই তাহাকে স্মৃতিশক্তি, কল্পনা, বুদ্ধি ও ভাষার সাহায্য লইতে হইয়াছে । প্রথমতঃ ঈশ্বরের সত্য মানুষের স্মৃতিশক্তি দ্বারা অনুবাদিত হইল, পরে কল্পনা ও বুদ্ধির হস্তে বিকৃত হইল, তৎপরে ভাষার দ্বারা অনুবাদিত হইল । এত বার অনুবাদ হইতে গেলে, সত্যের প্রকৃত মূর্তি রক্ষা পায় না । আবার ইহাও সত্য যে, জগতের বাবতীয় শাস্ত্রে যে সকল সত্য চিত্রিত হইয়াছে, শুৎসমুদয়ই যে মানবীয় স্মৃষ্ণ-চৈতন্ত্বে ঈশ্বরের মুখ হইতে স্পষ্ট প্রোক্ত, এরূপ উপলব্ধ হইয়াছে, তাহা নহে । অনেকে উন্নত হুল চৈতন্ত্বে সত্য উপলব্ধি করিয়া ঈশ্বরই ইহার প্রেরিতা, তাহা স্পষ্ট বোধগম্য করিতে পারেন নাই; প্রত্যুত অনুমান ও

যুক্তির সাহায্যে তাহা করুনা করিয়া লইয়াছেন । কেহ কেহ বা সাহসী হইয়া তাহা সাক্ষাৎ ঈশ্বরবাণী বলিয়া প্রচার করিয়াছেন বটে, কিন্তু তাহাও হয়ত অনেকের করুনা সিদ্ধান্ত মাত্র ।

আমরা বাহিরের সামগ্রী নাই,—স্থূল চৈতন্য ও পুরাতন শাস্ত্র লইয়া চিরদিন জল্পনা করিবার জন্য আমরা সৃষ্ট হই নাই । আমাদিগকে আভ্যন্তরিক রাজ্যে অনুপ্রবিষ্ট হইতে হইবে ; সেখানকার অনন্ত অদ্ভুত ব্যাপার সকল প্রত্যক্ষ গোচর ও অধ্যয়ন করিতে হইবে । আমাদিগের চৈতন্য ক্রমে সূক্ষ্ম হইতে সূক্ষ্মতর হইয়া আমাদের দৃষ্টিপথে কত মনোহর দৃশ্যাবলী উন্মুক্ত করিবে । আমরা ভজ্ঞত কি করিতেছি ? সাধন বিনা সে রাজ্যে কাহারো প্রবেশের উপায় নাই । সাধকেরাই এই নূতন শাস্ত্রাধ্যয়নের অধিকারী ।

চতুর্থ পরিচ্ছেদ ।

সাধনের অবস্থাভ্রয় ।*

মনুষ্য মাত্রেরই আত্মাতে সেই পরমাত্মার জ্যোতিঃ সময়ে সময়ে প্রকাশিত হইয়া থাকে । পাপী, তাপী, সাধু, অসাধু, কেহই এই অঘটনভ্য ব্রহ্মদর্শন লাভের অনধিকারী নহে । নিতান্ত পাষণ্ড-হৃদয়েও এই স্বর্গীয় অতিথি মধ্যে মধ্যে আসিয়া আতিথ্য গ্রহণ করিয়া থাকেন । হুরন্ত নরক সমান হৃদয়ও তাঁহার অগম্য নহে । সমস্ত মানব-হৃদয় সেই প্রেমময় পুরুষোত্তমের বিহার-ক্ষেত্র । এই বিহার ক্ষেত্রে সেই পরম পুরুষ মধ্যে মধ্যে সহসা আবির্ভূত হইয়া তাঁহার প্রগাঢ় প্রেমের পরিচয় প্রদান করেন । নর নারীর হৃদয় প্রদেশের উপর সেই হৃদয়বিহারী পরম দেবতার যে স্বাভাবিক স্বামীত্ব ও প্রভুত্ব আছে, এই স্বর্গীয় আবির্ভাব দ্বারা তিনি স্বয়ং তাহা মধ্যে মধ্যে প্রতিপন্ন করিয়া থাকেন । সেই পরমপুরুষ নর নারীর হৃদয়বিহারী প্রাণারাম জীবনবল্লভ, এই সামগিক আবির্ভাবে সেই পরিচয়ই ক্রমে ক্রমে বিজ্ঞাপিত হইয়া থাকে । প্রথমে বোধ হয় যে, আবির্ভাবে অন্তরাকাশ উজ্জ্বল হইল, তাহা অন্তরের ভাব মাত্র,—মনের অবস্থা মাত্র । দর্শন-শাস্ত্রকারেরা বলেন যে, শিশুরা প্রথমে ভাববাদী হয় ; তাহারা বাহ্য কিছু দর্শন করে, বাহ্য কিছু শ্রবণ

করে, সমস্তকে তাহাদের অন্তরের ভাব মাত্র—মনের অবস্থা মাত্র মনে করে। সেই দৃষ্ট, শ্রুত বিষয়ের স্বতন্ত্র বাহ্যিক সত্ত্বা প্রথমে প্রতীতি করিতে সামর্থ্য হয় না। পরে ক্রমশঃ যতই তাহাদের বহুদর্শন লাভ হইতে থাকে, ততই তাহারা ভাব-বাদের সীমা পরিত্যাগ করিয়া স্বতন্ত্র সত্ত্বা-বাদের সীমার মধ্যে আসিয়া প্রবিষ্ট হয়। জন্মান্ত বা জন্ম-বধিরেরা যদি কখন চক্ষু বা শ্রোত্র লাভ করে, প্রথমে তাহাদিগকেও এই দশাগ্রস্ত হইতে হয়। মানবের হৃদয়, যখন প্রথমে সেই পরমের আবির্ভাব অনুভব করে, তখন তাঁহার স্বতন্ত্র সত্ত্বাতে সহসা বিশ্বস্ত হইতে পারে না। তাঁহাকেও প্রথমে ভাব-বাদী হইতে হয়। তিনি প্রথমে মনে করেন যে, এই আবির্ভাব তাঁহার অন্তরের ভাব বা কল্পনা মাত্র। কিন্তু বহুদর্শন লাভের সঙ্গে সঙ্গে এই ভাব-বাদ ভিরোহিত হইতে থাকে, এবং স্বতন্ত্র সত্ত্বাবাদ আসিয়া শনৈঃ শনৈঃ তাহার স্থান অধিকার করে। আমরা ক্রমশঃ জানিতে পারি, সেই আবির্ভাবের সঙ্গে আমাদের কি মধুর সঙ্গ। •সেই মধুর সঙ্গের বিজ্ঞাপন এই অবাচিত ও অহেতুক আতিথ্য গ্রহণ দ্বারা প্রচার করিয়া, সেই পরম পুরুষ মানুষের অনুরাগ ও প্রেম আকর্ষণ করিয়া থাকেন। ষাঁহারে চিনিতেন না, জানিতেন না, একদিন শুভক্ৰমে শুভযোগে সহসা সেই পরম পুরুষের সত্যশিবসুন্দর মূর্তি, তাঁহার সচ্চিদানন্দ স্বরূপ হৃদয়ে আবির্ভূত হইল! চকিতে চমৎকার দৃশ্য দেখিয়া আপনাকে আপনি ভুলিয়া গেল! হৃদয়-কেন্দ্রের উপর দিয়া কোথা হইতে আনন্দের ঝড় বহিয়া চলিল! যেখানে ভীষণ মরুভূমি ছিল, সেখানে প্লাবনের জল উঠিয়া উত্তাল তরঙ্গ তুলিয়া নৃত্য করিতে লাগিল! এই স্বর্গীয়

আবির্ভাব সকল হৃদয়ে সমান আনন্দ উৎপাদন করে না। হৃদয়ের গঠন অনুসারে আনন্দ-ক্ষুণ্ণির তারতম্য হইয়া থাকে। অমুরাগী পাত্রে এই শুভ মুহূর্ত্ত উপস্থিত হইলে, সেই দিন হইতে তাঁহাকে সাধনের পথে সঞ্চরণ করিতে হয়। তিনি যে সুন্দর দৃশ্য দেখিয়াছেন, পুনরায় তাহা দেখিবার জন্ত ব্যাকুল হন; তিনি যে মধুর আশ্বাদন একবার প্রাপ্ত হইয়াছেন, তাহা আবার প্রাপ্ত হইবার জন্ত লালারিত হন। তাঁহার সংসার-পাশ সেই দিন হইতে শিথিল হইতে আরম্ভ হয়। সংসার আর তাঁহাকে পূর্বা-নুরূপ স্মৃতি করিতে পারে না। সুখকে আর তাদৃশ সুখ বলিয়া বোধ হয় না। তাঁহার আত্মা তখন সর্বদাই অতৃপ্ত,—সর্বদা সেই হারাধন অব্ধেষণে অগ্রমনস্ক। সেই হারাধন পাইবার জন্ত তিনি সর্বদা উদ্দেশে প্রার্থনা করেন, এবং ব্যাকুল হইয়া ক্রন্দন করেন। তিনি সাধনের অনন্তপথে দাঁড়াইয়াছেন, কে তাঁহাকে আর সেখান হইতে অপসারিত করে? সেই ব্রহ্মমূর্ত্তের মধুরা-শ্বাদ মুহূর্ত্তমাত্রের জন্ত যখন তাঁহার ভোগ্য বস্তু হইয়াছে, তখন তিনি আর তাহা বিস্মৃত হইতে পারেন না। যেখানে না দেখিয়া অমুরাগ জন্মে, না পাইয়া সাধনে প্রবৃত্ত হয়, সেখানে ধর্ম্মভাব সহজে অধুরিত হইতে পারে না। কিন্তু যেখানে অগ্রে ব্রহ্ম সাক্ষাৎকার লাভ, পরে সাধন; সেখানে অমুরাগ উদ্দীপিত থাকিলে, ধর্ম্ম-ভাবের বীজ সহজে বিনষ্ট হইতে পারে না। সে বীজ সেই অবিদ্যারী হস্তদ্বারা জলস্রোতের সন্নিধানে সংরোপিত হইয়াছে। সে বীজ অবশ্যই নীত গ্রীষ্মের প্রভাবে সময়ে সময়ে শুক ও নীরস হইতে পারে, কিন্তু তদ্বারা তাহা বিনষ্ট হয় না; পরন্তু বর্দ্ধিত হয়। বিচ্ছেদ মানুষকে সাধক করে; বিচ্ছেদ ভিন্ন,—অভাব

ভিন্ন সাধন অসম্ভব । বিচ্ছেদ ও অভাব সাধনের প্রাণ, এবং প্রকৃত সাধকের অনুরাগানলে যুতাছতি অর্পণ করিয়া থাকে । সংসার অবশ্রুই সময়ে সময়ে তাঁহাকে আকর্ষণ করিয়া থাকে, পাপ অবশ্রুই সময়ে সময়ে তাঁহাকে প্রলোভিত করে ; কিন্তু তাহার। তাঁহাকে অধিক দিন ভুলাইয়া রাখিতে পারে না,—মোহ তাঁহার হৃদয়ে মনের মত স্থান না পাইয়া দীর্ঘকাল স্থায়ী হইতে পারে না ।

কিন্তু যেখানে এইরূপ অনুরাগের অভাব, সেখানে সাধনের প্রবর্তাবস্থা এইরূপ সূচাক্রুরূপে আরক হয় না । সেখানে প্রকৃত অনুরাগ উদ্দীপিত হইবার জন্ত পুনঃ পুনঃ ব্রহ্ম সাক্ষাৎকার লাভের প্রয়োজন হয়, এবং সেই উদ্দীপনার সঙ্গে সঙ্গে প্রবর্তা-বস্থার প্রকৃত সূত্রপাত হইতে থাকে । এ অবস্থার ব্যাকুল হইয়া উদ্দেশে প্রার্থনা ও নাম সাধন করাই স্বাভাবিক এবং তাহাই সাধকের একমাত্র সম্বল ।

যত দিন ব্রহ্মের আবির্ভাবকে মনের ভাব বা কল্পনা বলিয়া বোধ বা সন্দেহ থাকে,—যত দিন সেই আবিভূত দেবতার আদেশ বা নিষেধ বাক্যকে মনঃসম্মত বা মনঃকল্পিত বলিয়া উপলব্ধি বা সন্দেহ থাকে,—যতদিন সাধক সেই ব্রহ্মাবির্ভাব ও ব্রহ্মাদেশকে স্বতন্ত্র বহির্বিষয় বলিয়া, হৃদয়ের প্রভু ও জীবনের নেতার আবির্ভাব ও আদেশ বলিয়া প্রতীতি করিতে না পারেন,—যতদিন অন্তরে প্রকৃত অনুরাগের উদ্দীপন হইয়া সাধন পথে দিন দিন অগ্রসর হইতে সক্ষম হয়েন, না তত দিন সাধক প্রবর্তাবস্থার মধ্যে অবস্থিতি করেন ।

প্রবর্তাবস্থা সম্পূর্ণ হইলে সাধক সাধনের মধ্যাবস্থায় উপনীত

হইলেন । সাধক এখন সাধনের বিষয়কে জানিয়াছেন, তাঁহার দৃঢ়তন্ত্র সম্ভার উপর তাঁহার বিশ্বাস দাঁড়াইয়াছে, তিনি তাঁহাকে হৃদয়ের স্বামী ও জীবনের নেতা বলিয়া উপলব্ধি করিয়াছেন । তিনি বিচ্ছেদে প্রাণপণ করিয়া সাধন করেন, মিলনে সেই জীবন-স্রোতে আপনার জীবনতরী ভাসাইয়া দিয়া পরম আরাম ও শান্তি উপলব্ধি করেন । সেই স্বর্গীয় আগন্তকের সঙ্গে ক্রমে তাঁহার পরিচয় বাড়িতে থাকে । প্রবর্তাবস্থায় তিনি স্বার্থপর ছিলেন, আপনার সুখের জন্ত, আপনার মঙ্গলের জন্ত তিনি সেই পরমাবি-
 র্তাবকে কামনা করিতেন, প্রার্থনা করিতেন । এখন তাঁহার সেই স্বার্থপর ভাব ক্রমে বিদূরিত হইয়া অন্তরে প্রেমের সঞ্চায় হইতে লাগিল । প্রবর্তাবস্থায় সেই আবির্ভাব আপনা হইতে আসিয়া তাঁহার নবীন আত্মাকে অতি সম্ভরণে পোষণ করিয়াছে, এখন তিনি নানা উপায় আবিষ্কার করিয়া সেই স্বর্গীয় আবি-
 র্তাবকে পোষণ করিতে কৃতসঙ্কল্প হইয়াছেন । এখন তিনি ক্রমে জানিতে পারিলেন যে, সেই স্বর্গীয় অতিথি কিসে ভুট্ট ও কিসে রুট্ট হইয়া থাকেন । সেই অতিথিকে সৎকার করাই, সেবা করাই করাই তাঁহার জীবনের প্রধান কর্তব্য মনে করেন । তিনি কি চান, কি বলেন,—ইহাই শুনিবার জন্ত তাঁহার হৃদয় উন্মুখ হইয়া থাকে । তিনি হৃদয় দিয়া—প্রাণ দিয়া—জীবন দিয়া—স্বর্কস্ব দিয়া তাঁহাকে সম্ভট করিবার জন্ত লালায়িত হন । প্রবর্তাবস্থায় একটু ত্যাগ স্বীকার করিতে সঙ্কুচিত হইতেন, এখন সেই প্রেম-
 স্পন্দ তাঁহার নিকট যখন যা চান, তিনি তখনই তাহা তাঁহার চরণে উপহার দিবার জন্ত লালায়িত হন । সেই পরম অতিথি তাঁহার কাছে কিছু চাহিলে, তিনি এখন আপনাকে কৃতার্থ জান

করেন। সেই হৃদয়-বিহারীর মুখমণ্ডল বিরক্ত দেখিলে, তাঁহার দুঃখের অবধি থাকে না; প্রাণ দিয়া, সর্ব্ব দিয়া যদি তাঁহাকে সন্তুষ্ট করিতে পারেন, তাহাতেও তিনি পশ্চাৎপর হন না। তিনি সমস্ত হৃদয় মন সমর্পণ করিয়াও সন্তুষ্ট হন না, প্রাণ দিয়াও তৃপ্ত হন না, প্রীতি ভক্তি সেবা শুশ্রূষা করিয়া তাঁহার অভিলাষ মিটে না। তিনি সমস্ত করিয়াও মনে করেন, কিছুই করিলাম না; সমস্ত দিয়াও মনে করেন, কিছুই দিলাম না। তিনি বিচ্ছেদের সময় চাতকের ত্রাস তাঁহার মুখ তাকাইয়া থাকেন,—আপনার সমস্ত ক্রটি স্মরণ করিয়া আত্ম-ভৎসনা করিতে থাকেন, এবং মিলনে হৃদয়ের সমস্ত প্রেম, সমস্ত ভক্তি, সমস্ত মনোযোগ, সমস্ত আদর অপেক্ষা দিয়া সেই প্রেমাস্পদ আগন্তুককে বরণ করিয়া হৃদয়ের সিংহাসনে প্রতিষ্ঠিত করেন। তিনি সাধনের মধ্যাবস্থা প্রবৃত্ত হইয়া সেই হৃদয়বিহারীকে স্বতন্ত্র বহির্বিষয় বলিয়া উপলব্ধি করিয়াছেন; কিন্তু এই মধ্যাবস্থা বতই পরিণত হইতে থাকে, তিনি ততই তাঁহাকে আপনার অন্তরের সঙ্গে নিশাইবার চেষ্টা লাগান্নিত হন,—তিনি তাঁহাকে বহির্বিষয় বলিয়া ভাবিতেও কষ্ট বোধ করেন! “তিলান্ন বিচ্ছেদে তাঁহার গ্রাস করয়ে কাল।”

যখন সাধক ডাকিবামাত্র দেখা পান, ইচ্ছামাত্র বিচ্ছেদকে মিলনে পরিণত করিতে পারেন,—যখন তাঁহাকে তাঁহার কিছুই অদেয় থাকে না,—যখন হৃদয়বিহারীর সঙ্গে তাঁহার আন্তরিক নিগূঢ় বোগ সংস্থাপিত হয়, এবং সম্বন্ধ দিন দিন প্রগাঢ় ও ঘনিষ্ট হইতে থাকে, তখন তিনি মধ্যাবস্থা হইতে ক্রমশঃ উত্তীর্ণ হইয়া আর একটী অভিনব অবস্থায় উপনীত হন।

সেই অবস্থা সাধকের সিদ্ধাবস্থা। এ অবস্থায় সেই পরম

অতিথি আর অতিথি থাকেন না,—তিনি তখন গৃহের সর্বস্বামী হইয়া যান,—সেই হৃদয়বিহারী আর সাময়িক বিহারী থাকেন না; কিন্তু হৃদয়ের চিরবিহারী হইয়া পড়েন—দেহের মধ্যে প্রধান দেহী হইয়া বিরাজ করেন, সর্বময় কর্তা হইয়া সকল কার্যে আপনার মহিমা ও লীলা প্রকাশ করেন। এ অবস্থায় আত্মাতে পরমাত্মাতে বিচ্ছেদ নাই, কিন্তু অবচ্ছিন্ন মিলনই বিরাজ করিতে থাকে। এ অবস্থায় আত্মা সর্বদাই অনুপ্রাণিত থাকে, সর্বদাই ব্রহ্ম-ধাম-বাসী হইয়া থাকে। এ অবস্থায় আত্মা দ্বারা সেই পরমাত্মা আয়তীকৃত হয়,—মনুষ্যের প্রেমডোরে পরমাত্মা আবদ্ধ হন। যে হৃদয়ে তিনি প্রকৃত প্রেম পান, প্রকৃত আদর ও সৎকার পান, সেই পরম অতিথি সেই খানেই ধরা দেন,—সেই খানেই তিনি অভেদ সম্বন্ধে সম্বন্ধ হইতে থাকেন। তিনি ভক্তের সর্বস্ব ধন হন, ভক্তও তাঁহার সর্বস্ব ধন হয়। তিনি ভক্তের মধ্যে বিরাজ করেন, ভক্তও তাঁহার মধ্যে বিরাজ করে। যে পরিমাণে ভক্তের আত্ম-সমর্পণ, সেই পরিমাণে সেই ভক্ত-বৎসল তাহার হৃদয়ে অধিষ্ঠিত ও বিমিশ্রিত। এই অবস্থা অবোধ উন্নতির অনন্ত পথে অগ্রসর হইতে থাকে। ইহা বর্ণনাশীত।

পঞ্চম পরিচ্ছেদ ।

প্রসঙ্গ । *

ঈশ্বরপ্রসঙ্গের উপকারিতা সাধক মাঝেই স্বীকার করিবেন । এক এক সময়ে আমরা বন্ধুগণের সঙ্গে ঈশ্বরপ্রসঙ্গে প্রেমালাপ করিতে করিতে গভীর উপাসনার আনন্দ হৃদয়ে অনুভব করিয়াছি, সেই অবস্থায় এই প্রেম-প্রসঙ্গে নিমগ্ন হইয়া আত্মন্বতি পর্য্যন্ত হারাইয়া ফেলিয়াছি এবং অতি সুদীর্ঘ সময়কে মুহূর্তের জ্ঞায় যাপন করিয়াছি; কোথা দিয়া যে, সময়স্রোত চলিয়া গিয়াছে, কিছুই জানিতে পারি নাই । উপাসনার জ্ঞায় প্রসঙ্গেও ব্রহ্মদর্শন লাভ হয় । পাঁচটা বন্ধু মিলিয়া সেই পরম বন্ধুর দয়ার ও গুণের কথা বলিতে বলিতে ও শুনিতে শুনিতে তাঁহার আবির্ভাবস্রোতে তাহাদের হৃদয়গুলি ভাসিয়া গেল,—পাঁচটা হৃদয় সেই পরমলোকে গিয়া মিলিত হইয়া একটা হৃদয় প্রস্তুত হইল,—পাঁচটা অলস্ত প্রদীপ একত্র হইয়া পঞ্চপ্রদীপের শোভা ধারণ করিয়া সেই পরমারাধ্যের আরতি করিতে লাগিল । পৃথিবীতে একরূপ সুন্দর দৃশ্য অতি বিরল । কিন্তু দুর্ভাগ্যক্রমে মাদৃশ অধস্তন উপাসকেরা সকল সময়ে এই সুন্দর দৃশ্য আয়ত্ত করিতে সক্ষম নহে । উচ্চতম সাধু ভক্তেরাই সংপ্রসঙ্গে মিলিত হইলে, আসন্ন জমাইতে সর্বদাই পারগ হন । প্রসঙ্গ জমান কেবল এই সকল সাধক দিগেরই সর্বদা আয়ত্তাধীন ।

উপাসনা অপেক্ষা প্রসঙ্গের একটি 'অধিকতর উপকারিতা' এই যে, ইহা দ্বারা জৈবের প্রতি প্রেম ভক্তির জ্বালা, অন্তরের আতৃভাব বিশেষরূপে সম্পোষণ লাভ করে। উপাসনা দ্বারাও আতৃভাব পোষণ হইতে পারে, কিন্তু প্রসঙ্গ দ্বারা তাহা বিশেষ রূপে হইয়া থাকে। প্রসঙ্গ সূচাক্রমে সম্পন্ন হইলে, আতৃভাব পোষণে কখনই অকৃতকার্য হয় না। যখন প্রেমে উত্তেজিত হইয়া পরস্পরের মুখে সেই প্রেমাস্পদের কথাযুত পান করিবার জন্ত চিত্ত লালায়িত হয়,—যখন পরস্পরের জীবনের ইতিবৃত্তে সেই পরম দয়ালের অপূর্ণ লীলার কথা শ্রবণ করিবার জন্ত হৃদয় উৎসুক হয়, তখন স্বর্গীয় প্রেম-প্রবাহ সেখানে প্রবাহিত হইতে থাকে, এবং মনের স্বার্থপরতা, কুটিলতা, মলিনতা সকলকে ভাসাইয়া লইয়া যায়। আতৃভাব পোষণের এমন সুসময় আর কোথায় মিলিবে ? প্রসঙ্গ চরিত্রশোধনেরও উৎকৃষ্ট উপায়।

গভীর ধ্যান ধারণা অপেক্ষাও প্রসঙ্গের উপকারিতা অনেক অধিক। ধ্যান ধারণা দ্বারা জৈবের আবির্ভাবকে ধরিয়া রাখা অসম্ভব না হইলেও যার পর নাই কষ্টসাধ্য, কিন্তু প্রসঙ্গ দ্বারা এই আবির্ভাবকে যতকণ ইচ্ছা অনায়াসে ধরিয়া রাখা যায়। বিশেষতঃ এই প্রসঙ্গ-সাধ্য আবির্ভাব ধ্যান-সাধ্য আবির্ভাব অপেক্ষা সর্বোৎকৃষ্টতর।

প্রসঙ্গের সময় সকলেরই হৃদয় সেই প্রেমময়ের আবির্ভাবে অল্পপ্রাণিত হয়, তখন পরস্পরের বাক্য সেই অল্পপ্রাণিত হৃদয়ের গভীর স্থান হইতে নির্গত হইয়া পরস্পরের উত্তেজিত হৃদয়ের গভীর স্থান পর্য্যন্ত বিদ্ধ করিয়া প্রবিষ্ট হয়। অল্পপ্রাণিত হৃদয়ের বাক্য দৈবশক্তি সম্পন্ন, তদ্বারা সহজে অপর সাধারণ সকলের

অন্তরের অন্ধকার বিদূরিত হয় ও হৃদয়ের পাপ, হুশ্রুস্তি ও স্বার্থ-পরতা সঙ্কুচিত হয়। সেই শক্তিসম্পন্ন বাক্য অনুপ্রাণিত হৃদয়ে আরো আশ্চর্য্য ব্যাপার উৎপাদন করে। উত্তেজিত বাক্যের ক্রম অনুত্তেজিত হৃদয় অপেক্ষা উত্তেজিত হৃদয়ে অনেকগুণ অধিক।

এইরূপ অনুপ্রাণন ভিন্ন প্রসঙ্গ কখনই সুচারুরূপে সম্পন্ন হয় না। যে প্রসঙ্গের উপরে স্বর্গ হইতে পুষ্পবৃষ্টি না হয়, তাহা কখনই প্রসঙ্গ নামের উপযুক্ত নহে। মনের ইচ্ছাতে বা অনুরাগে কখনই প্রসঙ্গকে সুসিদ্ধ করা যায় না। স্বর্গীয় বায়ু কখনই বহিবে, তাহা কেহই জানে না।

কিন্তু ইহা অবশ্যই স্বীকার করিতে হইবে যে, কতকগুলি শুভযোগ একত্র হইলে প্রসঙ্গ আপনা হইতে উদয় হয়। তন্মধ্যে আমরা কয়েকটি উল্লেখ করিতে পারি। যেখানে পরস্পরের উপর সরল বিশ্বাস আছে, পরস্পরের কাহারো প্রতি কোন প্রকার সন্দেহ নাই, অপ্রীতিকর কোন প্রকার অসম্ভাব নাই,—যেখানে হৃদয়ে হৃদয়ে স্বাভাবিক নৈকট্য সম্বন্ধ (affinity) আছে, সেখানে প্রসঙ্গ অতি সহজে স্বর্গীয় সাহায্য লাভ করিয়া থাকে। তন্নিম্ন তাহার উদয় অতি বিরল। অনেক সময়ে দেখা যায় যে, লোকে প্রসঙ্গের জন্ত মিলিত হইয়া, ঘোরতর তর্কবিতর্ক করিয়া অন্তরে অশান্তি ও অসম্ভাব লইয়া গৃহে ফিরিয়া যায়।

প্রসঙ্গ সম্বন্ধে কয়েকটি কথা স্মরণ রাখা আবশ্যক। প্রসঙ্গ স্থলে যেন কেহ বাচালতা প্রকাশ না করেন। আপনি বলিব আর সকলে শুনিবে, এরূপ ইচ্ছা দ্বারা কেহ যেন পরিচালিত না হন। ইহা অন্তরের গভীর স্বার্থপরতা হইতে উৎপন্ন হয়। প্রসঙ্গ স্থলে লোকের স্বার্থপরতা এই পথ দিয়া প্রকাশিত হইয়া থাকে।

বয়ঃ বলিবার অপেক্ষা অত্নের কথা শুনিবার জ্ঞান অধিকতর প্রস্তুত হওয়া কর্তব্য । অত্নকে বলিবার সম্পূর্ণ অবসর দেওয়া বিধেয় ।

অত্নকে শিক্ষা দিব অপেক্ষা অত্নের কাছে শিথিব, এই ইচ্ছা যেন অন্তরে বলবতী থাকে । অন্তরের ভাব দ্বারা উত্তেজিত না হইলে, কেহ যেন কথা না কহেন । ইহা সকলের স্মরণ রাখা কর্তব্য যে, অনুপ্রাণিত হৃদয় হইতে কথা নিঃসৃত না হইলে, তাহা কখন কাহারও হৃদয়দেশ স্পর্শ করিবে না এবং সকলের মনোযোগ আকর্ষণ করিয়া প্রসঙ্গকে জমাইতে পারিবে না । প্রথমে, কতক সময় আদবে কোন কথা না হওয়াই ভাল । সকলে নিস্তব্ধ হইয়া ঈশ্বরকে স্মরণ করিবেন, পরে অন্তরে ভাবের উত্তেজনা হইলে কথা আরম্ভ করিবেন । যখন কথা আরম্ভ হইবে, তখন সকলে যেন সেই দিকে মনোযোগ অর্পণ করেন ; এবং সেই কথামৃত পান করিবার জ্ঞান পূর্বানুরাগী হন । কেহ যেন কাহারো কথাতে কোন প্রকার বাধা প্রদান না করেন ।

প্রথমে কথা না জমিলেও সহসা প্রসঙ্গ ছাড়িও না । অনেক সময়ে মধ্যম বা শেষভাগে প্রসঙ্গ জমিয়া থাকে । বিশ্বাস ও বৈর্যের সহিত সে সময়ের প্রতীক্ষা করিতে হইবে ।



ষষ্ঠ পরিচ্ছেদ ।

সদালাপ । *

তুমি প্রেমাস্পদের নাম কেন কর ?—তঁাহার অদর্শন হয় বলিয়া । অদর্শনে নাম বিনা আর কি সম্বল আছে ?

সাধক নাম-সিদ্ধ হন কখন ?—যখন নাম করিবামাত্র দর্শন লাভ হয় ।

সাধক নাম করেন কেন ?—অনুরাগের উত্তেজনায় ।

অনুরাগ কখন উত্তেজিত হয় ?—বিচ্ছেদে ।

ব্রহ্ম দর্শন হয় কখন ? যখন চিত্ত সংসার ও বাহ্য জগৎ অতিক্রম করিয়া উঠে ।

যাঁহার একবার ব্রহ্মদর্শন হইল, তাঁহার চিত্ত কেন আবার সংসারে ফিরিয়া আইসে ?—চিত্ত সংসার-পাশ ছেদন করিতে পারে নাই বলিয়া,—চিত্ত ব্রহ্মেতে আত্ম-সমর্পণ করিতে পারে নাই বলিয়া ।

ব্রহ্মদর্শন চিরস্থায়ী হয় কখন ?—যখন সংসার-পাশ চিরদিনের জন্য ছেদন করিয়া চিত্ত তদগত ও তদর্পিত হয় ।

ব্রহ্ম লাভ হয় কাহার ?—যাঁহার চিত্ত তাঁহাতে অর্পিত হইয়াছে । যাঁহার যে পরিমাণে আত্ম-সমর্পণ, তাঁহার সেই পরিমাণে ব্রহ্মলাভ ।

প্রেম হয় কখন ?—যখন তাঁহার প্রেম আসিয়া হৃদয়কে আকর্ষণ করিয়া লয় ।

প্রেমের মূল কি ?—আত্ম-বিস্মৃতি ।

* তত্ত্ব-কৌমদী ;—১৮০০ শক, ১৬৬ আষাঢ় ।

সপ্তম পরিচ্ছেদ ।

অচ্যুত পদ । *

ধর্মার্থীর জীবনে এই অচ্যুতপদ পরম প্রার্থনীয় অবস্থা । সাধকের সমস্ত সাধন এই উদ্দেশ্যেই অবলম্বিত হইয়া থাকে । ইহাই প্রকৃত সিদ্ধাবস্থা । ইহাই প্রকৃত আধ্যাত্মিক জীবন । জীবনের মধ্যে সাংসারিকতা ও মোহের লেশ মাত্র থাকিতে, এই পরম পদ লাভ করিবার কিছু মাত্র সম্ভাবনা নাই । যে জীবনে সংসারের আধিপত্য আছে, সে জীবন মায়ী-মোহের ক্রীড়া ভূমি । সেখানে একবার জন্ম, আবার মৃত্যু ; একবার উত্থান, আবার পতন ; একবার উন্নতি, আবার অবনতি ; একবার পুণ্য, আবার পাপ । মায়ী-মোহের ক্রীড়াস্থল এই সংসারে অবাধে ক্রমাগত উন্নতি, অবিশ্রান্ত উত্থান, নিরবচ্ছিন্ন পুণ্য, জন্ম-মৃত্যু-পাশ-মুক্ত অজরামর জীবন কখনই সম্ভবপর নহে । এ সমস্ত আধ্যাত্মিক রাজ্যের স্বাভাবিক ঘটনা । যাহার জীবন সংসারের মায়ী মোহ হইতে উত্তীর্ণ হইয়া সে রাজ্যের মধ্যে প্রবিষ্ট হইয়াছে, তাহারই জীবন এই সমস্ত আধ্যাত্মিক দৃশ্যের সম্মুখীন হইয়াছে । প্রকৃত অচ্যুত পদ এ দেশে প্রাপ্য নহে ; কিন্তু সে দেশে ইহা অতি সুলভ সামগ্রী ।

অটল ধর্মজীবন ব্রাহ্মের অতি প্রিয় পদার্থ । প্রবল ব্যাভার প্রচণ্ড বেগ প্রতি নিমেষে উগ্রতর হইয়া প্রলয়ের সংহার মূর্তিতে আসিয়া ব্রাহ্ম জীবনকে আক্রমণ করিতেছে । ব্রাহ্মজীবন তদবস্থা-

পন্ন হইয়াও অবাত-কম্পিত দীপ-শিখার ন্যায় আপনার স্থানে অটল ভাবে স্থিতির রহিয়াছে। ইহার ন্যায় সুখদ দৃশ্য সংসারে আর কি আছে? প্রকৃত ব্রাহ্মজীবন অবস্থার দাস নহে, ঘটনার স্রোতে তুণের ন্যায় নোয়মান হইবার সামগ্রী নহে। প্রকৃত ব্রাহ্মজীবন সংসারের মায়া-মোহের অতীত স্থানে বিচরণ করে। সেখানে জন্ম মৃত্যুর ক্রোড়া নাই, উত্থান পতনের অভিনয় নাই, উন্নতি অবসাদের দৃশ্য-পরিবর্তন নাই। প্রকৃত ব্রাহ্মজীবন অচ্যুতপদ। তাহা ক্রমাগত উন্নতিশীল, অবি-শ্রান্ত উত্থানক্ষম, নিরবচ্ছিন্ন পুণ্যব্রত এবং সর্বক্ষণ জন্ম-মৃত্যু-পাশ-মুক্ত অজর ও অমর। প্রকৃত ব্রাহ্ম কখনও স্থানচ্যুত হন না, কখনও কক্ষ ভ্রষ্ট হন না,—তিনি অনুক্ষণ আপনার স্থানে অচ্যুত-পদে দণ্ডায়মান থাকেন, অনুক্ষণ অচ্যুত ভাবে আপনার কক্ষেতে পরিভ্রমণ করেন। তিনি সকলের সঙ্গে আলাপ করেন, সকলের সঙ্গে মিশ্রিত হন, সকলের সঙ্গে সম্বন্ধ রক্ষা করেন; কিন্তু সকল বিষয়ে আপনার স্থানে, ভাবে ও মতে স্থিতির থাকিয়া সকল কার্য সম্পন্ন করেন।

•

অদিকাংশ লোকই অশ্রের সঙ্গে ব্যবহার করিবার সময় আপন আপন অস্তিত্ব পর্য্যন্ত হারাইয়া ফেলেন। তাঁহাদের ধর্ম-জীবনের বহিরঙ্গ সকল কোথাও বা অতি সঙ্কুচিত হইয়া যায়, কোথাও বা অন্তরের অভ্যন্তর মধ্যে একেবারে এমন লুকাইয়া যায় যে, তাহা আর সহজে বহির্মুখ হইতে চায় না। এইরূপ লোক লজ্জা নিতান্ত হ্রবণীয়। একরূপ জীবনে ধর্ম-ভাবের স্বাভাবিক ক্ষুণ্ণির অনেক বাধা। আমি যে ধর্মব্রত গ্রহণ করি-
য়াছি, তজ্জন্ত আমি কাহারো নিকট কখন লজ্জিত নহি, এই

ভাবে সর্বদা না থাকিলে, কাহার ধর্মভাব কখন ক্ষুণ্ণিত
করিতে পারে না । সর্বদা লজ্জা বা ভয়ের মধ্যে সঙ্কুচিত
থাকিলে আমাদের ধর্মভাব সেই সঙ্কুচিত হাঁচের মধ্যে
অনুকূল পৃষ্ঠ হইয়া তাহাও অস্বাভাবিক আকার ধারণ করে ।
আমরা দেখিয়াছি, কোন কোন ব্রাহ্ম নাস্তিক দলে উদার ভাবে
মিশ্রিত গিয়া আপনার ধর্ম-জীবন ও ধর্ম-বিশ্বাস পর্যন্ত হারাইয়া
বসিয়াছেন । তাঁহারা প্রথমে সেই দলে মিশ্রিত হইয়া আপন
আপন বিশ্বাস ও আস্তিকতা গোপন করতঃ উদারতার পরিচয়
দিতেন, সেই দলের প্রকৃত অভাব উন্মোচনের চেষ্টা ও
কামনা না করিয়া অজ্ঞান বিষয়ে তাঁহাদের সঙ্গে আলাপ করি-
তেন ; বন্ধুতার অনুরোধে কোন দিন তাঁহাদের সঙ্গে একত্র বাস
করিলে, তাঁহারা যে প্রতি প্রাতঃ সন্ধ্যায় উপাসনা করেন,
তাহার পরিচয় দিতে লজ্জিত হইতেন । হয়ত তাঁহাদের উপা-
সনা সে সময়ে স্থগিত রাখিতে হইত, নয়ত তাঁহাদের নাস্তিক
বন্ধুরা জানিতে না পারে, এমন স্থানে কোন ছপে নির্জন হইয়া,
সংক্ষেপে কার্য সম্পন্ন করিতেন । এইরূপে লজ্জিত ও সঙ্কুচিত
হইতে হইতে ক্রমে উপাসনার দায় হইতে মুক্ত হইয়া বসিয়াছেন,
এবং বিশ্বাস পর্যন্ত শিথিল হইয়া পড়িয়াছে । প্রকৃত ব্রাহ্ম যিনি,
তিনি কখনও আপনার ধর্ম ও বিশ্বাসের জন্ত লজ্জিত হন না ।
তিনি যে উপাসনা করেন, তাহা তিনি কাহাকেও দেখাইতে চান
না, কাহাকেও গোপন করিতে চান না । তিনি সর্বত্র আপনার
আস্তিত্ব রক্ষা করিতে সক্ষম হন । তিনি যেখানে যাউন, যেখানে
থাকুন, প্রয়োজন স্থলে, আপনার বিশ্বাস ও ভাব ব্যক্ত করেন ;
উপাসনার সময় উপস্থিত হইলে, উপাসনার জন্ত অবকাশ গ্রহণ

করেন। যাঁহারা এইরূপে সর্বত্র আপনার অস্তিত্ব রক্ষা করিতে না পারেন, তাঁহারা অবিশ্বাসী নাস্তিক দলে মিশিবার উপযুক্ত লোক নহেন। যাঁহারা নাস্তিকের সহবাসে কিয়ৎ পরিমাণে নাস্তিক হইয়া যান, পৌত্তলিকের সহবাসে কিয়ৎ পরিমাণে পৌত্তলিক ভাবে পরিচিত হন, তাঁহারা অল্প দলে মিশিবার সময় যথেষ্ট পরিমাণে সতর্ক হইবেন।

আমাদের মধ্যে একদল লোক আছেন, যাঁহারা বলেন যে, হিন্দু সমাজের মতে কিয়ৎ পরিমাণে না চলিলে হিন্দু সমাজকে ব্রাহ্মসমাজের দিকে আকর্ষণ করা যায় না। তাঁহারা ব্রাহ্মের স্থানে দণ্ডায়মান হইয়া হিন্দু সমাজকে আকর্ষণ করিতে চান না; কিন্তু কিয়ৎ পরিমাণে হিন্দুর মত হইয়া হিন্দু সমাজকে আকর্ষণ করিতে চান। ইহা সেই দলের সরল বিশ্বাস হইতে পারে; কিন্তু এই বিশ্বাসের মূলে গায়া মোহের আধিপত্য রহিয়াছে, এবং ইহা কিয়ৎ পরিমাণে সেই গায়া মোহের হস্তে সংশ্লিষ্ট হইয়াছে। যত দিন তাঁহারা এই ভাবে কার্য্য করিতে থাকেন, তত দিন ইহা নিশ্চয় যে, তাঁহারা সংসারের ক্রীড়ার সামগ্রী হইয়া তাহার হস্তে নিয়মিত হইতেছেন। হিন্দুসমাজের ঘৃণিত হইলে, হিন্দুসমাজকে আকর্ষণ করা যায় না,—যখন তাঁহারা এইরূপ মনে করিয়া কার্য্য পছন্দ অবলম্বন করিতেছেন, তখন প্রথমতঃ তাঁহারা লক্ষ্যভ্রষ্ট হইতেছেন। হিন্দুসমাজের ঘৃণা হইতে অব্যাহতি লাভ করা, বা হিন্দুসমাজকে আকর্ষণ করা কাহারো জীবনের লক্ষ্য হইতে পারে না; আমাদের মত ও বিশ্বাস অনুসারে আমাদের সাংসারিক, পারিবারিক, সামাজিক ও আধ্যাত্মিক জীবনকে সংগঠন করাই আমাদের সর্বোচ্চ লক্ষ্য। তৎপরে আমরা আপ-

নার স্থানে অচ্যুতপদে দণ্ডায়মান হইয়া প্রতিবাসীদিগকে সেই স্থানে আকর্ষণ করিব। যাহাদের এইরূপ দাঁড়াইবার স্থান নাই, তাঁহারা কাহাকে কোথায় আকর্ষণ করিয়া আনিবেন? হিন্দু সমাজের প্রবল প্রভাব যাহাদিগকে ব্রাহ্মের স্থানে অচ্যুত রাখিতে পারিল না, তাঁহাদিগকে সেই স্থান হইতে অনায়াসে ব্রষ্ট করিয়া আপনার সন্নিধানে টানিয়া আনিতে কিয়ৎ পরিমাণে সক্ষম হইল; তাঁহারা যেন হিন্দুসমাজকে আকর্ষণ করিবার কথা মুখে না আনেন। সেই টানে পড়িয়া হিন্দুসমাজের দিকে ভ্রাসিয়া যাইবার সময় তাঁহারা হিন্দুসমাজের নৈকট্য অনুভব করিয়া মনে করিতে পারেন যে, তাঁহারা হিন্দুসমাজকে আপনাদের দিকে আকর্ষণ করিতেছেন; কিন্তু বস্তুতঃ মোহের প্রভাব বশতঃ ভ্রম প্রযুক্ত সেইরূপ মনে করিতেছেন। সত্য কথা এই যে, হিন্দুসমাজ আপনার স্থানে স্থির থাকিয়া তাঁহাদিগকে কবলস্থ করিবার জন্ত আপন সন্নিধানে আকর্ষণ করিয়া আনিতেছেন। আমাদের মধ্যে যাহারা এই ভ্রমে নিপতিত হইয়াছেন, তাঁহাদের ধর্ম-তত্ত্ব আর বর্দ্ধিত হইতেছে না। হিন্দু সমাজকে সমুদ্র করাই তাঁহাদের প্রধান লক্ষ্য। যাহাকে আকর্ষণ করিতে গেলাম, পুনঃ সঙ্স্কার করিতে গেলাম, যদি তাঁহার মনস্তপ্তি সাধন করাই প্রধান কার্য্য করিয়া লইলাম, তবে আমাদের ধর্ম-তত্ত্ব বর্দ্ধিত হইবে কিরূপে? হিন্দু সমাজের প্রবল ছায়ায় ভিতরে নবাকুরিত ব্রাহ্ম-ধর্ম কি বর্দ্ধিত হইতে পারে? তাহার ঘনচ্ছায়ার নিম্নে পড়িয়া ইহার প্রাণ শুষ্ক হইতেছে।


ব্রাহ্ম যদি কাহাকেও আকর্ষণ করিতে চান, তিনি স্বস্থানে স্থির হইয়া চেষ্টাপর হউন। স্বস্থানে দৃঢ় না হইয়া আকর্ষণ

করিতে গেলে, আকৃষ্ট হইবারই অধিকতর সম্ভাবনা। ব্রাহ্ম নাস্তিকের সঙ্গে মিশিতে পারেন, সমস্ত ধর্ম্মাবলম্বীর সঙ্গে সংসর্গ করিতে পারেন, তাঁহাদের সাধন প্রণালীর তত্ত্ব অবগত হইতে এবং আশ্রয় করিতে পারেন ; কিন্তু এ সমস্ত আপনার স্থানে স্থির থাকিয়া চেষ্টা করিলে লাভবান হইবেন, নচেৎ সমূহ অনিষ্টের সম্ভাবনা। তুমি ব্রাহ্ম-সমাজ-চূড়ামণিই হও আর যে কেউ হও, তুমি স্বস্থানে সুদৃঢ় হইয়া পৌত্তলিক পরিবারে কত্কা সম্প্রদান করিবার জন্ত যদি প্রয়াসী হও, আমরা তোমার স্বাধীন প্রয়াসের জন্ত তোমাকে তত দোষ দিই না ; কেন না, কত্কার ইষ্টকাম হইয়া একজন সে প্রয়াসকে অন্তরে পোষণ করিতে পারেন। আমাদের দোষ দিবার কারণ তখনই উপস্থিত হয়, যখন তুমি আপনার স্থানে সুদৃঢ় হইয়া বিবাহ দিতে কৃত সঙ্কল্প না হইয়া, ব্রাহ্মের স্থান হইতে বিচ্যুত হইয়াও সে প্রয়াস চরিতার্থ করিতে পশ্চাৎপর না হও। যদি তুমি প্রথমতঃ রাজবিধি সম্বন্ধে আপনার স্থান ছাড়িয়া দেও, তৎপরে একটা একটা করিয়া তোমার সকল হুর্গ ছাড়িতে থাক ; যে পৌত্তলিক পরিবারের সঙ্গে তোমার কত্কার বিবাহ দিতে গেলে,—যে নিম্ন ভূমিতে সেই পৌত্তলিক পরিবার অবস্থিতি করিতেছেন, সেই স্থানে নামিয়া গিয়া তোমাকে কত্কা সম্প্রদান করিতেইহক। সেস্থলে তোমার ব্রাহ্মোচিত অনুষ্ঠান কোথায় রক্ষা হইল ? তুমি কি দেখিতেছ না, সেই বিবাহানুষ্ঠানে তোমাকে আকাশ হইতে পাতালে নামিতে হইল, অত্যাচ্ছ পর্কত-শৃঙ্গ হইতে উপত্যকা ভূমিতে অবতরণ করিতে হইল ?

ব্রাহ্ম ! সম্মুখে বড় বড় পতন দেখিয়া তোমার ক্ষুদ্র প্রাণ কি কাঁপিতেছে না,—তোমার স্নায়ুশৃঙ্খল কি স্পন্দিত হইতেছে না ?

অচ্যুতপদে প্রতিষ্ঠিত হইতে না পারিলে, তোমার পতনের আশঙ্কা দূর হইতেছে না। তুমি পরিবর্তনশীল মায়া মোহের জীড়া-কানন এই সংসার হইতে প্রস্থান কর, ব্রহ্ম-চরণ ধারণ করিয়া সেই অমৃত লোকে আপনার বাসস্থান নিশ্চয় কর, ব্রহ্মের অবি-প্রাপ্ত ইচ্ছাশ্রোতে ভাসিয়া যাইবার চেষ্টা কর; তাহা হইলে প্রকৃত অচ্যুতপদ লাভ করিতে পারিবে, নচেৎ সংসারের মোহময় পিচ্ছল পথে থাকিয়া কতদিন পা টিপিয়া টিপিয়া সতর্ক ভাবে চলিতে পারিবে? কে জানে কোন্‌দিন স্থলিত-পদ হেতু তোমার শোচনীয় পরিণাম দৃশ্য লোকের চক্ষুর সমক্ষে ধারণ করিবে? যে রাজ্যে মৃত্যু নাই, সেখানে গিয়া অমর হও,—চির জীবনের মত মৃত্যু ভয় হইতে মুক্তি লাভ কর।





অষ্টম পরিচ্ছেদ ।

ভাবান্ধগঠন ।*

আত্মপূর্ণ নিগূঢ়ভাবের মধ্যে পরব্রহ্মের স্বরূপ সাক্ষাৎ উপ-
লব্ধ হয় । শুদ্ধ বিশ্বাস ব্রহ্মের স্বরূপ প্রকাশ করিতে পারে না ।
শুদ্ধ ভাবও সেইরূপ ব্রহ্মের স্বরূপ প্রকাশ করিতে পারে না ।
শুদ্ধ বিশ্বাস শুদ্ধ ;—তাহা শূন্যকে শুদ্ধতা দ্বারা পরিপূর্ণ করে,
তন্মধ্যে প্রাণ পরিতৃপ্ত হয় না, কেবল নীরস দৃশ্যই উপলব্ধ হয় ।
শুদ্ধ ভাব অন্ধ ;—তাহা শূন্যকে আনন্দরসে পরিপূর্ণ করে ; কিন্তু
তন্মধ্যে ব্রহ্মদর্শন হয় না, কেবল কবিত্বভাবই উপলব্ধ হয় । যখন
বিশ্বাস ও ভাবের মণিকাঞ্চন যোগ, তখনি ব্রহ্ম-সাক্ষাৎকার লাভ ।
এ বিশ্বাস বুদ্ধি ও যুক্তির মীমাংসা নহে ; আন্তরিক ভাবের মধ্যে
নিমগ্ন হইয়া পুনঃ পুনঃ সেখানকার অদ্ভুত দৃশ্য দেখিতে দেখিতে
এ বিশ্বাস উৎপন্ন ও বর্দ্ধিত হয় । ভূয়োদর্শন সেই চমৎকার
দৃশ্যকে অল্পে অল্পে ব্রহ্ম-দর্শনে পরিণত করে । এইরূপে ক্রমে
ব্রহ্ম দর্শন পরিষ্কার ও পরিচ্ছন্ন হইতে থাকে । ভাব হইতে
বিশ্বাসের উৎপত্তি ও পরিপুষ্টি । যাহা এক সময়ে আনন্দ-রসপূর্ণ
কবিত্ব ছিল, তাহা ক্রমে ব্রহ্ম-সাক্ষাৎকারে পরিণত হইল । ভাব
যত নিগূঢ় ও গভীর হইতে থাকে, ব্রহ্মস্বরূপ তত উজ্জ্বল ও ঘনীভূত
হইয়া অন্তরাকাশে প্রকাশিত হইতে থাকে । যে বিশ্বাস শুদ্ধ

বুদ্ধির ও যুক্তির মীমাংসা,—যে ভাব শুদ্ধ কবিত্ব রসে পরিপূর্ণ, তাহা সাধকের প্রথম অবলম্বন । তাহা কদাপি উপেক্ষণীয় বা পরিত্যজ্য নহে । সেইরূপ তাহা কদাপি চিরাবলম্বন বা শেষ গতিও নহে ।

উপরে যে ভাবের কথা উত্থাপিত হইয়াছে, তাহা সহজে বর্ণনীয় নহে । উপাসনার সময় আমাদের অন্তরে মধ্যে মধ্যে ভাবের উদ্বেক হয় । সে ভাব কি ?—আমরা গুণের পরিচয়ে তাহার এক প্রকার বর্ণনা করিতে পারি । তাহা সরস, নির্মল, চমৎকার ও আনন্দপূর্ণ । তাহা হৃদয়ের কঠোরতা দূর করে, অন্তরকে কোমল ও বিনীত করে, চিত্তকে প্রশস্ত ও প্রফুল্ল করে, প্রাণকে পরিতৃপ্ত করে । তাহা আত্মাকে প্রেম, অমুরাগ, সদিচ্ছা ও উচ্চাশাতে ভূষিত করে,—তাহা নীচতা, ক্ষুদ্রতা ও পাপকে ঘৃণা করে এবং স্বভাবতই আপন অপেক্ষা উচ্চতর, মহত্তর আশ্রয় স্থান অন্বেষণ করে । ইহাই “ভাব,”—বর্ণনাদ্বারা এই পর্য্যন্ত ইহাকে নির্দেশ করা যাইতে পারে । ইহা প্রতীতি করিবার বিষয়, কিন্তু বর্ণনার বিষয় নহে । ইহাই যদি “ভাব” হইল, তবে এ কথা নির্বিরোধে উক্ত হইতে পারে যে, “ভাব” আর কিছুই নহে, কেবল আত্মার অক্ষুৰ্ত্ত উচ্চ প্রকৃতির সাময়িক উচ্ছ্বাসমাত্র—তাহার অন্তর্নিহিত নির্মল স্বরূপের আভাস মাত্র ।

আমরা এখন পরিষ্কার রূপে বুঝিতে পারিব,—ব্রহ্ম দর্শন হয়, আত্মার অক্ষুৰ্ত্ত উচ্চ প্রকৃতির উচ্ছ্বাস মধ্যে—তাহার অন্তর্নিহিত নির্মল স্বরূপের ক্ষুৰ্ত্তি মধ্যে । আত্মজ্ঞানের সঙ্গে ব্রহ্মজ্ঞানের সম্বন্ধ এই স্থানে । আত্ম-দর্শন ভিন্ন ব্রহ্ম-দর্শন হয় না, ইহার তাৎপর্য্য এখন সহজ হইল । আত্মার উচ্চ প্রকৃতির সাক্ষাৎ

দর্শন ভিন্ন ব্রহ্মস্বরূপ পরিলক্ষিত হয় না। ভাব-যোগই ব্রহ্ম দর্শনের একমাত্র সাধন।

আত্মার উচ্চ প্রকৃতির উচ্ছ্বাসকে উচ্চ স্থানে রাখিলে চলিবে না, ইহাকে আয়ত্ত করিতে হইবে,—ইহাকে “করতল অন্ত আমলক বৎ” করিতে হইবে। তত্ত্বিন্ন ব্রহ্মদর্শন চিরস্থায়ী হইবার সম্ভাবনা নাই।

এই উচ্চ প্রকৃতির উচ্ছ্বাসকে স্থায়ীরূপে আয়ত্ত করা সহজ-সাধ্য নহে। এই গগন-বিহারিণী বিভ্রান্ততাকে স্থির-সৌদামিনী রূপে ধরিয়া রাখিবার একমাত্র উপায় আছে। সে উপায়টি সাধন। বাস্তবিক সাধন অসম্ভবকে সম্ভব করিতে পারে, চঞ্চল সৌদামিনীকে অচঞ্চল করিতে পারে। সাধনের অসাধ্য কিছুই নাই। সাধনে ভাবান্ধ ক্রিপে সংগঠিত হয়, আমরা সাধ্যানুসারে তাহার সন্ধান বিবৃত করিবার চেষ্টা করিব।

ক্রোধ আমাদের একটি মনোবৃত্তি। দেখা যায় ক্রোধের একটি অন্তরঙ্গ আছে, আর একটি বহিরঙ্গ আছে। ক্রোধের অন্তরঙ্গ, যাহা আমরা অন্তরে উপলব্ধি করি, তাহা অন্তরের সীমা অতিক্রম করে না। কিন্তু ক্রোধের বহিরঙ্গ অন্তর হইতে বহির্মুখ হইয়া শরীরের মধ্যে স্ফূর্তিত হয়। সেই বহিরঙ্গ মুখ ও চক্ষুর আরক্ত বর্ণে, শিরার অভ্যন্তরস্থ রক্তের উষ্ণতাতে ও অপরাপর অঙ্গভঙ্গি দ্বারা প্রকাশিত হয়। যখন ক্রোধের বিরাম হয়, তখন অন্তর হইতে ক্রোধের অন্তরঙ্গ এবং শরীর হইতে ক্রোধের বহিরঙ্গ উভয়ই অন্তর্হিত হয়। মনোমধ্যে ক্রোধের উদ্বেকই ক্রোধের অন্তরঙ্গ। সে উদ্বেক না হইলে ক্রোধের বহিরঙ্গ শরীরে স্ফূর্তি পায় না। যদি মনোমধ্যে পুনঃ পুনঃ ক্রোধের উদয় হইতে

থাকে, যদি কোন ব্যক্তিকে ক্রোধের ভাবে অহরহ থাকিতে হয়, তাহা হইলে তাহার ক্রোধের বহিরঙ্গটী সংগঠিত হইয়া যায়, এবং তাহার শরীর মধ্যে তাহা স্থায়ীরূপে প্রোথিত হইয়া থাকে। তখন ক্রোধের বাহ্য মূর্তি সেই ব্যক্তির সর্বদা মূর্তিমান হইয়া থাকে। তাহার ক্রোধ তখন কথায় কথায়। লোকে তখন তাহাকে অত্যন্ত ক্রোধী বলিয়া অভিহিত করে। ক্রোধের বহিরঙ্গটী নির্মিত হইলে ক্রোধ তখন আমাদের প্রকৃতির মধ্যে জিনিয়া বসিল।

এইরূপ সমস্ত ভাব ও বৃত্তির এক একটী অন্তরঙ্গ ও এক একটী বহিরঙ্গ আছে। যখন অন্তরে উপাসনার ভাবের উদয় হয়, তখন তাহার একটী বহিরঙ্গও সেই সঙ্গে সঙ্গে প্রকাশিত হয়। মুখমণ্ডল পূর্ণ ও উজ্জ্বল হয়, চক্ষু প্রেমাক্ষ বর্ষণ করে, হৃৎ-কোষ উদ্বেলিত হয়, শ্বাসরোধ হইয়া আসিতে থাকে, কণ্ঠস্বর গদগদ হয় এবং অনেক স্থলে রোমাঞ্চ, জ্বন্তন, ঘর্ষ প্রভৃতি সাত্ত্বিকভাবের লক্ষণ সমূহ পরিদৃশ্যমান হয়। ভাবের গাঢ়তা অনুসারে এইরূপ নানাবিধ লক্ষণ আবির্ভূত হইবার কথা শুনা যায়। যাহা হউক, ইহা নিঃসংশয় যে, প্রেম ভক্তির কতকগুলি বাহ্য লক্ষণ আছে। অহরহঃ উপাসনার ভাবে ডুবিয়া থাকিলে, সেই সমস্ত বাহ্য লক্ষণ শরীরে বদ্ধমূল হইতে থাকে। এইরূপে উপাসনার ভাবের বহিরঙ্গ সংগঠিত হয়। যখন উপাসনার ভাবের বহিরঙ্গ মূর্তিমান হইয়া শরীরের মধ্যে স্থায়ী হয়, তখন অন্তর মধ্যে সেই বহিরঙ্গ অবলম্বন করিয়া উপাসনার ভাব তাহার অন্তরঙ্গ রূপে ক্রীড়া করিতে থাকে। সাধকের যাহা অন্তরঙ্গ, পরব্রহ্মের তাহা বহিরঙ্গ। তিনি তন্মধ্যে অহরহঃ আবির্ভূত থাকেন।

প্রকৃত সাধক যিনি, তিনি অহরহঃ তাঁহার ভাবের অন্তরঙ্গের মধ্যে তাঁহার ব্রহ্মকে অহরহঃ দর্শন করেন। এই ভাবান্ধ সংগঠিত হইলেই সেই অধ্যাপক তন্মধ্যে ধৃত হন, সেই অপ্রাপ্য ধন তন্মধ্যে লব্ধ হন,—আকাশের চঞ্চলা চপলা অচঞ্চল অচপল হইয়া থাকেন।

আমাদের ঈশ্বর বহু সাধনের ধন। “সাধন বিনা সে ধন মেলে না।” কিন্তু কি রূপ সাধনে তাঁহাকে লাভ করা যায় ? “উপাসনার ভাবে অহরহঃ থাক”—এই আদেশ, এই উপদেশ, এই মন্ত্র, এই সাধন। সাধনের অর্থ আর কিছুই নহে, কেবল একটী বিষয়কে সাধিয়া আয়ত্ত করা। ব্রহ্মসাধক কে ?—যিনি ব্রহ্মকে সাধিয়া আয়ত্তীভূত করিয়াছেন। কিন্তু উপাসনার ভাবে অহরহঃ অধিবাস করিয়া ভাবান্ধ সংগঠন না করিলে, কেহ প্রকৃত সাধক বা সিদ্ধ হইতে পারেন না।

এই ভাবান্ধ সংগঠিত হইলেই সাধনের পর্য্যাপ্তি হইল না। এই ভাবান্ধ পরিবর্তনহীন। ইহা ক্রমেই ঘনীভূত হইতে থাকে, এবং সেই সঙ্গে সঙ্গে ব্রহ্মদর্শনও ঘনীভূত হইতে থাকে। এই ভাবান্ধ সংগঠিত না হইলে, সাধক অচ্যুতপদ লাভ করিতে পারেন না।

ভাবের বহিরঙ্গ কোথা হইতে সংগঠিত হয় ?—ভাবের অন্তরঙ্গ হইতে। ভাবের অন্তরঙ্গ কোথা হইতে সংগঠিত হয় ?—ঈশ্বরের আবির্ভাব হইতে; ঈশ্বরের আবির্ভাবের আলোকে ভাবের অন্তরঙ্গ আবির্ভূত হয়। ঈশ্বরের আবির্ভাব হইতেই ভাবের উৎপত্তি,—সেই আবির্ভাব হইতেই তাহার পুষ্টিসাধন। ঈশ্বর যে রূপ ভাবের প্রাণ, ভাবও সেইরূপ তাহার বহিরঙ্গের প্রাণ।

ভাবের উচ্ছ্বাস হইতে সেই বহিরঙ্গের উৎপত্তি ও পুষ্টিসাধন হয়। যেরূপ পরমাত্মা হইতে আত্মা, এবং আত্মার অধিষ্ঠান প্রযুক্ত শরীর সমুৎপন্ন হয় এবং সমুৎপন্ন হইয়া তিন একত্রে ও ঘনিষ্ঠযোগে যুক্ত হয়, সেইরূপ আত্মাতে পরব্রহ্মের আবির্ভাব হইতে ভাবোচ্ছ্বাস এবং ভাবোচ্ছ্বাস হইতে ভাবের বাহ্যমূর্তি প্রকাশিত হয়; এবং প্রকাশিত হইয়া তিন একত্র ও ঘনিষ্ঠ-যোগে যুক্ত হয়। যে পরিমাণে আত্মাতে পরমাত্মার আবির্ভাব প্রকাশিত হয়, সেই পরিমাণে ভাব অন্তরে দীর্ঘকাল স্থায়ী হয়, এবং যে পরিমাণে ভাব অন্তরে দীর্ঘকাল স্থায়ী হয়, সেই পরিমাণে ভাবের বহিরঙ্গ সংগঠন সুসম্পন্ন হইতে থাকে। যখন ভাবের বহিরঙ্গের সংগঠনটা সুসিদ্ধ হয়, তখন ভাবের বিরাম নাই, অন্তর মধ্যে নিরবচ্ছেদ ভাবের তরঙ্গ ক্রীড়া করিতে থাকে, এবং সেই তরঙ্গ-ক্রীড়ার প্রাণস্বরূপ ব্রহ্মাবির্ভাব তাহার অন্তর্গত হইয়া বিরাজ করিতে থাকে। যখন ভাবের এই বহিরঙ্গটা দাঁড়াইয়া গেল, এখন সেই যুক্তত্রয়ের স্বতন্ত্র থাকা ও বিচ্ছিন্ন হওয়া নিতান্ত অসম্ভব।

ভাবের উচ্ছ্বাস ঈশ্বরের আবির্ভাব হইতে,—এ কথায় অনেকের মনে সংশয় উপস্থিত করিবে। এ সংশয় উপস্থিত হইলে কোন যুক্তি তর্কে তাহা দূর হইবার নহে। সে সংশয় দূর হয়, কেবল ভূয়োদর্শনে অন্তর্দৃষ্টি উজ্জ্বল হইলে সে সংশয় আপনা হইতেই ছেদ হইয়া যায়। ঐ সংশয় ভূয়োদর্শনের অসম্ভাব হইতে সমুৎপন্ন হয়; সুতরাং প্রথম প্রথম তাহার উৎপত্তি অপরিহার্য। ভাব-বাদের পরিণাম ভাবের অভ্যন্তরে বস্তু দর্শন। ভাব-বাদ হইতে বস্তুবাদে উপনীত হইতে

কেবল সময়ের অপেক্ষা করে । বস্তুতঃ ঈশ্বরের আবির্ভাব ভিন্ন ভাবের উচ্ছ্বাস হয় না, আত্মার অক্ষুৰ্ত্ত উচ্চ প্রকৃতি প্রতিভাত হয় না । যে পদ্য অন্ধকার গর্ভে মুদিত ছিল, তাহা কেন সহসা প্রস্ফুটিত হইয়া হাসিল ? যাহার চক্ষু ফুটিয়াছে, তিনি বলিবেন যে, সেই পদ্যকে সূর্য্যাকিরণ স্পর্শ করিয়াছে । অগ্রত ভক্ত জানেন যে, তাঁহার হৃদয়পদ্য সেই প্রেম-সূর্য্যের কিরণ স্পর্শ না হইলে প্রস্ফুটিত হয় না । নিদ্রিত ভাবকে জাগাইবার আর কাহারো শক্তি নাই, আত্মার অক্ষুৰ্ত্ত উচ্চ প্রকৃতিকে ক্ষুৰ্ত্তিদান করিতে আর কাহারো সাধ্য নাই ।

ঈশ্বরের আবির্ভাব ভিন্ন ভাবোচ্ছ্বাস হয় না, এবং ভাবোচ্ছ্বাস ভিন্ন ভাবের বহিরঙ্গ প্রকাশ পায় না ; কিন্তু ভাবের নুন্নিত্যতা সংগঠিত না হইলে, ভাব দাঁড়াইবার স্থল পায় না, এবং ব্রহ্মাবির্ভাবকে ধরিয়া রাখিতে পারা যায় না । এই বহিরঙ্গটি সংগঠন করিবার জন্ত, ঈশ্বরের আবির্ভাবকে পুনঃ পুনঃ অন্তরে ধারণ করিতে হইবে । এই উচ্চ দিক হইতে সাধন আরম্ভ হইলে, অবশিষ্ট আর সকলই সুচারু রূপে সম্পন্ন হয় । সেই জন্ত ঈশ্বরের দিক হইতে সাধন আরম্ভ হওয়া নিতান্ত আবশ্যক ; তাহা হইলে অল্পে অল্পে ভাবের বহিরঙ্গটি আয়ত্ত হইয়া যায় । ঈশ্বরের আবির্ভাবকে ছাড়িয়া কোন প্রকার কৌশলে এই বহিরঙ্গটি সাধিয়া আয়ত্ত করা সম্ভবপর হইলেও তাহাতে কোন কলোদয়ের সম্ভাবনা নাই । সে প্রকার বহিরঙ্গ মৃত-দেহ তুল্য, তাহাতে প্রাণ নাই, আত্মা নাই । যে বহিরঙ্গের মধ্যে ভাবের উচ্ছ্বাস নাই, ব্রহ্মের আবির্ভাব নাই । তাহা লইয়া কাহার কি লাভ হইবে ? তাহা দ্বারা সংসারে প্রতারণা চলে, কিন্তু ঈশ্বর

লাভ হয় না। ঈশ্বর-সাধক, একরূপ নীচ সাধনকে ছেঁয় জ্ঞান করেন। কিন্তু ইহা নিঃসংশয় যে, এই বহিরঙ্গটী স্থায়ীরূপে আয়ত্ত করিতে না পারিলে, ভাব দাঁড়াইবার স্থল পায় না, ঈশ্বরের আবির্ভাবও স্থায়ীরূপে বদ্ধমূল হয় না।

এই ভাবাঙ্গের সংগঠনকালে ভাবের বিরোধী ভাব সকলকে অন্তরে আতিথ্যদান করিলে, সে সংগঠনে ব্যাঘাত উপস্থিত হয়। এই সংগঠনকালে অন্তরে কাম ক্রোধাদি রিপুগণের পুনঃ পুনঃ উত্তেজনা হইলে এই ভাবাঙ্গ ভঙ্গ হইয়া যায়। অন্তরে যে রিপু যখন উত্তেজিত হয়, তাহার বহিরঙ্গটী সে সময়ে শরীরে প্রকাশ পায়। রিপুবিশেষ যে বহিরঙ্গ লইয়া প্রকাশিত হয়, ভাবাঙ্গের সঙ্গে তাহার কোন সম্বন্ধ নাই। সুতরাং ভাবাঙ্গ সংগঠনকালে যদি পুনঃ পুনঃ রিপু-বিশেষের উত্তেজনা হইতে থাকে, তাহা হইলে সেই ভাবাঙ্গের ভিত্তি নষ্ট হইয়া যায়। রিপুবিশেষ যে বহিরঙ্গ লইয়া দেখা দেয়, তাহা ভাবাঙ্গকে ছিন্ন বিচ্ছিন্ন করিয়া তাহার স্থানে আসিয়া সংস্থাপিত হয়; সুতরাং তাহার সমূহ ক্ষতি হয়। এই জন্ত নিকট বৃত্তি সকলকে সাধকেরা রিপু-নামে অভিহিত করিয়াছেন।

সংসারের কার্য্যক্ষেত্রে সাধক যৎকালে অবস্থিতি করেন, তখন তাহার ভাবাঙ্গটী নিদ্রিত থাকে,—নষ্ট হয় না; কিন্তু এই ভাবাঙ্গকে অধিককাল নিদ্রা ঘাইতে দেওয়া বিধেয় নহে, তাহাতে তাহার পুষ্টিসাধনের ব্যাঘাত হয়, তাহাতে তাহাকে দুর্ব্বল ও জীর্ণ শীর্ণ করে। প্রকৃত সাধক তাহাকে সদা সর্ব্বদা জাগ্রত ও পুষ্ট করিতে থাকিবেন, তাহা হইলে ইহার সূচাক্ষ সংগঠন অতি সহজে সম্পন্ন হয়।

এই ভাবাজ একবার সংগঠিত হইয়া উঠিলে, আমাদের অন্তরস্থ রিপু সকল সাধক-হৃদয়ে আর মালিণ্যসঞ্চয় করিতে পারে না। তখন কামক্রোধাদির উত্তেজনার প্রকার পরিবর্ত্ত হইয়া যায়,—রিপুগণের রিপুত্ব তিরোহিত হয়। তখন কামের কামত্ব ও ক্রোধের ক্রোধত্ব অন্তর্হিত হয়। তখন এই রিপু সকল ভাবগত হইয়া এক এক নূতন মূর্ত্তি ধারণ করে। তখন “রিপু পরিচারিকা দল, আনন্দে মিলে সকল, অমুদিন করিবে সব সেবার আয়োজন”—এই মহাবাক্যের মর্শ্বগত নিগূঢ় তাৎপর্য্য জীবনে প্রত্যক্ষ হয়।

এই ভাবাজ সূচাক্ষু রূপে গঠিত হইলে, সংসারের কার্য্যক্ষেত্রে তাহা নিয়ত জাগ্রত থাকে। তখন সাধকের সমুদায় কার্য্য, চিন্তা ও ইচ্ছা, এই ভাবাজের অন্তরতম প্রদেশ হইতে নিঃসৃত হইতে থাকে। তখন জীবনের সমুদায় কার্য্য কোমল ও মধুর-ভাব ধারণ করে। আমরা অহরহঃ আক্ষেপ করি যে, উপাসনার সময় যে ভাব অন্তরে উদয় হয়, জীবনে তাহাকে খুঁজিয়া পাওয়া যায় না কেন? উপাসনার সময় হৃদয় বিনীত, কোমল, নম্র ও সন্তাব পরিপূর্ণ, এবং উপাসনার পর হৃদয় ঠিক তাহার বিপরীত। এই বৈষম্য দেখিয়া আমরাগিকে সর্ব্বদা কাঁদিতে হয়। এই বৈষম্য দেখিতে দেখিতে অনেকে অবিখ্যাসের সীমাতে গিয়া উপনীত হন। উপাসনার পর যদি আবার যে সে-ই হইলাম, তবে উপাসনার প্রয়োজন কি? তাঁহারা উপাসনাকালীন উচ্চ-ভাবকে জীবনে আয়ত্ত দেখিতে না পাইয়া, তাহাকে মনের কল্পনা বা জাগ্রত-স্বপ্ন বিবেচনা করেন। সাধনে এই মনের কল্পনা ও স্বপ্ন, সত্য রূপে প্রতিপন্ন হয়। কিন্তু সামান্য সাধনে তাহা

হয় না। ভাবাজ সংগঠিত হইলে সাধকের বহু দুঃখের কারণ এই বৈষম্য, কিয়ৎ পরিমাণে দূরীভূত হয়। তখন তাহার সমস্ত বাহ্য ব্যবহার তাহার অন্তরস্থিত গভীর ভাবের অবিকল অনুরূপ হইয়া প্রকাশিত হয়।

ভাবাজ সংগঠিত হইলে, তন্মধ্যে সমস্ত সজ্জাব অবস্থিতি করে এবং স্থল উপস্থিত হইলে দেখা দেয়। দয়া, প্রেম, ক্ষমা, বিনয়, স্বদেশনাশ্রয়, অপরিত্রাহণ, দাম্পত্য প্রণয়, ভ্রাতৃ স্নেহ, গুরুজন ভক্তি প্রভৃতি যাবতীয় সজ্জাব সেই ভাবাজের অন্তর্নিবিষ্ট থাকে, এবং প্রয়োজন উপস্থিত হইলে অতি সহজে হৃদয় হইতে বিগলিত হইয়া সুধাবর্ষণ করিতে থাকে, এবং যাহাদিগকে লক্ষ্য করিয়া তাহাদের উদয় হয়, তাহাদিগকে অমৃতে অভিষিক্ত করিয়া অন্তর্হিত হয়। যিনি প্রকৃত সাধক, তিনি এই ভাবের মধ্যে থাকিয়া কার্য্য করিতে চান। এই ভাবের অভাব থাকিলে তিনি কার্য্য করিয়া সুখী হন না। এই ভাবের অভাব থাকিলে, শুদ্ধ বাহিরের উৎসাহে কেহ অবিশ্রান্ত কার্য্য করিতে সক্ষম নহেন, করিলে অচিরেই দেহটি নষ্ট হয়।

ব্রাহ্মসমাজে যে দিন হইতে ভ্রাতৃত্ব কথটি প্রবিষ্ট হইয়াছে, প্রায় সেইদিন হইতেই ভ্রাতায় ভ্রাতায় বিরোধ উপস্থিত হইয়া ব্রাহ্মসমাজকে বিষম আন্দোলনে আন্দোলিত করিতেছে। এই বিসম্বাদী ব্যবহারের উৎপত্তির একমাত্র কারণ, আমাদের অন্তরে ভাবাজ গঠনের অভাব। এখন আমরা যদি কোন ভ্রাতাকে শাসন করিতে যাই, প্রকৃত ভাবে শাসন করিতে পারি না; অসুচিত কঠোরতা ও উগ্রতা আসিয়া অন্তরকে অধিকার করে। এই ভাবাজ সংগঠিত হইলে আমরা প্রেমের সহিত

শাসন করিতে পারিব, প্রেমের সহিত ভৎসনা করিতে পারিব, প্রেমের সহিত গ্রহণ করিতে পারিব, প্রেমের সহিত সমস্ত বাহ্য ব্যবহার করিতে পারিব। মধুর ভাবে যে শাসন করা যায়, ভৎসনা করা যায়, ইহা কেবল এই ভাব হইতেই সিদ্ধ হইতে পারে। মানুষ মানুষের ব্যবহারে যখন তাহার উপাশ্রয় দেবতার মাধুর্য্যভাব সাক্ষাৎ প্রত্যক্ষ করিবে, তখন তাঁহার স্বর্গীয় প্রেম ও স্নেহ তন্মধ্যে পরিপূর্ণ দেখিবে, তখন তাহার অন্তরে কোন বিসম্বাদী ভাব স্থান লাভ করিতে পারিবে না। এই ভাবান্ধই সংসারে প্রকৃত ভ্রাতৃ-ভাব আনয়ন করিতে পারে। শত্রুকে যে প্রেম করিবার কথা শ্রুত হওয়া যায়, তাহা এই ঘনীভূত ভাবান্ধ হইতেই সিদ্ধ হওয়া এক মাত্র সম্ভবপর। খৃষ্টের প্রাণ ভাবে মজিয়াছিল, তাই তিনি শত্রুদিগের জন্য প্রার্থনা করিতে পারিয়াছিলেন,—“পিতা ইহাদিগকে ক্ষমা কর, ইহারা ইহাদের অপরাধ জানে না।”



নবম পরিচ্ছেদ।

প্রকৃত আত্ম-দর্শন।*

মানুষ সচরাচর বহির্বিষয় ও বহির্ক্যাপার লইয়াই' ব্যস্ত। সে এই সকল বিষয় ব্যাপারের মধ্যে রুদ্ধ ও বদ্ধনেত্র হইয়া আছে। বাহিরের বিষয় সকল,—বাহিরের ঘটনা সকল তাহার দৃষ্টিকে এত দূর আকৃষ্ট ও অভিনিবিষ্ট করিয়া রাখিয়াছে যে, সে আপনার দিকে তাকাইবার অতি অল্পই সুযোগ ও অবসর প্রাপ্ত হয়। এ পৃথিবীতে প্রায় মনুষ্যমাত্রকেই এই বাহ্য সংসারসম্বন্ধে জাগ্রত, কিন্তু আত্মসংসারসম্বন্ধে নিদ্রাভিভূত বলিয়া বোধ হয়। মানুষ নানা বিষয়ের মগ্ন হইতেছে, নানা তত্ত্বের আলোচনা করিতেছে, ^{বিদ্যা} বিদ্যার চর্চাতে অভিনিবিষ্ট ও বিবিধ শাস্ত্রের জল্পনাতে অর্পিত রহিয়াছে ; কিন্তু আপনার বিষয় অতি অল্পই আলোচনা করে! এ পৃথিবীতে আত্মপ্রসন্ন অতি বিরল ; এবং যাহাদের মধ্যে আত্মপ্রসন্ন উপস্থিত হইয়াছে, তাঁহাদের মধ্যে অতি অল্প লোকেই আত্মালোচনাতে উপনীত হন, এবং যাহারা আত্মালোচনাতে উপনীত হইয়াছেন, তাঁহাদের মধ্যে অতি অল্প লোকেই প্রকৃত আত্মতত্ত্ব লাভ করেন। আত্মপ্রসন্ন উপস্থিত হইলে

বাহারা আত্মালোচনাতে প্রকৃত হন, তাঁহাদের মধ্যে অধিকাংশ নানা ভ্রান্তি ও সন্দেহবাদে উপনীত হন । ইহা কি সামান্য দুঃখের বিষয়, লোকে বাহু জগতের মুখচ্ছবি অহরহঃ দর্শন করিতেছে, অথচ আপনাকে আপনি দেখিতে পায় না ; এবং ইহা কি দুঃখের বিষয় নহে যে, বাহার বাহু বিষয়ের নানা তত্ত্বের মর্মজ্ঞ হইতেছেন, তাঁহারা আত্মতত্ত্বের মর্মজ্ঞ হইতে গিয়া নানা ভ্রান্তি ও সন্দেহ জালে জড়িত হইয়া শেষে অন্ধকার দেখিতে থাকেন । আত্ম-প্রশ্ন উপস্থিত হইলে নানা ভ্রান্তি ও নানা সন্দেহ উত্থাপিত হয় বলিয়া অনেক মহানুভব ব্যক্তি আত্মপ্রশ্ন একেবারে পরিহার পূর্বক বহির্বিষয় ও বহির্ব্যাপারে বদ্ধ থাকিবার উপদেশ দিয়াছেন ! একেত আত্মপ্রশ্ন অতি বিরল, তাহাতে আবার ইহাকে একান্ত পরিহার করিবার চেষ্টারও নিতান্ত অভাব নাই !

ইহা অবশ্য স্মৃতির বিষয় বলিতে হইবে যে, যদিও অতি পূর্বকাল হইতে আত্মপ্রশ্ন উদয় হইবার পথে নানা বাধা ও বিঘ্ন ; কিন্তু আমাদের মধ্যে আত্মালোচনার ঐকান্তিক অভাব নাই । ইহার প্রতিকূলে নানা আপত্তি, নানা প্রলোভনও নানা বাধা বিঘ্ন সবেও একাল পর্য্যন্ত মনুষ্য ইহার আলোচনা করিয়া আসিয়াছে । কিন্তু এই আলোচনার ফল যতই শুভপ্রদ হউক না, কিন্তু ইহা নিশ্চয় যে, ইহা দ্বারা আত্মদর্শন লাভ হয় নাই । বিবিধ দার্শনিক মতের অস্তিত্বই ইহার সাক্ষ্যদান করিতেছে । জড়বাদ, মার্যবাদ, সন্দেহবাদ প্রভৃতি, বিসম্বাদী মত, সকল প্রকৃত আত্ম-দর্শনের অভাবেরই পরিচয় প্রদান করিতেছে । দর্শনশাস্ত্রের সমুদায় ভ্রম এই অভাব হইতেই উৎপন্ন হইয়াছে । আপনাকে প্রকৃতরূপে দেখিবার সুযোগ পাইতেছে না বলিয়া নানা বুনির

নানা মত হইয়া দাঁড়াইয়াছে । আপনাকে প্রকৃতরূপে দেখিতে পাইলে, এই সকল দার্শনিক মত-ভেদের তাদৃশ স্থল থাকিত না ।

এই আত্মদর্শনের অভাব হইতে ধর্মসম্বন্ধীয় নানামতের সৃষ্টি হইয়াছে । যদি প্রকৃত আত্মদর্শন থাকিত, তাহা হইলে পুস্তকবদ্ধ অত্রান্ত শাস্ত্র-বিশেষ আবির্ভূত হইয়া স্বাধীন মনুষ্য জাতিকে মত-শৃঙ্খলে আবদ্ধ রাখিবার চেষ্টা হইত না, আপনার অন্তরেই সকলে অত্রান্তশাস্ত্র, রত্নময় জ্ঞান দেখিতে পাইত । যদি প্রকৃত আত্মদর্শন থাকিত, তাহা হইলে ব্যক্তি-বিশেষকে অত্রান্ত শাস্ত্রের অত্রান্ত ব্যবস্থাপক রূপে বরণ করিয়া তাঁহাকে স্বজাতির উপর অনুচিত কর্তৃত্ব প্রতিষ্ঠা করিতে দেওয়া হইত না, আপনার অন্তরের মধ্যেই নিত্য বর্তমান অত্রান্ত ব্যবস্থাপক ও অত্রান্ত নেতা প্রাপ্ত হইয়া তাঁহারই স্বর্গীয় হস্তে আপনাপন পোতের কাণ্ডার সমর্পণ করিয়া সকলে নিশ্চিন্ত হইতে পারিত । যদি প্রকৃত আত্মদর্শন থাকিত, তাহা হইলে মনুষ্যকে ভয় প্রলোভন দেখাইয়া সূশাসিত রাখিবার জন্ত মনঃক্লান্ত ক্লেশ হঃখের কালাগ্নিময় ভয়ানক নরক বা সূরা অপ্সরা পূর্ণ অশেষ সুখপ্রদ আরামময় স্বর্গের সৃষ্টি করিবার প্রয়োজন হইত না, আপনার অন্তর মধ্যে বিদ্যুৎ শাসনতন্ত্রের ক্ষুধা দেখিতে পাইত । যদি প্রকৃত আত্মদর্শন থাকিত, তাহা হইলে মনুষ্য-বিশেষকে মানব জীবনের পূর্ণ আদর্শ ও ঈশ্বরের বিশেষ অবতার স্বীকার করিয়া তাহাকে পূজার্চনা করিবার চেষ্টা হইত না, আপনার অভ্যন্তর মধ্যে পূজার্চনার প্রকৃত বিষয় সন্দর্শন করিয়া আপনার হৃদয়জাত বিমল প্রেম ভক্তি স্বদীর্ঘ চরণে নিরন্তর উপহার দিতে সমর্থ হইত । যদি প্রকৃত আত্মদর্শন থাকিত, তাহা হইলে মনুষ্যকে অশ্রুতি কোটি বোনি ব্রহ্ম

করিয়া পরিক্রান্ত ও উত্থাপ্ত হইতে হইত না ; কিন্তু অনন্ত উন্নতির সহজ ও পরিষ্কার পথ সম্মুখে দেখিয়া নির্ভয় হইতে পারিত ।

প্রকৃত আত্মদর্শন দার্শনিক চিন্তা ও আলোচনা দ্বারা লাভ করা যায় না । দার্শনিক চিন্তা ও আলোচনা একমাত্র চৈতন্য বা অন্তর্দৃষ্টির সাহায্যেই সম্পন্ন হইয়া থাকে । মনুষ্যের বর্তমান অবস্থায় সহজজ্ঞান ও বুদ্ধির জ্যোতিঃ আত্মার যে সমস্ত বিভাগে পতিত হয়, এই চৈতন্য বা অন্তর্দৃষ্টি দ্বারা তাহার অন্তর্গত বিষয় সকল আত্মার জ্ঞানগম্য হইয়া থাকে । কিন্তু মনুষ্যের বর্তমান অবস্থায় সহজজ্ঞান ও বুদ্ধির আলোক সকল দিক্ আলোকিত করিতে পারে না ; সুতরাং আত্মনিহিত অনেকানেক বিষয় মনুষ্যের বর্তমান অবস্থায় এই চৈতন্য বা অন্তর্দৃষ্টির অগ্রাপ্য ও অনধিগম্য হইয়া রহিয়াছে । মনুষ্যের বর্তমান অবস্থায় সহজজ্ঞান ও বুদ্ধি আত্মার সেই দিক্‌মাত্র আলোকিত করিতে কথঞ্চিত সমর্থ হইয়াছে,—যে দিকের সঙ্গে এই পৃথিবীর অস্থায়ী ও সাময়িক সম্বন্ধ । কিন্তু আত্মার যে দিক্ ঈশ্বর ও পরকালের দিকে, আমাদের সহজজ্ঞান ও বুদ্ধি সেদিকে এরূপ অলীক, মলিন ও অসম্পূর্ণ জ্যোতিঃ বিস্তার করে যে, আমাদের চৈতন্য বা অন্তর্দৃষ্টি সে দিকে কেবল নিবিড় কুজ্‌ঝটিকা বা অন্ধকারই দর্শন করিয়া থাকে । কিন্তু দার্শনিক চিন্তা ও আলোচনা আত্মার এদিক্‌কে যে একবারে অস্পৃশ্য রাখিয়াছে, তাহা নহে ; প্রত্যুত দর্শনশাস্ত্রে ঐশ্বরিক ও পারলৌকিক অস্তিত্বের ভূরি ভূরি মীমাংসা দৃষ্টিগোচর হয় । কিন্তু সেই সমস্ত মীমাংসা দেখিয়া বোধ হয় যে, মীমাংসকদিকের আদৌ প্রকৃত আত্মদর্শন হয় নাই, তদ্বারা কেবল অন্ধকারকে গাঢ়তর অন্ধকার করা হইয়াছে ।

প্রসাদ ঠিকই বলিয়াছেন, “বড়-দর্শন অন্ধশূল, দেয় লোকের চক্ষে ধূল।” বস্তুতঃ এই সকল দার্শনিক মীমাংসা দ্বারা মানুষের আভ্যন্তরিক চক্ষে ধূলি-নিষ্কেপ করা হইয়াছে।

এতদ্ব্যতিরিক্ত আমরাদিগের প্রাচীন যোগশাস্ত্র, ও আধুনিক তত্ত্ব, ইউরোপ ও আমেরিকার আধুনিক অধ্যাত্ম-তত্ত্ব, এবং উইলিম জুক্স প্রভৃতি পণ্ডিতগণের আধ্যাত্মিক শক্তিপুঞ্জের বর্তমান পরীক্ষা সকল, আত্ম-গর্ত-নিহিত যে সমস্ত অলৌকিক ও অক্ষুৰ্ত্তপূৰ্ব্ব শক্তি নিচয়ের কথা ব্যক্ত করে, যদি তন্মধ্যে কিছুমাত্র সত্য থাকে, তাহা হইলে ইহা অবশ্যই স্বীকার করিতে হইবে যে, আমাদের আত্মচৈতন্য বা অন্তর্দৃষ্টিমূলক দর্শনশাস্ত্র, আত্মার সে দিকের কোন সন্ধানই প্রাপ্ত হয় নাই, এবং কখনও যে প্রাপ্ত হইবে, তাহার কিছুমাত্র সম্ভাবনাও দেখা বাইতেছে না।

পার্শ্বিক সম্বন্ধ-জনিত দেশ, কাল, পাত্র ও অবস্থা বিশেষে আত্মাতে যে সমস্ত স্থানীয়, সাময়িক, লৌকিক ও আকস্মিক ভাবান্তর বা অবস্থান্তর সংঘটিত হয়, তাহার অনুভব, চিন্তা ও আলোচনা প্রকৃত আত্মদর্শন নহে। প্রকৃত আত্মদর্শন তাহা, বাহ্যতে আত্মার স্বরূপ প্রকাশ পায়, অর্থাৎ আত্মার মধ্যে বাহ্য কিছু সার্বভৌমিক, নিত্য, মুখ্য, তাহা এক সঙ্গে বা একত্রে প্রকাশ পায়। এরূপ আত্মদর্শন দার্শনিক চেষ্টার অতীত বিষয়। যখন মানুষের অন্তর্দৃষ্টিতে আত্মার সচ্চিদানন্দস্বরূপ প্রকাশ পায়, অনন্তের বীজ দর্শন হয়,—পরমাত্মার সঙ্গে আত্মার নিত্যযোগ, তাহার উপর তাহার নিরতিশয় নিত্য নির্ভর, তাহাতেই আত্মার নিত্য সফল ও নিত্য আরাম আবিষ্কৃত হয়; তাহার নিত্য কালেন্ন কামনা সকল, ভাব সকল, আশা সকল, ক্ষুধি পায় ;

ইহলোক ও পরলোকের সঙ্গে তাহার প্রকৃত সম্বন্ধ উদ্বোধিত হয়, তাহার জীবনের চরমাবস্থা ও পরিণামের ছবি উদ্দীপ্ত হয় ; তখনই মানুষের প্রকৃত আত্মদর্শন লাভ হয়। যেখানে প্রকৃত আত্মদর্শন, সেখানে সন্দেহ নাই, অবিশ্বাস নাই। প্রকৃত আত্মদর্শনে, জ্ঞান বিশ্বাস একত্র হয়। কেবল প্রকৃত আত্মদর্শনে কেন, যাবতীয় প্রকৃত দর্শনেই জ্ঞান ও বিশ্বাস এক হইয়া থাকে। এ বিশ্বাস অন্ধবিশ্বাস নহে,—চাঁকস প্রত্যক্ষজনিত স্থায়ী ও অটল বিশ্বাস।

এই আত্মদর্শন চিন্তা ও আলোচনা বা দার্শনিক পরীক্ষার অধিগম্য নহে। ইহা সরল প্রার্থীর প্রতি ব্রহ্ম-রূপার ফল। যখন সরল প্রার্থনার উত্তরস্বরূপ ব্রহ্ম-রূপার আলোক অন্তরে উদ্দীপ্ত হয়, তখনই আমাদের অন্তর্দৃষ্টি আত্মার অদৃষ্টপূর্ব মূর্তি আবিষ্কার করিয়া চমৎকৃত হয়। প্রকৃত আত্মদর্শন, ব্রহ্মকে অতিক্রম করিয়া প্রকাশ পায় না। কিন্তু ব্রহ্মাবির্ভাবের সঙ্গেই স্ফূর্তি পাইয়া থাকে। উপরের লিখিত আত্মার সমস্ত বিভাগ একেবারে স্ফূর্তি পায় না। প্রথমে, সেই অনন্ত সৃষ্টিদানন্দের ক্রোড়ে আত্মা, আপনার ক্ষুদ্র শিশুরূপ,—সেই অনন্তের গর্ভে এই অনন্তের ক্ষুদ্র বীজটী দর্শন করে, পরে আর আর সকলভাব সময়ে প্রকাশিত হয়।

যে দিন আত্মা আপনার দিকে তাকাইয়া তন্মধ্যে সেই অনন্তের বীজ প্রথম দর্শন করে, সেই দিন হইতে তাহার প্রকৃত নবজীবন আরম্ভ হয়। পূর্বে পার্থিবজ্ঞানের স্ফূর্তি হইয়াছিল, ক্রমে বয়োবৃদ্ধির সঙ্গে সঙ্গে পার্থিব সম্বন্ধ-জনিত আত্মসম্বন্ধীয় বাহ্য জ্ঞানও বিকাসিত হইয়াছিল, কিন্তু যে ভিতরিনে প্রকৃত

আত্মজ্ঞান বিকসিত হয়, সে দিন আত্মার পক্ষে যথার্থই নূতন জীবন। এ দিন হইতে একটি অভিনব পট আমাদের অন্তর মধ্যে খুলিতে আরম্ভ করিল। প্রত্যেক মনুষ্যকে এই শুভ দিনের সঙ্গে সাক্ষাৎ করিতে হইবে; দয়াময় ঈশ্বর প্রত্যেক লোকের জন্ত অবসর অন্বেষণ করিতেছেন। বাহ্যিক আত্মজ্ঞান দর্শনশাস্ত্রে পরিণত হইয়াছে, কিন্তু প্রকৃত আত্মজ্ঞান হইলে দর্শন-শাস্ত্রের নূতন পরিচ্ছেদ আরম্ভ হইবে।

আত্মজ্ঞানের তিনটিমাত্র উপায় আছে, (১) সহজ-জ্ঞান ও বুদ্ধির স্বাভাবিক আলোক এবং অন্তর্দৃষ্টি, (২) ব্রহ্মজ্যোতিঃ ও অন্তর্দৃষ্টি, (৩) পরীক্ষা ও অনুসন্ধান। এই উপায়ত্রয়ের একটিও পরিত্যজ্য নহে। এই উপায়ত্রয়ের প্রথম দুইটি, অন্তর্দৃষ্টি বা আত্মচৈতন্যমূলক। তৃতীয় উপায়টির সঙ্গে সেই অন্তর্দৃষ্টি বা আত্মচৈতন্যের কোন সম্বন্ধ নাই; তাহা বিজ্ঞান-মূলক অর্থাৎ প্রক্রিয়া বিশেষ অবলম্বন পূর্বক তাহার ফল পরীক্ষা সাপেক্ষ। প্রথম উপায়টি দ্বারা দর্শন-শাস্ত্র, দ্বিতীয় উপায়টি দ্বারা পরমার্থ তত্ত্ব, এবং তৃতীয় উপায়টির দ্বারা আত্মগত শক্তিপুঞ্জ আবিষ্কৃত হয়। প্রথম উপায়টির ক্ষুর্তি স্বভাবাসক্ত; দ্বিতীয় উপায়টির ক্ষুর্তি প্রার্থনা ও ব্রহ্ম-কৃপানুগত। তৃতীয় উপায়টি ক্ষুর্তি বৈজ্ঞানিক অনুসন্ধান সাপেক্ষ। যেখানে মনোযোগ অন্তর্দৃষ্টির অনুগত হইয়াছে, সেখানে প্রথম উপায়টি ক্ষুর্তি লাভ করিয়াছে। এই উপায়ের ক্ষুর্তির সঙ্গে সঙ্গে আত্মতত্ত্বসম্বন্ধীয় স্থূল স্থূল বিষয় জ্ঞানের অধিগম্য হয়। তখন আত্মার বহির্ব্যাপার, পটের ভ্রাম্য তাহার অন্তর্দৃষ্টির সম্মুখে খুলিতে আরম্ভ হয়। জ্ঞান, ভাব ও ইচ্ছার অশেষ তরঙ্গময়ী

শ্রোতস্বতী বিচিত্র লীলা প্রদর্শন করিতে করিতে তাহার অন্তরেত্বের সম্মুখে প্রবাহিত হইতে থাকে। সেই শ্রোতস্বতীর অশেষ তরঙ্গরাজ্য যে নিয়মের অনুবর্তী হইয়া চলে, তাহাদের পরস্পরের মধ্যে যে সম্বন্ধ বিরাজিত থাকে, স্থিরচিত্তে দেখিতে দেখিতে তাহাও আবিষ্কৃত হয়। কিন্তু সেই শ্রোতস্বতীর আভ্যন্তরিক ব্যাপার তৎকালের জ্ঞানের অনধিগম্য বা অস্পষ্ট-লব্ধ থাকে। গৃহমধ্যে যে সকল ক্ষুদ্রাণুপুঞ্জ উদ্ভীয়মান থাকে, তাহা মনুষ্যের স্বাভাবিক দৃষ্টিবাহুল্য বা অধিগম্য নহে; কিন্তু যখন গবাক্ষ মধ্য দিয়া সূর্য্য স্বকীয় কিরণ-জাল গৃহাভ্যন্তরে জলন্ত স্তম্ভের দ্বারা তির্য্যগ্ভাবে বিস্তীর্ণ করে, তখন সেই প্রসারিত কিরণস্তম্ভের সর্ব্বাঙ্গে ক্রীড়মান উদ্ভীপ্ত ক্ষুদ্রাণুপুঞ্জ মনুষ্যের দৃষ্টিতে প্রকাশিত হয়। সেইরূপ আত্মার গূঢ় আভ্যন্তরিক প্রদেশ আমাদের অন্তর্দৃষ্টির সমক্ষে সহজেই অপ্রকাশিত বা অস্পষ্টচিত্রিত থাকে। সহজ-জ্ঞান ও বুদ্ধির স্বাভাবিক আলোক সে প্রদেশকে সম্যক্রূপে উদ্ভীপ্ত ও আলোকিত করিতে পারে না; কিন্তু যখন ব্রহ্মজ্যোতিঃ আসিয়া সেই তমসচ্ছন্ন প্রদেশকে উজ্জলিত করে, তখনই তাহা অন্তর্দৃষ্টির সম্মুখে সুপ্রকাশিত হয়। এই ব্রহ্মজ্যোতিঃ আত্মজ্ঞানের দ্বিতীয় উপায় এবং প্রকৃত আত্মদর্শনের একমাত্র উপায়। যে উপায়ে প্রকৃত আত্মদর্শন ক্ষুণ্ণি পায়, তাহা প্রার্থনা ও ব্রহ্মরূপাসাম্পেক্ষ। প্রার্থনা আত্মার স্বাসত্যাগ, ব্রহ্মরূপা আত্মার স্বাগ্রহণ। চিত্ত-মধ্যে এই স্বাস প্রস্বাসের গতিবিধি হইতে থাকিলে, ব্রহ্মজ্যোতিঃ আত্মার আভ্যন্তরিক বিভাগকে তৎকালে উদ্ভীপ্ত করিয়া দেয়। আত্মা তদ্বারা আপনার প্রকৃত মূর্ত্তি দর্শন করিয়া আশ্চর্য্যাবিত

ও পুলকিত হয়। আত্মজ্ঞানের তৃতীয় উপায় পরীক্ষা। এই উপায়টি সর্বত্রই অবহেলিত, উপেক্ষিত ও অনাদৃত হইয়া থাকে। এই অভিশপ্ত উপায়টির অনুকূলে কথঞ্চিৎ আলোচনা করিলে, এখানে বোধ হয় অপ্রাসঙ্গিক হইবে না।

প্রথম উপায়টিকে যদি দার্শনিক নামে অভিধেয় করা যায়, দ্বিতীয় উপায়টিকে যদি “দৈবাধীন” অভিধানে উল্লেখ করা হয়, তবে এই তৃতীয় উপায়টি সর্বতোভাবে “বৈজ্ঞানিক” উপায় নামে অভিহিত হইতে পারে। জল অতি সামান্য ও সর্বত্র ব্যবহৃত পদার্থ। কতকাল পূর্বে ইহা মানুষের ব্যবহারে আসিয়াছে, কতকাল পূর্বে মানুষ ইহার সঙ্গে পরিচিত হইয়াছে; কিন্তু এই সামান্য পদার্থের অভ্যন্তরে যে সকল আশ্চর্য ক্ষমতা নিহিত ছিল, তাহা এতকাল পর্যন্ত কেবলই পরীক্ষার অভাবে মানুষের নিকট অপ্রকাশিত ছিল। পরীক্ষার অভাবে জল এতকাল তাহার মর্ম্মস্থ শক্তি ও রহস্ত কাহারো নিকটে প্রকাশ করে নাই। জল কলকল রবে প্রবাহিত হইবার সময় বাষ্পীকরণ ধারণ করিয়া আকাশমার্গে উঠিত হইবার সময়, সকলকেই বলিয়াছে, “ওহে ! আমি কেবল তোমাদের ভ্রম দূর করিবার জন্য সৃষ্ট হই নাই, কেবল তোমাদের শক্ত-ক্ষেত্রে সকল উর্ধ্বের করিবার জন্য উদ্ভিষ্ট হই নাই, কেবল তোমাদের নৌ-যানাদি পৃষ্ঠে বহন করিবার জন্য অবতীর্ণ হই নাই, আমার মধ্যে অসামান্য শক্তি নিহিত আছে ; কে আহ, পরীক্ষক হইয়া এস, আমি তোমাদিগকে আমার মর্ম্ম রহস্ত বলিয়া দিব।” ঊনবিংশ শতাব্দির পূর্বে কেহই জলের এই কৃৎসননিহ্ন এবং উৎখিত বাষ্পের এই ইজিতের তাৎপর্য্য বুঝিয়া

কবিতা সমর্থ হয় নাই। বাস্তবিক, বর্তমান সময়ের অশীতি বর্ষ পূর্বের কাহারো কল্পনাতেও আসে নাই যে, সেই পুরাতন সামান্য জল বাষ্পাকার ধারণ করিয়া ও ধাতু-কাষে রুদ্ধ হইয়া সহস্র সহস্র আরোহী বিশিষ্ট অর্গবোপাত বা শৃঙ্খলবদ্ধ শকটাবলী লইয়া নক্ষত্র বেগে অবিরাম গতিতে ছুটিতে পারে! এখন কে জানে যে, সেই সামান্য জলের অভ্যন্তরে ঈদৃশ আরো কত অদ্ভুত শক্তি নিহিত আছে? কে জানে জলের দ্বারা কত সামান্য ও সদা ব্যবহার্য পদার্থের অভ্যন্তরে কত অদ্ভুত ক্ষমতা নিহিত আছে এবং আপনাদের অভ্যন্তরিক গূঢ় রহস্য প্রকাশ করিবার জন্য সেই পদার্থ সকল সতৃষ্ণনয়নে উত্তর কালের মুখ প্রতীক্ষা করিতেছে? যদি পুরাতন সামান্য পদার্থের মধ্যে এক অদ্ভুত ক্ষমতা নিহিত থাকিতে দেখা যায়, তাহা হইলে আমাদের আত্মগর্ত্ত মধ্যে যে কত অদৃষ্ট ও অশ্রুতপূর্ব অত্যাশ্চর্য্য বহু নিমজ্জিত থাকিবে, তাহাতে আর সন্দেহ কি?

সুগভীর আত্মগর্ত্ত মধ্যে যে কোন নূতন রহস্য নিহিত থাকিতে পারে, বর্তমান সময়ের অধিকাংশ বৈজ্ঞানিক তাহার সম্ভাবনাতেও তাদৃশ আস্থা ও বিশ্বাস করেন না। এতদ্ভিন্ন এদিকে কোন বৈজ্ঞানিক পরীক্ষা ও অনুসন্ধান নিয়োজিত হইবার পক্ষে তাঁহারা নানা বাধা ও বিঘ্ন স্থাপন করেন। কোন কোন প্রসিদ্ধ বৈজ্ঞানিক এরূপ কুসংস্কারে যে, এদিকে কোন চেষ্টা নিয়োগ করিলে, তাঁহারা সেই চেষ্টাকে কুসংস্কার ও দ্ব্যস্তি-প্রণোদিত বলিয়া উপহাস করেন। ইহা বলা বাহুল্য যে, বৈজ্ঞানিকদিগের এ প্রকার ব্যবহার নিতান্ত অবৈজ্ঞানিক ও ভ্রান্তসংস্কারপ্রণোদিত। এ প্রকার ব্যবহার সত্যের অনু-

সন্ধান ও আবিষ্কার ও বিজ্ঞান শাস্ত্রের উন্নতির পথের সম্পূর্ণ অন্তরায় ।

কোন প্রস্তাব পরীক্ষার্থে উত্থাপিত হইলে, সহসা তাহাকে অসম্ভব বলিয়া উড়াইয়া দেওয়া, মানুষের একটা পুরাতন রোগ । বাহারা এরূপ ‘অসম্ভব’ বলিয়া কোন পরিমিত প্রস্তাব উড়াইয়া দেন, তাহাদের একথা স্মরণ রাখা কর্তব্য যে, বিজ্ঞান দ্বারা সংসারে অনেক ‘অসম্ভব’ ‘সম্ভব’ হইয়া গিয়াছে । বস্তুতঃ অসম্ভব রাজ্যকে ক্রমে ক্রমে সম্ভবে আনয়ন করাই, বিজ্ঞানের প্রধান উদ্দেশ্য । বর্তমান সময়ে বিজ্ঞানের উপর যে সাধারণের শ্রদ্ধা ও সমাদর আকৃষ্ট হইয়াছে, তাহা কেবল তদ্বারা অসম্ভবকে সম্ভব হইতে দেখিয়া । বর্তমান ঊনবিংশ শতাব্দীতে বিজ্ঞান, অসম্ভব প্রদেশে আপনার বিজয় নিশান উড্ডীয়মান করিতে সমর্থ হই-
 ত্তাছেন বলিয়াই, এই ঊনবিংশ শতাব্দীর নামে লোকের এত শ্রদ্ধা, ভক্তি ও আশ্চর্য্য ভাব উজ্জ্বলিত হইয়া উঠে । কয়েক বৎসর পূর্বে কে সম্ভবপর মনে করিতে পারিয়াছিল যে, ছুই ব্যক্তি পরস্পর সহস্র যোজন ব্যবধানে থাকিয়াও পরস্পরে নিকটস্থ ব্যক্তির শ্রাব্য কথোপকথন করিতে পারিবে ? হয়ত নিউটন ও ল্যাপ্লাসের শ্রাব্য অগাধ-বুদ্ধি ও প্রতিভাশালী ব্যক্তির নিকটও তাহা ‘অসম্ভব’ বলিয়া অনায়াসেই উপেক্ষিত ও অবহেলিত হইতে পারিত । কিন্তু এক্ষণে, অষ্ট শতাব্দীও গত হয় নাই, সেই চির-
 সিদ্ধান্ত ‘অসম্ভব,’ সর্বসাধারণের নিকট সম্পূর্ণ সম্ভব হইয়া দাঁড়াইয়াছে ।

∴ মানুষের মন স্বভাবতঃই চঞ্চল ; এমন কি, চঞ্চলা চপলা প্রপেক্ষাও চঞ্চল । সে কিছুতেই আপনাকে ধরা দিতে চাহে না ।

তাহাকে আয়ত্ত করিবার জন্ত যতই চেষ্টা কর না কেন, দেখিবে যে, সে স্বদূরে গিয়া তোমার প্রয়াসের প্রতি উপহাস করিতেছে । তুমি তোমার প্রিয়তম ঈশ্বরকে হৃদয়াসনে রাখিয়া পূজা করিতে চাহিতেছে, কিন্তু মনের কার্য্য দেখ, তোমার প্রিয়তমকে স্বর্গ হইতে আনিয়া তোমার হৃদয়-সিংহাসনে বসাইয়া তোমার পূজো-পহার উৎসর্গ করিবার পূর্বে সে এমন নিঃশব্দে তথা হইতে ডুব দিয়া প্রস্থান করতঃ কোথায় গিয়া উঠিয়াছে যে, তুমি তাহার ব্যবহার দেখিয়া অবাচ্ হইবে । এইরূপে তুমি যতবার তাহাকে ধরিবার চেষ্টা কর, ততবার তোমার চেষ্টা ব্যর্থ হইবে । বাস্তবিক কি এই চঞ্চল মনকে শাসনাধীন করিবার কোন উপায় নাই ? এই মন কি চিরকাল আকাশের বিছাতের ত্রায় চঞ্চল থাকিবে ? চিরকাল কি স্বেচ্ছাচারপরায়ণ হইয়া সারথির দৃষ্ট অশ্বের ত্রায় ইতস্ততঃ পরিভ্রমণ করিবে ? কেবল পরীক্ষা ও অনুসন্ধান, এরূপ প্রশ্নের সঙ্গতর প্রদান করিবার জন্ত অবসর প্রতীক্ষা করিতেছে ।

যদি এতদূর গেলাম, আরো কিয়দূর যাই । এই বে সন্মুখস্থ প্রাচীর, ইহাই কি চিরকাল আমার দৃষ্টিগোচর প্রতি-বন্ধক থাকিবে ? আমার মধ্যে এমন কোন আভ্যন্তরিক শক্তি নিহিত আছে কি না, যদ্বারা আমি অনায়াসে এই সন্মুখস্থ অন্তরাল ভেদ করিয়া অন্তরালের অপর প্রান্তস্থ পদার্থ নিচর দৃষ্টিগোচর করিতে পারি ? অমানিশার গাঢ় অন্ধকার ভেদ করিয়া আমার দৃষ্টি চলিতে পারে কি না, এবং সেই অন্ধকার সত্ত্বেও চতুঃপার্শ্বস্থ দ্রব্যরাশি উজ্জলরূপে দৃষ্টিগোচর হইতে পারে কি না ? আমার চক্ষুদ্বয় অন্ধ হইলে বা আমি নিমীলিত নেত্র থাকিলে, কেবল অন্তরস্থ দৃষ্টিশক্তি বলে চক্ষুমান বা উন্মীলিত-

চক্ষু ব্যক্তির জায় আমার দর্শন প্রক্রিয়া সম্পন্ন হইতে পারে কি না ? যদি একজন স্থূলবুদ্ধি ও হীনপ্রতিভা লইয়া জন্মিয়া থাকেন, এমন কোন উপায় আছে কি না, যদ্বারা তিনি স্থূলবুদ্ধি ও উজ্জল প্রতিভাশালী হইতে পারেন ?—যদি কোন ব্যক্তি দুরন্ত পাপ প্রবৃত্তি ও অতি দুর্বল ধর্ম প্রকৃতি লইয়া অবতীর্ণ হইয়া থাকেন, কোন সাধনপ্রক্রিয়া বলে তিনি সুপ্রবল ধর্মপ্রবৃত্তি লাভ করিতে সক্ষম কি না ? এমন কোন কৌশল আয়ত্ত করা যায় কি না, যাহাতে মানুষ অল্পায়াসে ও অল্প সময়ে বহুল জ্ঞান অর্জন করিতে পারেন ? কেবল পরীক্ষা ও অনুসন্ধান, এরূপ প্রশ্নের সহস্র দিবার জন্ত অবসর প্রতীক্ষা করিতেছে।

কেহ কেহ বলিতে পারেন যে, প্রাচীন কালের যোগীরা ও তান্ত্রিক সময়ের সাধকেরা এরূপ বহুবিধ পরীক্ষা ও অনুসন্ধান করিয়া গিয়াছেন, এবং বর্তমানে ইউরোপ ও আমেরিকায় অধ্যাত্মতত্ত্বের বহুবিধ পরীক্ষা হইতেছে ; কিন্তু তাহাতে ত কোন সূক্ষ্ম ফলিতে দেখা যায় নাই। একথা সত্য বলিয়া সহসা মানিয়া লইলেও, বৈজ্ঞানিক পরীক্ষা ও অনুসন্ধানের প্রতিরোধ করিতে কাহারো অধিকার নাই। এক সময়ে বা এক স্থলে, কোন কারণ বশতঃ হয়ত চেষ্টা ব্যর্থ হইয়া থাকিবে ; তাই বলিয়া যে, সে চেষ্টা সর্বত্র চিরকালই ব্যর্থ হইবে, ইহা সিদ্ধান্ত করা যুক্তি-সিদ্ধ নহে। প্রাচীন কালের ও তান্ত্রিক সময়ের চেষ্টা যদি সত্য সত্যই সম্পূর্ণ ব্যর্থ হইয়া থাকে, তাহা হইলে তাহার কারণস্বরূপ ইহা উল্লিখিত হইতে পারে যে, সে সময়ের পরীক্ষা ও অনুসন্ধান সমবেত চেষ্টাদ্বারা সম্পন্ন হয় নাই ; যিনি চেষ্টা করিয়াছেন, তিনি অসহায় ও নিৰ্জ্ঞান হইয়া নিভৃত কন্দর মধ্যে গিয়া চেষ্টা

করিয়াছেন, একজন্মের পরীক্ষার ফল ও সাধনের প্রক্রিয়া অপরে সহজে প্রাপ্ত হয় নাই ; বিশেষতঃ তৎকালে এপ্রকার অনুদারভাবে এবিষয়ের পরীক্ষাদি হইয়াছে যে, তাহাতে সেই পরীক্ষাদি নৈজ্ঞানিক আকার ধারণ করিবার কোন পথই প্রাপ্ত হইতে পারে নাই । যাঁহারা কোন প্রক্রিয়ার বিশেষ সাধন করিলেন, তাঁহারা সহজে তাহা কাহাকেও শিখাইতে চান নাই ; নিতান্ত অনুগতভাবে শিষ্যত্ব স্বীকার করিয়াও অনেক স্থলে তাঁহাদের অনুদারতা ভঙ্গ করিতে পারা যায় নাই । সে সময়ে ছুই চারি জন যাহা কিছু শিখিয়াছিলেন, দুর্ভাগ্য বশতঃ চিত্তের দুর্ভেদ্য দুর্গ মধ্যে তাহা অবরুদ্ধ করিয়া রাখিয়াছিলেন, এবং সঙ্গে লইয়া পরলোকে যাত্রা করিয়াছেন । ভবিষ্যৎ বংশ তাহা হইতে তাদৃশ উপকার লাভ করিতে সক্ষম হন নাই । এই সমস্ত অনুসন্ধানকারীরা, সাধনের প্রক্রিয়া সকল বিষদরূপে ব্যক্ত না করুন, সাধনের ফল যে আত্মগর্ত্ত নিহিত অদ্বুত শক্তি পুঞ্জের ক্ষুধা, তাহা তাঁহারা তাঁহাদের লিখিত শাস্ত্রাদিতে স্পষ্টাক্ষরে স্বীকার করিয়া গিয়াছেন । এমন কি, নাস্তিক ও আস্তিক উভয় শ্রেণীর অনুসন্ধানীগণ তাহা এক বাক্যে স্বীকার করিয়াছেন । আধুনিক ইউরোপ^৩ আমেরিকা হইতেও সে কথার সম্পূর্ণ সায় আসিতেছে । এই সমস্ত লিপি যে সর্ব্বাংশে অলীক, তাহা সত্যাক্ষ বোরসংশয়ী ভিন্ন আর কাহারো সহসা অনুমান সিদ্ধ হইতে পারে না ; অন্ততঃ পরীক্ষার পূর্বে সে সিদ্ধান্তে উপনীত হইতে কাহারো অধিকার নাই ।

কেহ কেহ বলিতে পারেন যে, আমরা স্পর্শমণি অনুসন্ধান করিবার জন্ত লোকের চিত্তবৃত্তিকে পুনরায় নিয়োগ করিতেছি ।

কিন্তু যাহারা একথা বলিবেন, তাঁহাদের উক্তির কোন যুক্তি নাই। তাঁহারা একথা বলিয়া সর্ব্বপ্রকার নূতন পরীক্ষাকে নিরস্ত করিতে পারেন। বস্তুতঃ তাঁহাদের আশঙ্কা দ্বারা পরিচালিত হইলে, বর্ত্তমান সময়ের প্রধান প্রধান আবিষ্কার ও উদ্ভাবন মানুষের দ্বারা প্রতিলব্ধ হইত না। বিশেষতঃ যে বিষয়ে ভূতকাল ও বর্ত্তমান কাল, পুরাতন ও নূতন ভূভাগ সমন্বরে ফলের প্রত্যাশা প্রদান করিতেছে, অন্ততঃ সে বিষয়-সম্বন্ধে স্পর্শমণির পুরাতন যুক্তি গ্রহণীয় হইতে পারে না। বিশেষতঃ বৈজ্ঞানিক কোন অনুসন্ধানকেই আমরা নিষ্ফল মনে করি না। সাক্ষাৎসম্বন্ধে না হউক, অনাস্তর ভাবে তাহা হইতে অনেক সুফল উৎপন্ন হয়। যদি আল্কিমিষ্টেরা স্পর্শমণির উদ্দেশ্যে দ্রব্য গুণ পরীক্ষায় নিযুক্ত না হইতেন, তাহা হইলে অদ্ভুত রসায়ন বিদ্যা এত দিনে মর্ত্যলোকে আবির্ভূত হইত কি না, সন্দেহ স্থল। কেবল তাহা নহে, বর্ত্তমান কালে বিজ্ঞান-রাজ্যে যে যুগান্তর উপস্থিত হইয়া মানুষ-সংসারের অশেষ কল্যাণের পথ প্রসারিত করিয়াছে, আল্কিমিষ্টদিগের অনুসন্ধিৎসা তাহারও নিদানভূত। অতএব অধ্যাত্মশক্তি পরীক্ষার্থ যে সময় ও শ্রম ব্যয়িত হইবে, তাহা সম্পূর্ণ বিফল হইবার নহে। প্রত্যুতঃ ইহাতে মহৎ ফলাদয়ের সম্পূর্ণ প্রত্যাশা আছে।

ব্রাহ্মধর্ম ও ব্রাহ্মসমাজ বিগুদ্ধ ধর্ম ও সমাজ সংস্থাপন; বিগুদ্ধ আচার ব্যবহার, রীতি নীতি ও বিগুদ্ধ জ্ঞান চর্চার প্রবর্ত্তন; এবং বিগুদ্ধ ধর্মজীবন, প্রেম ও সন্তোষ আনয়ন করিবার ভার গ্রহণ করিয়া জগতে অবতীর্ণ হইয়াছেন। কিন্তু চূর্ত্তাগ্যের বিষয় এই যে, সেই উদ্দেশ্য সিদ্ধ করিবার জন্ত বহুকালের প্রাচীন, রূপ,

জীর্ণ কতিপয় হিন্দু ও খৃষ্টীয় পন্থার অনুকরণ ও প্রবর্তন ভিন্ন ব্রাহ্মসমাজ আর অধিক কিছু করিতে অদ্যাপি সমর্থ হন নাই । এই সমস্ত পন্থা ভারতবর্ষে বহুযুগ এবং খৃষ্টীয় জগতে অষ্টাদশ শত বর্ষ ব্যাপিয়া সাধিত হইয়াছে ; কিন্তু তদ্বারা যে অতীষ্ট সিদ্ধ হয় নাই, ইহা বুঝাইবার জন্য প্রমাণ প্রয়োগ নিশ্চয়োজন । ব্রাহ্মসমাজ গতানুগতিকের দ্বারা সেই পুরাতন পন্থায় চলিলে, তাঁহার মহান উদ্দেশ্যের অতি অল্পটুকু সিদ্ধ করিতে পারিবেন । পরীক্ষা ও অনুসন্ধানের নূতন ক্ষেত্রে ব্রাহ্মসমাজের কিয়দংশ চেষ্টা নিয়োজিত হওয়া বিধেয় । যদি ব্রাহ্মসমাজ হিন্দু ও খৃষ্টীয়সমাজ অপেক্ষা কিছু নূতন ও অধিক করিতে চান, তাহা হইলে নূতন মন্ত্রে দীক্ষিত হউন, নূতন ক্ষেত্রে পরীক্ষা ও অনুসন্ধান নিয়োগ করুন । পুরাতন মন্ত্রের সাধনে, পুরাতন ক্ষেত্র চারণে, পুরাতন ফলই প্রসব করিবে ।

দশম পরিচ্ছেদ ।

আদর্শ ব্রাহ্মসমাজ ।*

ব্রহ্মকে লইয়াই ব্রাহ্মধর্ম । ব্রহ্মকে লইয়াই ব্রাহ্মসমাজ । ধর্ম আর কিছুই নহে, শুদ্ধ মানুষের মধ্যে ব্রহ্মের আবির্ভাব ও অবস্থিতি । যে দিন মানুষের মধ্যে ব্রহ্মক্ষুর্ভি হইতে আরম্ভ হয়, সেই দিনই তাহার ধর্ম জীবন আরম্ভ হয় । তৎপূর্বে সে প্রাকৃত মনুষ্য ; তাহার সহস্র গুণ সত্ত্বেও সে প্রাকৃত মনুষ্য, ধার্মিক নহে । সেট দিন হইতেই সে ধার্মিক, যে দিন হইতে তাহার মধ্যে পর-ব্রহ্মের পবিত্র তেজ স্বপ্রকাশ হইতে আরম্ভ হয় । প্রাকৃত মনুষ্যের মধ্যে ব্রহ্মের পবিত্র তেজ অপ্রকট থাকে, মায়ায় ছুর্ভেদ্য আবরণে আবৃত থাকে ; অপ্রাকৃত মনুষ্যের মধ্যে সেই পবিত্র তেজ প্রকট হয়, মায়ায় ছুর্ভেদ্য আবরণ ভেদ করিয়া অভিব্যক্ত হয় । প্রাকৃত ধার্মিক মনুষ্যই অপ্রাকৃত মনুষ্য । কেননা, ধার্মিক মনুষ্যই ব্রহ্মক্ষুর্ভিমান । যদি জিজ্ঞাসা কর, কবে ব্রাহ্মধর্মের জন্ম হইয়াছে ?—আমরা তাহার প্রত্যুত্তরে এই বলিব, যে দিন হইতে ব্রহ্ম মানুষের মধ্যে প্রকটিত হইতে আরম্ভ করিয়াছেন । তৎপূর্বে ব্রাহ্মধর্ম অপ্রকটিত ছিল, তৎপূর্বে প্রাকৃত ভাবই রাজত্ব করিতেছিল ।

সেই ব্রহ্মকে লইয়াই ব্রাহ্মসমাজ । যে সমাজের মধ্যে ব্রহ্মের আবির্ভাব নাই, স্ফূর্তি নাই, তাহা প্রাকৃত সমাজ, ব্রাহ্ম সমাজ নহে । প্রাকৃত সমাজ মধ্যে ব্রহ্ম অপ্রকট, মানুষের দুর্ভেদ্য আবরণে আবৃত । যেখানে ব্রহ্মের পবিত্র তেজ প্রকটিত হইয়াছে, মানুষের দুর্ভেদ্য আবরণ ভেদ করিয়া স্ফূর্তি পাইয়াছে, তাহাই প্রকৃত ব্রাহ্মসমাজ । প্রকৃত ব্রাহ্মসমাজে ঈশ্বরের জ্ঞান, শক্তি, প্রেম, পুণ্য স্ফূর্তি পাইতে থাকে, তাঁহার বিবিধ শক্তি মনুষ্যের মধ্যে অবতীর্ণ হইয়া দেহ ধারণ করিতে থাকে । প্রকৃত ব্রাহ্মসমাজে ঈশ্বর জীবন্ত ও জাগ্রত ভাবে বর্তমান । প্রকৃত ব্রাহ্মসমাজ ব্রহ্মের দেহ স্বরূপ ; তিনি তন্মধ্যে প্রাণরূপে অধিষ্ঠিত । সেই দেহের প্রত্যেক অঙ্গ প্রত্যঙ্গ ব্রাহ্মাগ্নিতে জলিয়া উঠিয়াছে । প্রাকৃত সমাজ মোহ নিদ্রাতে অভিভূত, ব্রহ্মস্ফূর্তি হীন, শুদ্ধ মায়িক চৈতন্তে সে চেতনাবান । মায়িক স্বার্থই সে সমাজকে সংগঠন করে, মায়িক স্বার্থই সে সমাজকে সংরক্ষণ করে, মায়িক স্বার্থই সে সমাজকে ভঙ্গ করিয়া পুনর্গঠন করে, মায়াই সে সমাজের প্রাণ,—সেই মায়াকে লইয়াই সেই সমাজ দেহ ধারণ করিয়াছে । সেখানে ব্রহ্মকে খুঁজিয়া পাইবে না । সেখানে তাঁহার বিগুহ সত্তা অপ্রকট ।

প্রকৃত ব্রাহ্ম সমাজে, যেখানে ব্রহ্ম-স্বরূপ স্বপ্রকাশ, সেখানেই আমরা কেবল প্রকৃত ধর্মের স্ফূর্তি প্রত্যাশা করিতে পারি । সেই স্ফূর্তি ত্রিবিধ নিদর্শনে অভিব্যক্ত হইতে থাকে : তাহা আমরা প্রদর্শন করিতে চেষ্টা করিব ।

প্রথমতঃ, সেখানে ব্রহ্মের আকর্ষণী শক্তি স্বপ্রকাশ থাকে । দূরাদূর হইতে লোকে সেই সমাজের দিকে আকৃষ্ট হয় । সংসার-

পীড়িত, আশ্রম-পীড়িত সমস্ত লোকে সেই আশ্রয়ে আসিবার জন্য উন্মুগ্ন হয়। সকলেই আশা করে, সেই স্থানে তাহাদের তাপিত প্রাণ শীতল হইবে, তাহাদের শোকাক্ত হৃদয় সাস্বনা পাইবে, তাহাদের পঙ্কিল প্রাণ বিধৌত হইবে;—সেই স্থানে তাহারা ক্ষুধার অগ্নি, তৃষ্ণার জল লাভ করিবে। মার্জিত-পীড়িত পথশ্রান্ত পথিক, দূর হইতে ঘনচ্ছায়া বিশিষ্ট বৃক্ষবাটিকা সন্দর্শন করিয়া যেরূপ প্রলুব্ধ হয়, তাহা হইতে শতগুণ বলবত্তর আকর্ষণে সংসার পদের পথশ্রান্ত দীপ্তশিরা পথিক প্রকৃত ধর্ম সমাজের দিকে আকৃষ্ট হয়। পরব্রহ্মে সর্বাকর্ষণ শক্তি বিরাজমান, সমস্ত স্থাবর জঙ্গম তাঁহার দিকে ক্রমশঃ আকৃষ্ট হইতেছে। সেই সর্বাকর্ষণ শক্তি প্রকৃত ব্রাহ্মসমাজে আশ্রয় প্রাপ্ত হইয়া অভিব্যক্ত হয়, এবং আপনার কার্য্য করিতে থাকে। যে সমাজে নিত্য নূতন লোকের সমাগম নাই, সে সমাজ হইতে ব্রহ্মের এট মহীয়সী শক্তি তিরোহিত হইয়াছে, — সে সমাজের প্রাণে আঘাত পড়িয়াছে।

দ্বিতীয়তঃ, প্রকৃত ধর্মসমাজে ব্রহ্মের সংরক্ষণী বা পালনী শক্তি বিবিধ আকার ধারণ করিয়া ক্ষুণ্ণিত পাইয়া থাকে। যে সমাজের কেবল আকর্ষণী শক্তি আছে, কিন্তু এই সংরক্ষণী শক্তি নাই,—যে সমাজে কেবল লোক সমাগত হইয়াই চতুর্দিকে বিকশিত হইয়া পড়ে; বাহারা সেখানে আকৃষ্ট হইয়া আইসে, তাহাদের সেখানে অভ্যর্থনা নাই, তাহাদিগকে সেখানে বাসবার আসন দেওয়া নাই,—কেবল চতুর্দিক হইতে উৎপীড়নের স্রোত, বিবাদ বিসম্বাদের স্রোত, অশান্তির স্রোত আসিয়া তাহাদিগকে বিচলিত করিবার চেষ্টা করে, সে সমাজ প্রকৃত ব্রাহ্মসমাজ নহে। সে সমাজ প্রলয়-প্রবণ এবং শীঘ্রই কাল-সমুদ্রের প্রবল স্রোতে

কোথায় চলিয়া যাইবে। প্রকৃত ব্রাহ্ম-সমাজে ব্রহ্মের পালনী শক্তি বিবিধ মূর্তিধারণ করিয়া সমগ্র সমাজের প্রতিপালনে নিয়োজিত, অতি সতর্কতার সহিত আকৃষ্ট লোক-প্রবাহকে সমাজ-বক্ষে ধারণ করিবার জন্ত বিশেষরূপে সচেষ্ঠ, লোক-ভঙ্গ নিবারণ করিবার জন্ত যার-পর-নাই প্রযত্নবান। যে ভাবে এই শক্তি সমাজ মধ্যে অবতীর্ণ হইয়া কার্য্য করিয়া থাকে, নিম্নে তাহা বিবৃত হইতেছে।

(ক) এখানে ঈশ্বরের প্রীতি-শক্তি আবির্ভূত, এই শক্তি সমাজস্থ প্রত্যেক ব্যক্তির অন্তরে আবির্ভূত হইয়া পরস্পরকে পরস্পরের দিকে আকর্ষণ করে। ঈশ্বর এখানে অমিয়ময় হইয়া প্রত্যেক ব্যক্তির মধ্যে সাক্ষাৎ বর্তমান; এখানে পরস্পর পরস্পরকে অতি কমনীয় দেখিয়া অতি গভীর আনন্দে পূর্ণ হয়; এখানে পরস্পর পরস্পরের মুখশ্রীতে, আলাপে, ব্যবহারে ঈশ্বর-প্রেমের প্রত্যক্ষ নিদর্শন দর্শন করিয়া, ঘনিষ্ট সম্বন্ধে সম্বদ্ধ হয়।

(খ) এখানে ঈশ্বরের প্রেম-ভক্তি-সঞ্চারিণী শক্তি আবির্ভূত, অর্থাৎ অনেকগুলি ব্যক্তির মধ্যে অবতীর্ণ হইয়া, সমস্ত সমাজকে প্রেম ও ভক্তিরসে সিদ্ধিত করিতে থাকে; এখানে যাহারা প্রেম লাভ করিবার জন্ত আসেন,—ভক্তি লাভ করিবার জন্ত আসেন, তাহাদিগকে শূন্য হস্তে ফিরিয়া যাইতে হয় না। ঈশ্বর এই সমাজ মধ্যে সাক্ষাৎ গুরুত্ব ভ্রাতৃ বর্তমান থাকিয়া শুধু মরুভূমিকে জলপ্লাবিত করেন, শুধু তরুকে মঞ্জরিত করেন, পাবাণে বীজ অঙ্কুরিত করেন। ঈশ্বরের যে শক্তি প্রাণের মধ্যে প্রেমের প্রসবণ প্রযুক্ত করিয়া প্রেমের বন্তা আনিয়া দিতে পারে, যে শক্তি হিমালয়ের পাবাণ বক্ষ বিদীর্ণ করিয়া, পতিতপাবনী ভক্তির গঙ্গাক্রোড

নির্গত করিতে পারে, সেই শক্তি প্রকৃত ব্রাহ্মসমাজে দেহ ধারণ করিয়া সর্বদা আবির্ভূত থাকে ।

(গ) এখানে ঈশ্বরের পতিতপাবনী শক্তি সাক্ষাৎ অবতীর্ণ, অর্থাৎ অনেকগুলি ব্যক্তির মধ্যে প্রকটিত হইয়া সংসারের পাপ তাপ দূর করিতে থাকে । যাহারা পাপ-রোগে রোগাক্রান্ত হইয়া, মোহ-বিকারে হতচেতন হইয়া, এই সমাজের আশ্রয় গ্রহণ করেন, সমাজ ভদায়ত্ত ব্রহ্মের পতিতপাবনী শক্তির দ্বারা তাঁহা-দিগকে পাপ তাপ হইতে মুক্ত করিয়া আপনার শীতল ক্রোড়ে আশ্রয় দান করিয়া থাকেন । সমাজ মধ্যে ব্রহ্মের পবিত্রতার অগ্নি একরূপ ভাবে প্রজ্জ্বলিত যে, রাশি রাশি পাপ তাহার সংস্পর্শে ভস্মীভূত হইয়া যায় ।

(ঘ) এখানে ঈশ্বরের পাপ-নিবারিণী শক্তি সাক্ষাৎ অবতীর্ণ, অর্থাৎ অনেকগুলি লোকের মধ্যে মূর্তিমান হইয়া কার্য্য করিতেছে । এই সমাজে প্রবেশ করিয়া লোকের পাপ করা অসম্ভব হইয়া পড়ে । পাপের এখানে প্রশ্রয় নাই, পাপের এখানে বন্ধু নাই, পাপের এখানে দাঁড়াইবার স্থল নাই । পাপের প্রতি ঈশ্বরের যে বিরাগ, তাহা এখানে দেহ ধারণ করিয়া প্রকটিত হইয়াছে ।

(ঙ) এখানে ঈশ্বরের উন্নতি-বিধায়িনী শক্তি প্রকট । তিনি এই সমাজের আশ্রিত সমস্ত লোককে উন্নতির পথে লইয়া চলিয়াছেন । জ্ঞানে, ধর্ম্মে, প্রেমে ও পুণ্যে সকলেই দিন দিন উন্নতি লাভ করিয়া থাকেন । এখানে সকলকেই অগ্রসর হইতে দেখা যায়, কিন্তু কাহাকেও পশ্চাৎপদ হইতে হয় না । এখানে আসিলে লোকে উন্নতির স্রোতে পড়িয়া থাকেন । এ সমাজে আসিয়া লোকের একস্থানে দণ্ডায়মান থাকা অসম্ভব ।

(চ) এখানে ঈশ্বরের সহস্রমুখী দয়া সাক্ষাৎ অবতীর্ণ, অর্থাৎ বিবিধ দেহ ধারণ করিয়া কার্য্য করিতেছে। ঈশ্বর দরিদ্রের বন্ধু, স্ত্রীজাতির বন্ধু, বিধবার বন্ধু, অনাথ সন্তানের বন্ধু, রোগী-দিগের বন্ধু, অন্ধ জাতুরদিগের বন্ধু, পতিতা অবলাদিগের বন্ধু, কারাগারের অপরূপদিগের বন্ধু, মদ্যপদিগের বন্ধু, পাপীতাপী-দিগের বন্ধু, তাহা এখানে সাক্ষাৎ দেখিতে পাইবে। এই সমাজ মধ্যে সকল শ্রেণীর বিপন্ন ও পতিত নরনারীর রক্ষা ও উদ্ধারের জন্ত সর্বদাই নানা প্রকার উপায় অবলম্বিত হইতেছে।

তৃতীয়তঃ, প্রকৃত ব্রাহ্মসমাজে ব্রহ্মের অসার-বর্জনী বা সংহার-কারিণী শক্তি সাক্ষাৎ অবতীর্ণ। সমাজের যে সমস্ত লোক, গৃহ পাপ পোষণ করিবে, পাপের অভ্যাস সমূহ গোপন করিয়া রাখিবে, উন্নতির স্রোত হইতে আপনাকে দূরে রাখিবে, সংসার লীলায় অভিভূত হইয়া থাকিবে, তাহারা এই শক্তির বলে এখানে তিষ্ঠিতে পারিবে না ; আপনা হইতে অপমৃত হইবে। এখানে সর্বাপেক্ষা ধর্ম্মের সম্মান ;—অর্থ এখানে সম্মানিত হয় না এবং মনের অভিমত উচ্চপদ লাভ করিতে পারে না। এখানে ব্রহ্ম-স্মৃতিমানদিগেরই আদর ও উচ্চপদ।



একাদশ পরিচ্ছেদ।



ভয়, জ্ঞান ও ভক্তি ।*

প্রকৃত ভক্তি বাহ্য, প্রকৃত জ্ঞানও তাহা,—“True love is true wisdom” (Lord Lytton). শাস্ত্রাদিতে প্রকৃত ভক্তিকে ‘অহেতুকী ভক্তি’ নামে অভিহিত করা হইয়াছে। এই অহেতুকী ভক্তিতে প্রকৃত জ্ঞান ও ভক্তি—এক দেহ, এক প্রাণ, এক আত্মা। হেতুকী ভক্তিতে জ্ঞান ও ভক্তির সেরূপ একাত্মতা নাই। এই হেতুকীভক্তি দ্বিবিধ;—ভয়-মূলা আর জ্ঞানমূলা। এই ভয়-মূলা হেতুকী ভক্তি সচরাচর ভক্তি নামে অভিহিত হইলেও, তাহা প্রকৃত ভক্তি নহে।

ইহার মধ্যে এই ভয়-মূলা ভক্তি অবশ্যই নিকৃষ্ট শ্রেণীর। ভয়ই এই ভক্তির প্রবর্তক। এই ভক্তি ভয় প্রযুক্তই স্বর্গাশ্রয়,—ঈশ্বরশ্রয় হইয়া থাকে। অনেক স্ত্রী ভয়-প্রেরিতা হইয়া দাম্পত্যব্রত পালন করেন, এবং স্বামীর অশ্রয় হইয়া থাকেন। এখানে তুমি তাঁহাকে ভয় কর বলিয়া কাষে কাষেই ভক্তি করিয়া থাক। লোকে সচরাচর ইহাকেই ভক্তি বলিয়া থাকে। দণ্ড-ভয়, পর-কালের ভয়, কর্মফল ভোগের ভয়, মৃত্যুভয়, এবং অন্যান্য ভয়, এই ভক্তিকে উজ্জীবিত রাখিয়া থাকে। ঈশ্বর পাপের শাস্তা,

* আশা ;—১৮১৪ শক, বৈশাখ।

ছক্শ্বের দওদাতা, কৰ্ম্মানুসারে ফলাফলের বিধাতা, এইরূপ সংস্কার অন্তরে বদ্ধমূল থাকাতাই, এই ভক্তির আধিপত্য মনুষ্য-সমাজে বহুকাল হইতে প্রতিষ্ঠিত আছে। অনেকের অজ্ঞানতা ও কুসংস্কার, স্বকল্পিত ভীষণ ভাব আরোপ করতঃ দেব-চরিত্র চিত্রিত করিয়া ভয়ে পূজানুরাগী হয়। এখানেও ভয় ভক্তির প্রবর্তক হইয়া আছে। বর্তমান সময়ে আমাদের শিক্ষিত সমাজের সর্বত্র এই সমস্ত সংস্কার শিথিল হইয়া পড়িতেছে ; সুতরাং এই সমস্ত সংস্কার-মূলা ভক্তিও সেই সঙ্গে শিথিল হইয়া উঠিতেছে এবং অনেক স্থলে তাহার অসম্ভাবও দৃষ্টিগোচর হইয়া থাকে। এইজন্য লোকে এক্ষণে ভক্তির হীনাবস্থা ভাবিয়া সচরাচর আক্ষেপ প্রকাশ করিয়া থাকেন। জ্ঞান ও শিক্ষার প্রাদুর্ভাবে শাস্ত্র-চিত্রিত ঈশ্বর ও তাঁহার শাস্ত্রনির্দিষ্ট নিষেধ বিধি আর সে ভাবে আমাদের বিশ্বাস ও শ্রদ্ধা আকর্ষণ করিতে পারিতেছে না ; সুতরাং এই ভয়-মূলা ভক্তিও আর সে ভাবে আমাদের মধ্যে তিষ্ঠিতে পারিতেছে না।

শিক্ষা প্রভাবে এক্ষণে এদেশে জ্ঞান ও বিজ্ঞান ক্রমশ বিস্তার লাভ করিতেছে। সেই সঙ্গে সঙ্গে এই ভয়-মূলা ভক্তিও পরিবর্তিত হইবার পথে দাঁড়াইয়াছে। ঈশ্বরের স্বরূপ, ও তাঁহার নিষেধ বিধি সম্বন্ধে আমাদের পূর্বসংস্কার কিয়ৎ পরিমাণে অগ্রবিধ আকার পরিগ্রহ করিতেছে। আমাদের পূর্বসংস্কার-জাত ভয়ের অঙ্গে জ্ঞানের ভাব আসিয়া মিশিতেছে। ভয়ের পুরাতন ভিত্তিহীন এক্ষণে জ্ঞানের হস্তে জীর্ণ-সংস্কার প্রাপ্ত হইতেছে ; সুতরাং ভয়-মূলা পুরাতন ভক্তি এক্ষণে এক প্রকার নিম্ন শ্রেণীর জ্ঞানমিশ্র ভক্তির আকারে পরিণত হইতেছে। ব্রাহ্মসমাজে ইহার দৃষ্টান্তের অভাব নাই। এখানে এক্ষণে অনেকের মধ্যে এই

ভয়মূলা ভক্তির স্থলে এই জ্ঞানমিশ্রা ভক্তি প্রবেশ লাভ করিবার চেষ্টা করিতেছে; কয়েক জনের মধ্যে তাহা প্রবেশ লাভ করিয়াছে, এবং অতি অল্প লোকে তাহাকে অতিক্রম পর্য্যন্তও করিয়া থাকিবেন। এখনকার অন্ত্যন্ত শিক্ষিত সমাজের উপরেও এই জ্ঞান-মিশ্রা ভক্তির ক্রম অনেকের মধ্যে প্রকাশ পাইতেছে। এই উভয় বিধ বিরোধী ভাবের পরস্পর সংঘটনায় কিন্তু ভক্তির মূলভিত্তি পর্য্যন্তও অনেক স্থলে শিথিল হইয়া পড়িয়াছে, অনেক স্থলে তাহা ভঙ্গ হইয়াও বাইতেছে; কোথাও গঠন তাদৃশ সুদৃঢ় হইতে দেখা বাইতেছে না। সুতরাং সমস্ত শিক্ষিত সমাজের ভিত্তিমূল এক্ষণে চঞ্চল হইয়া উঠিতেছে। পাশ্চাত্য খৃষ্টীয় সমাজের আদর্শে অথবা বৈজ্ঞানিক ধর্ম ব্যাখ্যায় সেই সমাজকে তাদৃশ সুদৃঢ় ও সুস্থির রাখিতে সমর্থ হইতেছে না। এই জ্ঞানমিশ্রা ভক্তিতে পূর্ব-সংস্কার-জাত ভয়ের সঙ্গে গ্রহণরূপ অথবা অস্ত্র উপায়ে উপার্জিত জ্ঞান মিলিত হইয়া কার্য্য করে। এখানে কোথাও বা ভয় জ্ঞানকে, কোথাও বা জ্ঞান ভয়কে শাসনে রাখিয়া কার্য্য করিয়া থাকে। এই শ্রেণীর জ্ঞানমিশ্রা ভক্তি অপেক্ষাকৃত মার্জিত হইলেও অপেক্ষাকৃত শিথিল-মূলা ও চঞ্চলা, তাহাতে আর সন্দেহ নাই।

জ্ঞানমূলা হেতুকী ভক্তি অপেক্ষাকৃত উচ্চতর শ্রেণীর বলিয়া গণনীয় হইলেও, তাহাও প্রকৃত ভক্তি নহে। তোমার অঙ্গুলি ও নখ দেখিয়া, বা শুনিয়া, তোমার মনঃকার্য্য সকল আলোচনা করিয়া বা তোমার সঙ্গে প্রচুর কৃতজ্ঞতার সম্বন্ধ আছে মনে বা চিন্তা করিয়া, এই জ্ঞান-মূলা হেতুকী ভক্তি মনোমধ্যে উদয় হইয়া থাকে। এখানে জ্ঞান সম্পূর্ণরূপে ভয়কে অতিক্রম করিয়া

অমিশ্রিত বেশে দাঁড়াইয়াছে। ইহা সচরাচর wonder হইতে, অথবা admiration হইতে কিম্বা ভক্তি-ভাজনের গুণাবলীর অথবা তৎকৃত উপকার-রাশির স্মরণ বা মনন হইতে উৎপন্ন হইয়া থাকে। জ্ঞানীগণ—কোন কোন বিজ্ঞানবিদ পণ্ডিত এবং অগ্ণাত অনেকে—ইহাকে প্রকৃত ভক্তি নামে অভিহিত করিয়াছেন। পণ্ডিতবর হার্বার্ট স্পেন্সর একস্থলে, বিজ্ঞানের উত্তরোত্তর ও অবিশ্রান্ত আলোচনা দ্বারা এই ভক্তিকে উজ্জীবিত রাখিতে বলিয়াছেন। তাঁহার মতে ইহাই প্রকৃত ঈশ্বর-পূজা। অসীম সৃষ্টির অত্যাশ্চর্য্যময় বিজ্ঞানতত্ত্বের মধ্যে নিমগ্ন হইয়া এই পূজা সম্পাদন করিতে হয়। অনেকে ঈশ্বরের অনন্তশক্তি, বিচিত্র জ্ঞান, অপার করুণা ও অজস্র দয়ার কার্য্য সকল আলোচনা করিয়া বিশ্বয় বা কৃতজ্ঞতা ভরে তাঁহার পূজা করিয়া থাকেন। ঈশ্বরের গুণাবলীর পুনঃ পুনঃ স্মরণ ও মনন, তাহাদের এই বৈজ্ঞানিক বা জ্ঞানমূল্য ভক্তিকে উদ্দীপ্ত রাখিয়া থাকে। ইহা জ্ঞানীগণের বা বৈজ্ঞানিকগণের ভক্তিহইলেও .ভক্তি নামে প্রাতিপাদ্য হইতে পারে না। পুনঃ পুনঃ স্মরণ ও মনন বা আরাধনা দ্বারা কর্তব্য-জ্ঞানকে জাগ্রত না রাখিলে ভক্তির ভাব রক্ষা করিতে পারা যায় না। এ ভক্তি জীবর কর্তব্য-জ্ঞানে স্বামীকে ভালবাসার ছায়া। বহুকাল স্বামীকে দেখিয়া গুনিয়া ও পরীক্ষা করিয়া, জীবর পূর্ব্বে ভয় চলিয়া গিয়াছে। তাঁহার পরিজ্ঞাত চরিত্র; তাঁহার সুপরিচিত গুণাবলী, তাঁহার সকল সময়ের ব্যবহারের মিষ্টতা ও কমনীয়তা হইতে জীবর অন্তরে জ্ঞানমূল্য ভক্তি ও ভালবাসার সঞ্চার হইয়া তাঁহার কর্তব্য জ্ঞানকে জাগ্রত করিয়াছে, এবং তাঁহাকে স্বামীর অনুরাগিনী করিয়াছে।

এখানে একথা বলা আমার উদ্দেশ্য নহে যে, প্রকৃত ভক্তি কোন অবস্থাতেই ভক্তি-ভাজনের গুণগ্রামের সংবাদ আদৌ লয়েন না, তাঁহার সদগুণ সকল আলোচনা করিয়া সুখাস্বাদন করেন না, তাঁহার-কৃত উপকার সকল স্মরণ করিয়া সন্তুষ্টিচিত্তে পুণ্যকিত হয়েন না। কিন্তু এরূপ স্থলে প্রকৃত ভক্তিও কথঞ্চিৎ সম্ভব হইয়াছে। এখানে তাহা wonder বা admiration বা কৃতজ্ঞতা প্রভৃতি ভাবের সঙ্গে মিশিয়া রূপান্তর প্রাপ্ত হইয়া উচ্চ-শ্রেণীর জ্ঞান-মিশ্রাভক্তির আকার ধারণ করিয়াছে। এই উচ্চ-শ্রেণীর জ্ঞান-মিশ্রা ভক্তির এবং অহেতুকী নির্মলা ভক্তির,—উভয়ের আশ্বাদন অনেক বিভিন্ন। এইজন্য ভক্তি-শাস্ত্রে এরূপ ভগবদ্ভক্তি অনেক স্থলে দেখিতে পাওয়া যায় যে, এই “ঐশ্বর্য্য-মিশ্রিত-প্রেমে নাহি মোর প্রীতি।” সুতরাং ভয়মূলা, অথবা নিকৃষ্ট শ্রেণীর জ্ঞান-মিশ্রা, বা জ্ঞান-মূলা ভক্তিতে তাঁহার অনুরাগ যে অনেক কম অবশ্যই হইবে, তাহার আর সন্দেহ নাই। সাংসারিক ভাবেও দেখিতে পাওয়া যায়, যে স্বামী তাহার জীব স্বতঃ-স্ফূর্ত্তি-বিশিষ্টা অকামোৎপন্ন অপরিজ্ঞাত-কারণ-সম্বৃতা প্রীতিতে যতটা পরিতৃপ্ত হয়েন, ততটা আর কিছুতেই হন না। ভয়ানু-রাগিনী ভক্তিতে কাহারও তৃপ্তি নাই। জ্ঞানানুরাগিনী ভক্তিতেও কাহার সম্পূর্ণ তৃপ্তি নাই। কেবল অহেতুকী ভক্তিতে ভক্ত-ও ভক্তিপাত্র উভয়েরই পূর্ণতৃপ্তি। সে ভক্তি যে বিমল অপরিজ্ঞাত-মূল হইতে উচ্ছ্বাসিত হয়, তাহা বিমল আনন্দধাম; তাহা উভয়কেই সুনির্মল সুখে পরিপূর্ণ করে। যাহারা প্রকৃত পরাভক্তি লাভ করিয়াছেন, কেবল তাঁহাদেরই এই দুর্লভ উচ্চতর জ্ঞানমিশ্রা ভক্তির আশ্বাদন লাভ হইয়া থাকে ইহা মনোনীত বস্তুর মনোমধ্যে

অবতীর্ণ হওয়া, ইহা প্রকৃত পুরাভক্তির সূক্ষ্মমল উচ্ছ্বাস ; জ্ঞানমূলা ভক্তির কোন উচ্চতর অবস্থা নহে। ঘোপার্জিত বা শাদ্ভলক জ্ঞানকে সঙ্গে লইয়া এই উচ্ছ্বাস অভিব্যক্ত হয়। wonder বা admiration বা কৃতজ্ঞতা বা গুণারাদনা এই উচ্চ শ্রেণীর জ্ঞান-মিশ্রা ভক্তির কারণ নহে, তবে সঙ্গে সঙ্গীমাত্র।

জ্ঞানমূলা হেতুকী-ভক্তি সুশিক্ষিত লোকের মার্জিত হৃদয়েই সচরাচর স্থান প্রাপ্ত হইয়া থাকে। ইহা কোন জ্ঞানমূলক হেতু বিশেষকে অবলম্বন করিয়া প্রকাশ পায় এবং সেই হেতুর অন্তর্দ্বানে, ইহার জীবন শুদ্ধ হইয়া যায়। এই জন্ত এই জ্ঞানমূলা হেতুকী ভক্তির প্রকৃতি সর্বদাই চঞ্চল ও স্বভাবতই পরিবর্তনশীল। আজ যে সমস্ত কার্যা ও গুণ দেখিয়া আমার wonder বা admiration বা শ্রদ্ধা অন্তরে উদ্ভিত হইল, সময়ে তাহা আত্ম আমাকে বিমুক্ত করিতে পারে না ; সুতরাং আমার সেই ভক্তি শুষ্কমূল ও নিজ্জীব হইয়া পড়ে। আজ আমি তোমার যে সমস্ত গুণে আকৃষ্ট হইয়া অন্তরে পূজা করি, কিছুদিন পরে সেই সমস্ত গুণে আর তেমন করিয়া আমাকে উত্তেজিত করিতে সমর্থ হয় না ; সুতরাং আমার মানসিক পূজা বজায় রাখা আমার সঙ্গে অসম্ভব, এমন কি অসম্ভব হইয়া উঠে। এক সময়ের সরস পূজা সময়ান্তরে নীরস ও কষ্টকর চিন্তামাত্র হইয়া পড়ে। আজ আমি তোমার উপকার রাশি স্মরণ করিয়া “এতদয়া পিতা তোমার” বলিয়া কৃতজ্ঞতা-রসে আর্দ্র হই, কাল সে স্মৃতিতে সে ভাব ধুঁজিয়া পাওয়া যায় না ; পুনঃ পুনঃ স্মরণেও মনের শুষ্কতা দূর হয় না। আজ তুমি আমার নব নব আকাজকা সকল চরিতার্থ করিতেছ, নূতন নূতন দৃষ্টের গট আমার দৃষ্টিপথে উন্মোচন

করিয়া আমাকে চমকিত ও পুলকিত করিতেছে, নব নব অদ্ভুত শক্তি আমার অন্তরে প্রস্ফুটিত হইয়া আমাকে আশ্চর্যান্বিত ও স্তম্ভিত করিতেছে, তোমার নব নব স্নেহের কলিকা ফুটাইয়া আমাকে আদর করিতেছে, সময়ে এই সমস্ত দৃষ্টাবলী দৃষ্টিপথের অগোচর হইবেই হইবে :—আমি আমার এই জ্ঞান-মূল্য ভক্তি অতীতের ব্যাপারে পরিণত হইয়া কোথায় উড়িয়া যাইবে, তাহার চিন্তামাত্রও ধনিত্য রাগিতে আমার সাধ্য হইবে না, কেবল আমার অতীত স্মৃতির গর্ভ হইতে তাহার শুদ্ধ শব্দমূর্তি সময় সময় উথিত হইয়া আমাকে শোকাকুল করিবে মাত্র ।

বিশেষতঃ এই ভয়-মূল্য^৩ জ্ঞানমূল্য তেতুকী ভক্তিতে লোকের অন্তর নিশ্চল হইতে পারে না। আগি যদি কোন চোরকে স্বকীয় কার্য্য, শক্তি বা গুণ দ্বারা আশ্চর্যান্বিত বিমোহিত বা ভয়াক্রান্ত করিতে পারি, তবে চোরও সেই ভাবে আকৃষ্ট হইয়া আমাকে এক প্রকার শ্রদ্ধা, ভক্তি বা ভয় করিবে, এবং সর্ব্বত্র আমার যশোঘোষণা ও মহিমা কীর্ত্তন করিবে ; কিন্তু এই পর্য্যায়ই শেষ ; তদ্বারা তাহার অন্তর নিশ্চল হইবে না। যে ভক্তি অলৌকিক গুণ বা কার্য্যের (Miracles এর) উপর প্রতিষ্ঠিত, পরিণামে নিশ্চয়ই তাহার এই দুর্গতি ও দুর্দশা প্রাপ্তি হইয়া থাকে। এই জন্যই Miracles দিগকে weak points of a revealed religion বলিয়া কেহ কেহ উক্ত করিয়াছেন। এই ভক্তি অচঞ্চল ভাবে যাবজ্জীবন স্থায়ী হওয়া কদাপি সম্ভবপর হইলেও, তাহাতে কাহারও চিন্ত-শুদ্ধি হইবে না। তাহা হইতে কাহারও স্থির-বিশ্বাস ও সংশয়রহিত বুদ্ধি উদয় হইবে না,—
ভগবদ্ভিষানের—ভগবদিচ্ছার স্রোতে অবিচারে অঙ্গ ঢালিবার

‘কাহারও শক্তি হইবে না, —তাহার সন্নিকর্ষ-জ্ঞান তাহার নিকট মতবদ্ধ হইয়া থাকিবে, তদ্বারা তাহাকে নির্ভয় করিতে পারিবে না ; তৎকালে তোমার ও আমার হ্রায় অপদার্থ তাহার সন্নিকটে থাকিলে বরং তাহাকে কথঞ্চিৎ নির্ভয় করিতে পারিবে ।

যে সকল সামর্থ্যবান মহাপুরুষবা অলৌকিক ক্রিয়াজাল (Miracles) বিস্তার করিয়া লোকের চিত্তকে আকর্ষণ করিয়া থাকেন, তাঁহারা তদ্বারা কেবল লোকসংঘট্ট-যোজনা করিয়া সমাজের বাহুঠাট কথঞ্চিৎ পরিবর্তন করিতে পারেন । কিন্তু তাহাতে চিত্তশুদ্ধির সম্ভাবনা কোথায় ? এই জন্ত সুদূরদর্শী সাধুবা এই মায়াজাল বিস্তার করিয়া ধর্ম সংস্থাপন করিতে চাহেন না । মহাপুরুষ বুদ্ধদেব তাহা করেন নাই, মহাপ্রভু চৈতন্য দেবও তাহা করেন নাই, প্রভু যীশুখৃষ্টও অল্পদিন মাত্র এই অলৌকিক ক্রিয়ার অবতারণ করিয়া পরে তাহার অসারত্ব বুঝিয়া ছিলেন, এবং বিশেষরূপে অনুরুদ্ধ হইয়াও তৎসম্পাদনে বিশেষ বিরক্তির সহিত অনিচ্ছা প্রকাশ করিতেন । শ্রীকৃষ্ণও তাঁহার বিবিধ ঘটনাপূর্ণ সুদীর্ঘ জীবনে লৌকিক ভাবের সীমা কদাচ অতিক্রম করিতেন না, — কদাচ স্বকীয় ঈশিত্ব ও লোকা-ভীত সামর্থ্য লোকচক্ষে প্রদর্শন করিতে প্রলুব্ধ হইতেন না । ভারত-যুদ্ধে ও তাহার পূর্বপরবর্তী সমস্ত ব্যাপারে তাঁহাকে এই লৌকিক গণ্ডির মধ্যবর্তী থাকিয়া কার্য্য করিবার চেষ্টা করিতে দৃষ্ট হইয়াছে । এই সকল মহাপুরুষদিগকে এবং তাঁহাদের অলোক-সামান্য স্বর্গীয় গুণাবলীকে লোকে অবাক্ হইয়া পূজা করে, অর্চনা করে, আরাধনা করে । সেই অর্চিত বস্তু কিন্তু লোকের উপাসনালয়েই থাকিয়া যায় ; তাহাদের প্রাণে, তাহা-

দেয় মর্মে তাহা প্রবিষ্ট হয় না। তাহাদের জীবনের সঙ্গে তাহা মিশিয়া যায় না। তাহাদের মস্তকের উপর এত উচ্চ আকাশে তাহাকে রাখা হয় যে, তাহারা তাহার আর নাগাইল পায় না।

এই জ্ঞানমূলা ভক্তি শাস্ত্রাদি লব্ধ বহুবিধ জ্ঞানের উপর প্রতিষ্ঠিত হইলেও, তাহা বিগুহ জ্ঞানের আকর নহে। সে জ্ঞানে হৃদয়ের ঐচ্ছিক হয় না, মনের সংশয়জাল দূরীকৃত হয় না। সে জ্ঞান পার্থিব পদার্থ; স্বর্গের অপ্রাকৃত ধন নহে।

প্রকৃত পরাভক্তি এই অপার্থিব স্বর্গীয় জ্ঞানের আকর। তাহা অন্তরের কোন অগাধ অতল প্রদেশের অপরিজ্ঞাত মূল হইতে স্বতঃস্ফূর্ত হইয়া হৃদয়কে পরিপূর্ণ ও স্নিগ্ধ করতঃ উজ্জ্বল পথে স্বতঃপ্রবৃত্ত হইয়া ধাবিত হয়। ইহাই অহেতুকী ভক্তি নামে সমাদৃত হইয়া থাকে। এই ভক্তি বহির্দেশে উচ্ছ্বাস য়ী ও অন্তর্দেশে বিগুহ জ্ঞানময়ী। এই জ্ঞান শাস্ত্রাধ্যয়ন বা হৃদ্যর্শন সম্বৃত নহে। ইহা এই পরাভক্তির সহজাত। অগ্নির ঈশোক ও উত্তাপ বহির্দেশে অভিব্যক্ত থাকে, কিন্তু তাহার গহ্বরী শক্তি অন্তর্দেশে অব্যক্ত থাকে; তেমনি এই অহেতুকী মক্তির বাহিরে উচ্ছ্বাস, কিন্তু অন্তরে বিগুহ জ্ঞান। যে ভক্তির অন্তর্দেশে অপ্রাকৃত স্বর্গীয় জ্ঞানের আকর নাই, তাহা অহেতুকী গতি নহে।

এই অপ্রাকৃত পরাভক্তি involuntary অকাম-প্রসূতা, এবং spontaneous স্বতঃসিদ্ধ। ইহা স্বতই উৎপন্ন হয়। ইহা আপনি উঠে, আপনি বেটে, নিবারিতে নায়ে কেউ। ইহা ব্রহ্মস্বর ভাব স্বতঃ-প্রকাশ।

ইহা বখাওঁই পতিতপাবনী গঙ্গা। বিকুপসে ইহার উৎপত্তি,

মৃত্যুঞ্জয় শিবের মস্তকে ~~ইহঁার~~ সর্বকাল অবস্থিতি । গাগরাভি-
মুখে ইহঁার গতির কণকালের জন্তও বিরাম নাই । ইহঁার বিম্ব
স্পর্শে জীব পবিত্র হয়, তাহার ত্রিতাপের শাস্তি হয় । এই
পতিতপাবনী স্রোতস্বতীতে যে কোন প্রবাহিনী আসিয়া পতিত
হয় তাহা বিম্বজ্ঞা ভক্তিতে পবিত্র হয় ।

ইহা স্বার্থই পরব্রহ্মের নির্মল প্রকৃতি, তিনি ইহঁার দিব্যাজে
নিত্যকাল বিহার করেন । তিনি কোথাও ইহঁাকে ছাড়িয়া
প্রকাশিত হন না ; এই ভক্তিও কোথাও তাঁহা হইতে স্বতন্ত্র
হইয়া থাকেন না । উভয় পরস্পরের নিত্যসঙ্গী । একটুকালে
এই উভয়ের যুগল স্ব কুয়াপিও ভঙ্গ দৃষ্ট হয় না ।

এই পরা ভক্তি সেই পরম পুরুষের উত্তমাজ । তিনি এই
নির্মল দেহের অন্তরাশ্রয় । এই উত্তমাজেই তাঁহার সর্বোত্তম
লীলা । ইহঁাতেই তাঁহার জীড়া ও রতির সর্বোত্তম স্বর্গ ।
তিনি এই নির্মল দেহের অঙ্গ-কান্তি, এই অপ্রাকৃত পুণ্যের
অপ্রাকৃত সৌরভ, এই অপ্রাকৃত আবির্ভাবের অপ্রাকৃত মন্দির ।
তিনি এই দেহের সঙ্গে অভেদ ।

এই অহেতুকী পরা-ভক্তির স্বভাবতই যুগল মত্রে উপাসনা ।
ইনি যেমন পরব্রহ্মের অমুরাগী, তেমনি মানুষেরও অমুরাগী ।
ইনি একটাকে ছাড়িয়া, অপরটার অভিমুখে ধাবিত করেন না ।
ইনি এক সঙ্গে অসংখ্যে অতলান্তিমুখী ভোগবতী, উর্দ্ধদিকে
ব্রহ্মাভিমুখী মলাকিনী, এবং ইহ সংসারে জনগণাভিমুখী ভাবি-
নীরী । ইহঁার নির্মল দৃষ্টিতে সংসার-কর ব্রহ্ম-কেন্দ্রাকার ধারণ
করিয়া থাকে । এ দৃষ্টি এই সংসার-তরুর যে কোন স্থানে
পতিত হয়, সেখানে সেই দৃষ্টিতে নির্মল ব্রহ্মকল করিয়া প্রকাশ

শায়। এই অপ্রাকৃত পরাভক্তির সকল স্থানেই, সকল ঘটেই ইষ্টক্ষুণ্টি হইয়া থাকে।

এই সুহৃৎভা পরাভক্তির দৃষ্টি ও অমুরাগ এইজন্ত সর্বদাই দৃশ্য বর্তমানের অভিযুধিন্, অদৃশ্য অমুমানের অভিযুধিন্ নহে। যিনি উন্মীলিত চক্ষে দৃশ্য বর্তমানে সেই নিশ্চল বস্তুকে ধরিতে পারেন, তাঁহার নিমীলিত নেত্রে অদৃশ্য অমুমানের দিকে তাকা-ইবার প্রয়োজনাতাব। এই জন্ত ইহার অদৃষ্টেরও ভাবনা নাই, দৃশ্যমানেরও পূজা নাই। “অদৃষ্টেরও ভাবনা নাস্তি, দৃশ্যমানং ন পূজয়েৎ।” ইহার ঠাকুর অন্তরেও নিরুদ্ধ নহেন, বাহিরেও আবদ্ধ নহেন। তিনি একসঙ্গে ইহার অন্তরের ভাব ও বাহিরের আবির্ভাব। তিনি একসঙ্গে ইহার অন্তরে সংস্থিত থাকিয়া বাহিরে বর্তমান। এই পরাভক্তি কখনও শুদ্ধ অন্তরের অমুভাবে উদয় হন না, এবং কখনও শুদ্ধ বাহিরের আবির্ভাবেও প্রকাশ পান না। এই যুগল ভাব অভঙ্গরূপ ক্ষুণ্টি প্রাপ্ত না হইলে, এই পরাভক্তি চক্ষু উন্মীলন করিয়া চাহিয়া দেখেন না। বাহ্য শুদ্ধ অন্তরে খুঁজিয়া, পাওয়া যায়, বাহিরে খুঁজিয়া পাওয়া যায় না, অথবা বাহ্য শুদ্ধ বাহিরে খুঁজিয়া পাওয়া যায়, অন্তরে খুঁজিয়া পাওয়া যায় না, তাহা পরাভক্তির ভগবান নহেন। পরাভক্তির ভগবান যেমন অন্তরের দেদীপ্যমান অগ্নি, তেমনি বাহিরের অতুজ্জল আলোক। এই অপ্রাকৃত অগ্নি ও আলোকে ত্রিতাগ সুশীতল হয়। এই পরাভক্তির ভগবান, অন্তরে সচ্চিদানন্দ ব্রহ্ম ও তৎসঙ্গে বাহিরে সচ্চিদানন্দ বিগ্রহ। এই পরাভক্তির উচ্ছ্বাসের সঙ্গে সঙ্গে কত সত্তা, কত ভব, কত বেদ, কত বেদান্ত নিরন্তর উচ্ছ্বাসিত হইয়া থাকে; বাহিরের বেদ বেদান্তের প্রতি ইহার স্তম্ভ অমুরাগ নাই।

এই পরাভক্তি ~~নিমিত্ত~~ ঋণদারে অস্থির। ইনি “সবাকার ঋণী”, সকলের নিকট ঋণগ্রস্ত। ইনি এইভাবে, সর্বদাই জড়সড়। ইনি যাবজ্জীবন এই ঋণ পরিশোধের চেষ্টা করেন, কিন্তু পরিশোধ করিতে আপনাকে নিতান্ত অসমর্থ দেখিয়া সর্বদাই কাতর। ইনি প্রত্যেকের সম্বন্ধে “a debt immense of endless obligation” অনুভব করিয়া থাকেন। ইনি যথাসর্বস্ব দান করিয়াও,—প্রাণ ঢালিয়া দিয়াও ঋণদার হইতে মুক্ত হইতে সমর্থ হন না,—কিছু শোধ দিলাম বলিয়া অনুভব করিতে পারেন না। ইনি যেন সকলের ধন গচ্ছিত রাখিয়াছেন এবং সেই ভাবে আপনাকে ভারাক্রান্ত অনুভব করিতেছেন। ইনি তোমার ধন তোমাকে দিয়াও সমস্ত পরিশোধ হইল না দেখিয়া, তোমার দাসত্ব করিতে প্রস্তুত। জ্ঞান বেথানে আপনার স্বর্গীয় অধিকার হৃদয়ে উপলব্ধি করিয়া আপনার স্বর্গীয় সনন্দ শিরজ্ঞাণে বাধিয়া ধর্ম প্রচারে প্রবৃত্ত হন, এই পরাভক্তি সেখানে লোকের অপরীক্ষাধীনীর ঋণ পরিশোধার্থ “ব্রহ্মার দুর্লভধন” মুক্ত হৃদয়ে বিলাইয়াও স্বকীয় ঋণভার মোচন হইতেছে না দেখিয়া হার ভায় করিতে থাকেন।

এই পরাভক্তি অক্ষুণ্ণ সচৈতন্য। ইনি জীবের জাগ্রত, স্বপ্ন ও সুষুপ্তি, এই তিন অবস্থাতেই চৈতন্য বিশিষ্ট। ইহার সংসার-স্বপ্ন ভঙ্গ হইয়াছে। ইহার সংসার প্রবৃত্তির নিবৃত্তি হইয়াছে। ইহার রক্ষুতে সর্প ভ্রম,—জ্যোতিতে অন্ধকার দর্শন তিরোহিত হইয়াছে। সংসারের ধন, জন, ঐশ্বর্যের মোহিনীশক্তি ইহাকে আবরিত বা বিক্ষিপ্ত করিতে পারে না। সংসারের বিভীষিকা ইহাকে ভয় প্রদর্শন করিতে সমর্থ হয় না। ইনি কার্যহিতা হইয়াও স্বাভাবিক পরপারে সর্বদা বাস করেন।

এই পরাভক্তি জীবদশা থাকিলে মৃত্যুভীতি পান না। ইনি মৃত্যুঞ্জয় শিবেরই শিরোভূষণ। বাহারক জীবত্ব অন্ত হইয়াছে ইনি তাঁহাকে নবজীবনে প্রতিষ্ঠিত ও শিবচৈতন্তে ভূষিত করিয়া থাকেন ; ইনি ক্লেশ-হত যীশুকে পুনরুৎপাদিত করিয়া খ্রীষ্ট পদে প্রতিষ্ঠিত করেন। ইনি মরণধর্মশীল জীবের জীবত্ব নাশ করিয়া শিবত্বদানে মৃত্যুঞ্জয় করেন।

এই পরাভক্তির গাঢ়তাই প্রেম এবং প্রেমের গাঢ়তাই মহাভাব নামে অভিধেয় হইয়া থাকে।



দ্বাদশ পরিচ্ছেদ ।

হিন্দু ও যীহুদা জাতীর বিশেষ ধর্মভাব ।*

মহানুভব লোকদিগের প্রকৃতিতে এক একটা বিশেষ স্বর্গীয় ভাব থাকে । তাঁহাদিগের প্রত্যেককেই সেই সেই ভাবের এক একটা অবতার বলিলে বলা যায় । তাঁহাদের প্রকৃতির গঠনে সেই বিশেষ ভাবই প্রধান উপকরণ ;—সেই ভাব তাঁহাদের হৃদয়ে সর্বদা জাগ্রত, সর্বদা জীবন্ত । তাঁহাদের আত্মা তন্ময় ও তদগদ । তাঁহাদের সমস্ত জীবন সেই ভাবের সাধন ও প্রচারে অতিবাহিত হয় । তাঁহাদের সকল চিন্তা, সকল কামনা ও সকল কার্য্য সেই ভাবের দিকেই উন্মুখ থাকে । সমস্ত সংসার তাঁহাদের সেই ভাবের সম্পাদনে সহায়তা করে । মানবীয় কার্য্যক্ষেত্রের যাবতীয় বিভাগেই, বিশেষতঃ ধর্মবিভাগে এক্রূপ মহানুভব মহাপুরুষদিগের (মধ্যে মধ্যে যখন প্রয়োজন হয়) আবি-

* সমদর্শী,—১৭২৭ শক, আষাঢ় । আশা,—১৮১৪ শক, জ্যৈষ্ঠ হইতে আশ্বিন ।

“সমদর্শী”-সম্পাদক এই প্রস্তাবের গ্রহণ অংশ হারাইয়া কেনেন, সুতরাং ইহা তখন উক্ত পত্রে প্রকাশিত হয় নাই । সম্প্রতি তাহা প্রতি-
প্রসূত হইয়া “অশাতে” প্রকাশিত হইয়াছে ।

ভাব হইয়া থাকে। ঈশ্বরের অক্ষয় সত্যসম্বন্ধে বহন করিয়া পৃথিবীতে আনিয়া তাঁহারা সংরোপণ করেন এবং কৃতজ্ঞ পৃথিবী চিরকাল ধরিয়া সেই স্বর্গীয় বীজ অতি যত্ন পূর্বক রক্ষণ ও পোষণ করে। সে বীজ ক্রমশঃ অঙ্কুরিত ও বর্দ্ধিত হয়, এবং অমৃত ফল প্রসব করিয়া জগতের লোকদিগকে সত্যান্ন পরিবেশন করে। ধুরন্ধর মহাপুরুষদিগের ত্রায় ধুরন্ধর জাতি সমস্তও অমুরূপ বিশেষ ভাব সম্পন্ন। কোন কোন বিশেষ ভাব কোন কোন শ্রেষ্ঠ জাতির মধ্যে অঙ্কুরিত ও পরিবর্দ্ধিত হইয়া কালক্রমে অগ্রাগ্র জাতির মধ্যে প্রবেশ করিয়াছে। সেই সেই জাতি ঈশ্বরের ত্রায় তাহাদের হৃদয়জাত বিশেষ ভাব অগ্রাগ্র জাতিদিগকে শিক্ষা দান করেন। এইরূপে পরস্পরের স্বেপার্জিত সত্য-পুঞ্জ পরস্পরে শিক্ষা করিয়া উন্নতির সোপানে অধিরোহণ করিয়া থাকেন। ধর্ম্ সম্বন্ধে হিন্দু ও যীহুদা জাতিদ্বয় সর্ব্ব প্রধান বলিয়া প্রসিদ্ধ। বাস্তবিক পূর্ব্বকালীন ধার্ম্মিক জাতিদের গণনার মধ্যে সর্ব্ব প্রথমেই ঐ দুই জাতিকে স্মরণ করিতে হয়। উহাদের প্রকৃতি-সম্মত বিশেষ ধর্ম্মভাব হইতে যে দুই পুরাতন ধর্ম্মপ্রণালী অভ্যুদিত হইয়াছে, তাহাদের একটা না একটা কোন না কোন প্রকারে প্রায় পৃথিবীর সর্ব্বত্রই গ্রাহ্য হইয়াছে। যীহুদা ধর্ম্ম হইতে খ্রীষ্ট ও মুসলমান ধর্ম্ম, এবং হিন্দু ধর্ম্ম হইতে বৌদ্ধ ধর্ম্ম উৎপন্ন হইয়া সমস্ত সত্য সমাজে আধিপত্য স্থাপন করিয়াছেন। এই দুই পুরাতন ধর্ম্ম-মূলে যে অগণন সত্যরত্ন নিহিত থাকিবে, তাহা বিচিত্র কি ?

ভারতবর্ষীয় আৰ্য্যদিগের বিশেষ ধর্ম্মভাব হইতে যীহুদা দেশীয় বিশেষ ধর্ম্মভাব সম্পূর্ণ স্বতন্ত্র। প্রথমটা ধ্যান-ধারণা-প্রধান ;

দ্বিতীয়টি অল্পাধিকমুখ্য প্রথমটি তন্ময়তা, একাগ্রমনা হইয়া, শাস্ত সমাহিত হইয়া অহর্নিশ সেই অনন্তের প্রেমে ও ধ্যানে নিমগ্ন থাকিতে অরুণোদয় করে; দ্বিতীয়টি ঈশ্বরের ধর্ম্যাদেশ পালনে নিয়োজিত করে। “ধ্যানে নিমগ্ন হও”—ভারতবর্ষীয় আৰ্য্য ঋষিগণ এই দৈববাণী বিশেষরূপে শ্রবণ করিয়াছিলেন; “আদেশ পালন কর”—য়ীহুদা দেশীয় ঋষিগণের শ্রবণ-কুহরে এই দৈববাণী বিশেষরূপে প্রবিষ্ট হইয়াছিল। আৰ্য্যোরাও, আদেশ পালন করিতেন, য়ীহুদারাও ধ্যান করিতেন; কিন্তু ঐ উভয় জাতির বিশেষ ধর্ম্যভাব স্বতন্ত্র পথে পরিভ্রমণ করিয়াছিল। একটা পবিত্র মন্দাকিনীর ত্রায় উর্দ্ধমুখে স্বর্গলোকে পুষ্পকাননে গিয়া বিচরণ করে, অপরটা ভাগিরথীর ত্রায় নিম্নগামী হইয়া ধরাপৃষ্ঠে শত শত জনপদকে উর্বর ও ফলশালী করিয়া পরিভ্রমণ করে। এই পুরাতন জাতিদ্বয়ের প্রকৃতিগত বৈলক্ষণ্যহেতু বিশেষ ভাবগত এই বৈলক্ষণ্য সম্ভাবিত হইয়াছে, কিন্তু ঐ উভয়-বিধ বিশেষ ভাব বিভিন্ন পন্থার অনুসারী হইলেও তাহাদের মূলে কোন বৈলক্ষণ্য নাই। উহাদের মূলদেশ এক। ধর্ম্যরূপ মহী-রূহের মূলভাগ পৃথিবীর অভ্যন্তর মধ্যে সর্বব্যাপী হইয়া রহিয়াছে। কোন দেশে কোন স্থানে তাহার অস্তিত্বের অভাব নাই। সেই মূল সর্বত্র অলঙ্কিতরূপে নিহিত। পৃথিবীর সকল জাতি তাহার উপকার অল্লাধিক লাভ করিয়াছে, কোন দেশ বা জাতিকে তাহা হইতে বঞ্চিত হইতে হয় নাই। জল বায়ুর ত্রায় তাহা সর্বত্রই অব্যক্ত বা অল্লায়াস লভ্য হইয়া রহিয়াছে। কিন্তু সেই মূলদেশ হইতে বিশেষ বিশেষ শাখা সমূহ দেশ বিশেষে, কাল ও অবস্থা বিশেষের অনুগত হইয়া মৃত্তিকা উদ্ভিন্ন করতঃ

আকাশমার্গে উখিত হইয়াছে এমন-শাখার উর্বরতা শক্তি পরিচয় প্রদান ও পৌরব প্রতিপন্ন করিতেছে । তন্মধ্যে দুইটা প্রকাণ্ড শাখা, একটা আৰ্য্যাবর্তে, একটা যীহদা দেশে অক্ষয় বটবৃক্ষেব জায় সমুখিত হইয়া স্তম্ভ পবিব্যাপ্তি হইয়া রহিয়াছে ।

এই শাখাদ্বয়ের প্রশাখা হইতে শত শত প্ররোহ (নামনা) নামিয়া শত শত দেশেব ভূপৃষ্ঠে নিপতিত হইয়াছে এবং তাহা-দিগকে অধিকাব ও আচ্ছন্ন করিয়া ফেলিয়াছে । যে সমস্ত দেশে এই সকল প্রবোহ স্ব স্ব মূলদেশ প্রোথিত কবিয়া বসিয়াছে, সেই সমস্ত স্থানে তাহাদেব তেজঃপ্রভাবে পূর্বোৎপন্ন শাখা সমূহ বিনষ্ট হইয়াছে, এবং ভূগর্ভস্থ মূল দেশ হইতে নূতন শাখাও সমুৎপন্ন হইতে পারে নাই । যে সকল দেশে পূর্বোক্ত প্রকাণ্ড শাখা দ্বয়ের অধিকাব বিস্তৃত হয় নাই, সেই সেই স্থানে অনেকানেক ক্ষুদ্র ক্ষুদ্র শাখাও শীর্ষোস্তোলন করিয়াছে বটে ; কিন্তু তাহাবা এত ক্ষুদ্র যে, সচবাচব গণনাস্থলে আইসে না । এই শাখাগুলি বিশেষ বিশেষ দেশেব বিশেষ বিশেষ ধর্ম্মভাব । বিশেষ ধর্ম্মভাবে কোন দুই জাতির ঐক্য নাই । শাখা সমূহের মূল ভূগর্ভে নিহিত বলিয়া লোকে অজ্ঞান বশতঃ স্ব স্ব শাখা বিশেষের পক্ষপাতী হইয়া সাম্প্রদায়িক ও অমুদাবভাবে শাখা-স্তরকে ধও ধও করিবার জন্ত অল্প ধারণ কবে, কিন্তু সময়ে কখন সেই ভূমধ্যস্থ বিরাট বৃক্ষমূল নৈসর্গিক উন্নতির নিয়মানু-সারে ভূপৃষ্ঠ উদ্ভিন্ন করিয়া প্রকাশিত হইবে এবং লোকে জ্ঞান-লোকে স্পষ্টই দেখিতে পাউবে যে, একই মূল হইতে সেই সমস্ত শাখা উৎপন্ন, তখন বিবাদ বিষম্বাদ দূরে থাকুক, বিশেষ বিশেষ

শাখা বিশেষ বিশেষ সম্পন্ন হইয়া বা জাতির নিজস্ব থাকিবে না। সমুদায় শাখাই তখন এক বিশাল বৃক্ষের অঙ্গরূপে যাবতীয় মানব জাতির সাধারণ সম্পত্তি বলিয়া স্বীকৃত হইবে এবং সকল প্রকার সঙ্কীর্ণতা চলিয়া যাইবে। তখন লোকে অঙ্গধারণ করিবে বটে, কিন্তু সে কেবল যে সমস্ত ভ্রম ও কুসংস্কারের কণ্টকীলতা দ্বারা পূর্বোক্ত শাখা প্রশাখা সমূহ সমাকীর্ণ হইয়া পড়িয়াছে, তাহাদিগকে খণ্ড বিখণ্ড করিবার জন্ত,—বিজাতীয় সত্যকে উন্মূলিত করিবার জন্ত নহে। বর্তমান সময়ে উন্নিখিত শুভদিনের সুপ্রভাতের লক্ষণ সকল চতুর্দিকে লক্ষিত হইতেছে।

হিন্দু ও যীহুদা এই উভয় জাতি তাহাদের স্ব স্ব বিশেষ ধর্ম্য-ভাবের বশবর্তী হইয়া পরস্পরে স্বতন্ত্র নির্দিষ্ট সাধন পন্থায় পরি-ভ্রমণ সময়ে ধর্ম্মরাজ্যের যে সকল নিগূঢ় সার সত্য আবিষ্কার পূর্বক ভাবী বংশ সকলের জন্ত পুরাবৃত্তের সুবিস্তৃত ভাণ্ডার বহু পূর্বক সংগ্রহ ও রক্ষা করিয়া গিয়াছেন, নিরপেক্ষ ভূমিতে দণ্ডায়মান হইয়া তাহার আলোচনায় প্রবৃত্ত হওয়া বাইতেছে।

আর্য্যাবিরা তাহাদের বিশেষ ভাব ধ্যান ধারণাকে সম্মুখে রাখিয়া ধর্ম্ম-রাজ্যে প্রবেশ করিয়াছিলেন। যাহারা নিমীলিত নয়নে সাধনা করেন, তাঁহারা অচিরে বহির্জগতের প্রতি নিদ্রিত কিন্তু অন্তর্জগতের প্রতি জাগ্রত—কর্ম্মের প্রতি নিশ্চেষ্ট কিন্তু চিন্তার প্রতি তৎপর হইয়া পড়েন। ভারতবর্ষীয় আর্য্যদিগেরও সেই দশা ঘটিয়াছিল;—তাঁহারা যে সমস্ত অমূল্য সত্যরত্ন উপা-র্জন করিয়াছিলেন, তাহার অধিকাংশই চিন্তালব্ধ,—কর্ম্মলব্ধ অতিঅল্পাংশ মাত্র। অন্তরের মধ্যে হৃদয়ের নিহিত স্থানে সেই অন্তরতম প্রিয়তম পরব্রহ্মকে সাক্ষাৎ প্রত্যক্ষ করিয়া তাঁহারা

অনন্ত জ্ঞান-সমুদ্রে অমুকণ নিমগ্ন থাকিবার জন্ত, তাঁহাকে প্রাণের প্রাণ, আত্মার অন্তরাত্মা রূপে হৃদয়ের অতি নিকটে সর্বদা অমৃত্তব করিবার জন্ত, আপনাকে ভুলিয়া, জগৎ সংসারকে ভুলিয়া সেই আনন্দ স্বরূপের আনন্দরস পানে অভিভূত হইবার জন্ত, তাঁহাদের সকল চেষ্টা যে সর্বত্রই নিয়োজিত হইয়াছিল সে কেবল ধ্যানের প্রভাবে। তাঁহাদের দিব্য-চক্ষে ঈশ্বর কোন দূরস্থ বাহ্যিক পদার্থ ছিলেন না, কোন বজ্রবর্ষী ক্রোধাবতীর ভীষণ কালান্তক রুদ্র ছিলেন না, কোন পুরাণ-কল্পিত সীমাবিশিষ্ট হস্ত পদাদি যুক্ত মানবাকৃতি ছিলেন না, ছায়ার স্থায় মৃত্যুর প্রতিকৃতি কোন অবাস্তবিক পদার্থ ছিলেন না; তাঁহারা তাঁহাকে অতি নিকটস্থ জানিয়া, অন্তরের অন্তরস্থ জানিয়া, মঙ্গলালয় স্বল্প অপাপবিদ্ধ ও রসস্বরূপ জানিয়া, অনাদ্যনন্ত অতীন্দ্রিয় অখণ্ড সত্যের সত্য জানিয়া—“করতল-শ্রুত অমলকবৎ” তাঁহাকে বিশ্বাস হস্তে স্পর্শ করিতে ও জ্ঞান চক্ষে দর্শন করিতে গিয়া-ছিলেন। ইহা নিঃসংশয়ে বলা যাইতে পারে, যে আর কোন পুরাতন জাতি ঈশ্বর বিষয়ক আধ্যাত্মিক তত্ত্ব, এতদূর পর্যন্ত হৃদয়ঙ্গম করিতে পারেন নাই। চারিদিকে ঈশ্বরের উজ্জল সত্তা উপলব্ধি করিয়া সমস্ত হৃদয়ের সহিত অগ্নিময় জীবন্ত বাক্যে তাঁহাকে “সত্যঃ” “সত্যস্ত সত্যঃ” বলিতে আর কোন্ জাতি পারিয়াছেন? আর কোন্ জাতি আধ্যাত্মিক রাজ্যে তাঁহাকে “এত সুস্পষ্টরূপে নিরীক্ষণ করিয়া জীবনপূর্ণ তেজঃপূর্ণ বাক্যে “প্রাণের প্রাণ” “অন্তরের অন্তরাত্মা” বলিতে সমর্থ হইয়াছিলেন? আর কোন্ জাতি জীবন্ত বিশ্বাসের সহিত তাঁহাকে “পরমগতি” “পরমসম্পদ” “পরমলোক” ও “পরমানন্দ” জানিয়া একমাত্র

কেবল তাঁহাতেই ইহলোক ও পরলোক সাধন করিয়া ছিলেন? আর কোন্ জাতি তাঁহার পবিত্র সহবাসে ভোগতৃপ্ত হইয়া আত্মার অতি গভীর প্রদেশ হইতে তাঁহাকে “আনন্দস্বরূপ” “রসস্বরূপ” বলিয়া উপভোগের বিষয় করিতে শক্ত হইয়াছিলেন? পৃথিবীর পুরাবৃত্ত সকল এ প্রশ্নে নিরুত্তর থাকিবে সন্দেহ নাই। বাস্তবিক জৈশ্বের অনন্ত পূর্ণভাব, যাহা তাঁহার স্বরূপ লক্ষণ হইতে প্রত্যাহার করিয়া লইলে তাঁহার জৈশ্বর্য বিলুপ্ত হয়, তাহা সর্বপ্রায়ে আর্য্য-হৃদয়ে পরিষ্কৃষ্ট হইয়াছিল। সত্য বটে আর্য্যগণ প্রকৃত সত্যের অর্দ্ধাবয়ব মাত্র দর্শন করিয়াছিলেন, অপরাধী তাঁহাদের আধ্যাত্মিক নেত্র পথে পতিত হয় নাই। তাঁহারা জৈশ্বর লাভের সম্পূর্ণ ভাব বুঝিতে পারেন নাই। নিরবচ্ছিন্ন কেবল জৈশ্বেরেতে নিমগ্ন থাকাই তাঁহাদের জৈশ্বর লাভ। তজ্জন্ত জীবনের সঙ্গে তাঁহাকে সম্বন্ধ ও সম্মিলিত করা তাদৃশ আবশ্যক নহে। জীবনের প্রকৃত লক্ষ্য সম্যকরূপে তাঁহাদের দৃষ্টিপথের অন্তর্ভূত হয় নাই। কর্মক্ষেত্র হইতে প্রস্থান করিয়া অনন্তের ধ্যানে নিবিষ্ট হওয়াই তাঁহাদের জীবনের লক্ষ্য, কিন্তু তৎসাধনার্থ বিশ্বস্ত ভূত্যের ছায় তাঁহার আদেশ পালন ও প্রদত্ত ভার মস্তকে বহন করা তাদৃশ প্রয়োজনীয় নহে। তাঁহারা জৈশ্বর সাধন করিতে গিয়া সংসার সাধনের আবশ্যকতা হৃদয়ঙ্গম করিতে পারেন নাই। তাঁহার সহিত নিগূঢ় যোগ স্থাপন করিতে গিয়া মল্লয়া সাধারণের সহিত ছুচ্ছেদ্য সম্বন্ধ বিদ্যুত হইয়াছিলেন। ধ্যানের রাজ্য সংসারের অতীত। সে রাজ্য নির্জন। সেখানে সকলেই একাকী। সেখানে ভাই বন্ধু দারা মৃত কেহই নাই। সে রাজ্যের ব্যাপার আলোকেও প্রকাশ করিতে পারেনা, অন্ধ-

কারেও আচ্ছন্ন রাখিতে পারে না। সেখানে কেবল আমি ও আমার
 প্রাণের প্রাণ, জীবনের জীবন, ও অন্তরের অন্তরাত্মা। এ রাজ্যের
 নাথকেরা বাহিরের সমস্ত বিষয় হইতে বিচ্ছিন্ন, তাঁহাদের সঙ্গী
 নাই, সহচর নাই। তাঁহারা সকলে স্ব স্ব প্রধান, পরস্পর কেহ
 কাহাকে দেখে না, কেহ কাহারও মুখাপেক্ষা করেন না।
 এরা জ্যেষ্ঠ গুরু নাই, শিষ্য নাই নেতা নাই অনুযাত্রী নাই।
 এরা জ্যেষ্ঠ সকলেই স্বতন্ত্র, প্রত্যেকেই আপনার জন্ত জৈশ্বরের নিকট
 যান, কেহ কাহাকে লইয়া নহে। এরা জ্যেষ্ঠ জৈশ্বর ও মহাব্যের
 মধ্যে কোন ব্যবধান নাই, মধ্যবর্তী নাই। নিরবলম্ব ব্রহ্মযোগই
 এ রাজ্যের আদ্যন্ত। আর্য্যভূমি ভারতবর্ষে কখনই যে ঐক্য
 স্থাপন হইতে পারে নাই, আর্য্য জাতির অন্তরস্থ এই বিশেষ ভাবই
 এ বিষয়ে প্রধান প্রতিবন্ধক ছিল। কৰ্ম্ম কৈত্রেই ঐক্য বন্ধনের
 আবশ্যকতা অনুভূত হয়, কৰ্ম্মকৈত্রেই জাতিগত বন্ধনের
 সূত্রপাত হয়। কৰ্ম্মকৈত্রেই জৈশ্বকে স্বজাতির নিজস্ব
 সম্পত্তি বলিয়া বোধ হয়। ধ্যানের রাজ্যে সংসার সাধন নাই,
 ঐক্য বন্ধন নাই, সাধারণ উপাসনা নাই, সাধারণ উৎসব
 নাই, উপাসনা ও উৎসবের জন্ত সাধারণ মন্দির নাই।
 এই সকলের অসত্তাবে ভারতবর্ষে জাতিগত বন্ধনের ব্যাঘাত
 হইয়াছে। হিন্দুরা কখনই এক জাতির অন্তর্গত ছিলেন না। বহু-
 কাল হইতে তাঁহারা বহুজাতিতে বিভক্ত। তাঁহাদের মধ্যে নানা
 জাতি, নানা সম্প্রদায়, নানা বর্ণ ও নানা উপবর্ণ পরস্পরের এত
 বিচ্ছিন্ন ভাব বিদ্যমান যে, তেমন আর কোথাও নাই। তাঁহা-
 দের মধ্যে সাধারণ ভাবের উদ্বোধন হয় নাই। তাঁহাদের একত্ব
 বন্ধন না থাকাতে ভারতভূমি বহুকালাবধি পরহস্তগত হইয়া

হিন্দু ও যীহুদা জাতির বিশেষ ধর্ম্যভাব । ১৭

রহিয়াছে, কিন্তু তজ্জন্য কাহারও ক্রক্ষেপ নাই, ক্ষতি নাই, হুঃখ নাই । এজন্য ভারতবাসী আৰ্য্যসন্তানেরা একদিকে অনেকটা স্বার্থপর হইয়া পড়িয়াছেন । ঈশ্বরের সহিত সম্যক্রূপে সংযুক্ত হওয়াই যখন প্রধান সাধন, তখন চিত্তশুদ্ধির আবশ্যিকতা অবশ্যই মানিতেন ; কিন্তু তাহার অর্থ সংকীর্ণ ও অপ্রশস্ত ভাবে গৃহীত হইত । তাহা অভাব পক্ষে,—ভাব পক্ষে নহে । ইঞ্জির নিগ্রহ, পাপত্যাগ ও মনের একাগ্রতা সাধনই তাঁহাদের তহুদ্দেশে কেবল মাত্র তপস্যা ছিল । সংসার হইতে প্রতিনিবৃত্তি হেতু বিস্মৃত ও উপযুক্ত ক্ষেত্রের অসম্ভাবে কেবল অন্তরের মধ্যে সে তপস্যা বদ্ধ ছিল, স্মৃতিরাত্ন সর্বদা তাহা সম্পূর্ণ সফল হইত না । আৰ্য্য ঋষিরা ধ্যান-পথবর্তী ঈশ্বরকে নিশ্চেষ্ট ও নিষ্কর্ম্ম দেখিতেন, এবং এই একদেশদর্শী দৃষ্টি ও বিশ্বাসের অবশ্যস্ভাবী অনিষ্টময় ফল তাঁহাদের জীবনে ফলিয়াছিল । তাঁহারা তন্নিমিত্ত কার্য্য হইতে সর্বপ্রযত্নে অবসর গ্রহণ করিতেন, এবং তন্নিমিত্ত ঐতিহাসিক ঘটনার স্রোতে ঈশ্বরের মঙ্গল হস্ত ও তাঁহার জীবন্ত সত্ত্বা উপলব্ধি করিতে শিক্ষা করেন নাই । ঘটনার নিয়ন্তা বলিয়া, জীবনের নেতা বলিয়া, সম্পদের সহায় ও বিপদের কাণ্ডারী বলিয়া একান্তমনে তাঁহার উপর নির্ভর করিতে তাঁহাদের সাধন হয় নাই । ঈশ্বরের বিশেষ করুণার প্রতি বিশ্বাস স্থাপন করিবার স্থলও তাঁহারা প্রাপ্ত হন নাই । সেই অগম্য, অপার, অনন্ত ও অপারিসীমকে নিজস্ব ধন, নিজস্ব দেবতা বলিতে তাঁহাদের সাহস হয় নাই । সত্ত্বা সম্বন্ধে যিনি নিকট হইতে নিকটে থাকিয়া মহিমা ও উচ্চতাতে দূর হইতেও স্মদ্রে, কেমন করিয়া তাঁহাকে আমার বা আমাদের ঈশ্বর বলিয়া সম্বোধন করিতে পারেন, তাহার পথ তাঁহারা

দেখিতে পান নাই। তাঁহারা যে বিশ্বাসী ছিলেন না, একথা আমরা বলিতেছি না; কিন্তু তাঁহাদের বিশ্বাস কার্যের জগৎ হইতে, ঐতিহাসিক ঘটনার জগৎ হইতে প্রতিনিবৃত্ত হইয়া আধ্যাত্মিক জগতের সত্য স্বরূপ জৈশ্বের জ্ঞানময় সত্যের মধ্যে অনুপ্রবেশ করতঃ এক আশ্চর্য্য মধুর ভাব ধারণ করিয়াছিল। তাঁহারা বিপদের কাণ্ডারী, সম্পদের সহায় ও জীবনের নেতার উপর নির্ভর করিতে না শিখুন ও তাঁহার বিশেষ করুণার দিকে প্রেমার্দ্ৰ হৃদয়ে দৃষ্টিপাত না করুন, (যে পথে সে নির্ভরের ভাব ও বিশেষ করুণার জ্ঞান শিক্ষা হয়, তাঁহারা সে পথ দিয়া যান নাই), কিন্তু সুখ, দুঃখ, সম্পদ ও বিপদকে অনিত্য, অসার ও কল্পনা বোধে বীরের ন্যায় তুচ্ছ করতঃ আনন্দময়ের আনন্দ সাগরে নিমগ্ন থাকিয়া আর এক প্রকার অত্যাচ ও স্বাধীন ভাব প্রদর্শন করিয়াছিলেন। কর্মপথ সুখ দুঃখময়, কিন্তু ধ্যানের পথ সুখ দুঃখের অতীত। তাঁহারা সেই উচ্চস্থলে দণ্ডায়মান ছিলেন, যেখানে সুখ দুঃখের পরিবর্তন-শীল তরঙ্গ উখিত হইতে পারে না। তাঁহাদের জৈশ্ব নিকাম ও নিগুণ। তিনি অব্যক্ত “ব্যক্তরূপ” নহেন, তিনি নিগুণ, শুণ্যস্ব নহেন। তাঁহাদের উপাসনার আদর্শও নিকাম, সে আদর্শের নিকট জগতের মঙ্গল কামনাও কামনা বলিয়া দৃশ্যীয়। বস্তুতঃ তাঁহারা জৈশ্বকেই লক্ষ্য করিতেন, কিন্তু তাঁহাকে অন্য কোন প্রকার লক্ষ্য সিদ্ধির উপায় করিতেন না,—সেই পরম লক্ষ্য ভিন্ন অন্য সকল প্রকার লক্ষ্যকে অন্তরে স্থান দিতেন না। তাঁহাদের জৈশ্ব সর্বকাম-বিবর্জিত, তাঁহার কোন ইচ্ছা নাই; সুতরাং কার্য্যও নাই। তাঁহাদের একমুখ বিশ্বাস, তাঁহারা যে কর্মকাণ্ডকে

হিন্দু ও যীহুদা জাতির বিশেষ ধর্মভাব । ৯৯

নিকট বোধে জীবনের গুরুতর কর্তব্য তার বহন করিতে অস্বীকার করিবেন, তাহা বিচিত্র কি ? তাঁহাদের ঈশ্বর স্নেহ মমতা শূন্য উদাসীন, এজন্য তাঁহার সঙ্গে পারিবারিক সম্বন্ধ উপলব্ধি করিতে পারেন নাই, তিনি দয়াময় পিতা, তিনি স্নেহময়ী মাতা, ইহার তাৎপর্য্য তাঁহাদের হৃদয়ঙ্গম হয় নাই । যাহারা নিকাম উদাসীন ঈশ্বরের উপাসক, মুদ্রিত নয়নে ধ্যানপর না হইলে যাহারা ঈশ্বরের সঙ্গে কোন যোগ স্থাপন করিতে না পারিয়া অন্ধকার দেখেন, কর্মের প্রতি তাঁহাদের আকর্ষণ থাকে কোন প্রকারে সম্ভাবিত নহে । সুতরাং ঈশ্বরের নিকট কার্য্য সিদ্ধির জন্য ধর্মবল প্রার্থনার ভাব আর্ধ্য সম্ভানগণের মনোমধ্যে সম্যক্রূপে বিকসিত হইতে পারে নাই । যেখানে কার্য্যের ঈশ্বরের সঙ্গে যোগ সাধন হয়, সেখানে প্রার্থনার ভাব আপনা হইতে অকুরিত হয় । কার্য্যক্ষেত্র স্বরূপ এই অখিল বিশ্বের প্রতি তাঁহারা যখন নেত্রপাত করিতেন, অলীক ও অনিত্য বোধে ইহা হইতে তৎক্ষণাৎ প্রতিনিবৃত্ত হইয়া নিম্নলিখিত নয়নে হৃদয়ের অন্তঃপুরে সেই সত্যের সত্যকে অম্লসন্ধান করিবার জন্য অভ্যস্ত হইতেন । আর্ধ্য সম্ভান দিগের পক্ষে চিন্তাই সর্বস্ব, কার্য্য অবহেলা । কার্য্য ও ঘটনাকে এতদূর অশ্রেষ্ঠ বলিয়া বিশ্বাস করিতেন যে, তাঁহারা কল্পনাকালে তাঁহাদের অমুষ্ঠিত কার্য্য কলাপ ও পরিদৃষ্ট ঘটনা পুঞ্জের সবিশেষ বৃত্তান্ত লিপিবদ্ধ ও স্মরণীয় করিয়া রাখিবার প্রয়াস পান নাই । কিন্তু চিন্তা ও আধ্যাত্মিক তত্ত্ব সম্বন্ধে এইরূপ তাচ্ছিল্য তাহাদের দৃষ্টিগোচর হয় নাই ; বরং এই সম্বন্ধে তাঁহাদের সমূহ যত্ন ও স্নানোযোগই প্রকাশ পাইয়াছে । তাঁহাদের মানস-ক্ষেত্রের

উপর দিয়া যে সমস্ত চিন্তার হিল্লোল বহমান হইয়াছিল, অতি যত্নে ও সন্তর্পণে তৎসমুদয় রক্ষা ও লিপিবদ্ধ করিয়া রাখা হইয়াছে। তাঁহাদের রচিত কোন ইতিহাস গ্রন্থ দৃষ্ট হয় না, অথচ বহুকালাবধি চিন্তালব্ধ আধ্যাত্মিক তত্ত্ব সকল উপনিষদাদি গ্রন্থে সংগৃহীত দৃষ্ট হইতেছে।

আর্য্যসন্তানগণের নিজ নিজ জীবনের প্রতি দৃষ্টি পতিত হয় নাই, স্মৃতরাং জীবনের আধ্যাত্মিক আদর্শের ভাবও পরিস্ফুট হয় নাই। তাঁহাদের দৈশ্বর ইচ্ছাও কার্য্য হইতে স্বতন্ত্র; স্মৃতরাং তাঁহাকে গুণ্যময় ও পবিত্র বলিয়া তাদৃশ হৃদয়ঙ্গম করা হয় নাই। জীবনের একটা পবিত্র আদর্শের অভাবে পাপপুণ্যের স্পষ্ট ভাব তাঁহাদের মধ্যে বিকশিত হয় নাই। জীবনের একটা পবিত্র আদর্শকে সন্মুখে রাখিয়া পাপকে ষেরূপ ঘৃণা-চক্ষে দেখিতে হয়, ধর্ম্মরাজ্যের রাজা, ধর্ম্মজগতের নিয়ন্তা ও বিচারপতিকে সন্মুখে রাখিয়া ষেরূপ লভ্য ভাবে রাজ্যভার সন্মান করিতে হয়, সে ভাবে তাঁহাদের শিক্ষা হয় নাই। তপশ্চর্য্যার বিদ্বকারী বলিয়া, অতীষ্ট সিদ্ধির প্রতিবন্ধক বলিয়া তাঁহারা পাপকে পরিত্যজ্য মনে করিতেন এবং তাহা হইতে নিবৃত্ত থাকিতে সচেষ্ট হইতেন। পাপের প্রকৃত ভাবও তাঁহাদিগের হৃদয়গত ছিল না। যে ব্যক্তি পাপকে আত্মাত্মিক ঘৃণিত বলিয়া বিশ্বাস করে, তাহারই হৃদয়ে আত্মাহুশোচনার গভীরতা অনুভূত হয়; যে ব্যক্তি পাপকে রাজ্যদেশ উন্নয়ন মনে করিয়া ভীত হয়;—প্রত্যেক পাপের বিচার হইবে, প্রত্যেক পাপের দণ্ড তাহার পশ্চাৎ পশ্চাৎ সমাগত হইবে, ধর্ম্মরাজ্যের রাজার চক্ষে ধূলি দিয়া বা তাঁহার উপাসনা করিয়া ও তোষামোদ করিয়া তাঁহার অমোঘ ন্যায়

হিন্দু ও যীহুদা জাতির বিশেষ ধর্ম্যভাব । ১০১

দণ্ডকে কেহ অতিক্রম করিতে পারে না,—তঁাহার বিচার অতি
শৃঙ্খল, তঁাহার দণ্ড অতি তীব্র, তঁাহার শাসন অতি কঠোর বলিয়া
বাহ্যর বিশ্বাস হয়, সে ব্যক্তিই জানে, পাপ কি ভয়ানক পদার্থ
এবং অনুতাপের অনল কীদৃশ প্রখর ও হুঃসহ । কর্ম্মত্যাগী
হওয়াতে আধ্যাত্মবিগণ আত্মার স্বাধীনতা ও জীবনের গুরুতর
দায়িত্ব সম্যক্রূপে অনুভব করিতে পারেন নাই ; এজন্য পুরুষ-
কারের ভাব তঁাহাদের মধ্যে পরিস্ফুট হয় নাই ; নির্বন্ধ, অদৃষ্ট
বা নিয়তির উপর আস্থা ও নির্ভর তঁাহাদের জীবনে নির্বিবাদে
প্রভুত্ব করিয়াছে । কর্ম্মক্ষেত্রেই আত্মার বল প্রকাশ পায়,
কর্ম্মক্ষেত্রেই আত্মার কর্তৃত্বশক্তি উপলব্ধি হয় । ধ্যানের রাজ্যে
আত্মা সেই অন্তরাত্মার সঙ্গে মিশিয়া আত্মবিস্মৃত হয় এবং
পুরুষকারের জ্যোতিঃ বিলুপ্ত হইয়া যায় । কিন্তু কর্ম্মপন্থী
যীহুদা সাধকদিগের এ সমস্ত ভাব স্বোপার্জিত সামগ্রী ।

যেখানে লোকের ক্রমাগত উচ্চ ও আধ্যাত্মিক দৃষ্টি, যেখানে
কর্ম্মের উপর নিরবচ্ছিন্ন তাচ্ছিল্যভাব, সেখানে ঈশ্বরের বিশেষ
করুণার উপর বিশ্বাসপাত হইতে পারে না,—সেখানে জীবন
ও ইতিহাসের ঘটনাস্রোতে তঁাহার জীবন্ত সত্তা হৃদয়ঙ্গম হইতে
পারে না,—সেখানে অটলভাবে তঁাহার বিধানের উপর দৃষ্টি,
বিশ্বাস ও নির্ভর স্থাপন অসম্ভব হইয়া পড়ে,—সেখানে পাপ
পুণ্যের গুরুত্ব ও প্রার্থনার আবশ্যিকতা বোধ এবং কৃতাপরাধের
জন্য অনুতাপ স্থান পায় না । উর্দ্ধনয়নে চাহিলে, আকাশের
নক্ষত্রপুঞ্জ নিরীক্ষণ করা যায় ; কিন্তু ভূপৃষ্ঠের পদার্থজাত অদৃশ্য
থাকে । উর্দ্ধস্থ ধ্যান-রাজ্যের প্রতি আধ্যাত্মসন্তানগণের দৃষ্টি যে
পরিমাণে আবদ্ধ ছিল, নিম্নস্থ কর্ম্ম-রাজ্যের সত্য পুঞ্জ তঁাহাদের

দৃষ্টি হইতে সেই পরিমাণে অদৃশ্য ছিল। এই পক্ষপাত দৃষ্টি নিবন্ধন তাঁহার ঈশ্বরের অব্যক্ত ও নিগুণ ভাব মাত্র গ্রহণে সক্ষম হইয়াছিলেন,—তাঁহার ব্যক্ত ভাব, তাঁহার সগুণ ভাব গ্রহণ করিয়া সেই ভাবের নিকট শিক্ষালাভ ও সাধনা করিতে সমর্থ হন নাই। ধ্যানের উচ্চ ক্ষেত্রে এই শেযোক্ত ভাবের শিক্ষা ও সাধনা হইবার কোন উপায় নাই। কেবলমাত্র কৰ্ম্মের নিম্ন ভূমিতে তাহার শিক্ষা ও সাধনা হইয়া থাকে। “অব্যক্ত ব্যক্ত রূপায় নিগুণায় গুণায়ান্”—ঐশ্বরিক এই সমগ্রভাব পৌরাণিক যুগেই উপলব্ধ হইয়াছিল। আৰ্য্যদিগের পৌরাণিক সময়ে তাঁহাদের দৃষ্টি এই ব্যক্ত ও সগুণ ভাবের দিকে কতকটা আকৃষ্ট হয়। এই পৌরাণিক নময়ে তাঁহার প্রথম জানিতে পারিলেন যে, পরব্রহ্ম শুদ্ধ অব্যক্ত ও নিগুণ নহেন, শুদ্ধ নির্লিপ্ত ও উদাসীন নহেন, তিনি সঙ্গ সঙ্গ ব্যক্তরূপ ও গুণায়ান্, সংলিপ্ত ও কৰ্ম্ম-শীল। ধ্যানচক্কু কেবল ঐশ্বরিক প্রথম ভাবটী পরিজ্ঞাত হইতে সক্ষম হন, তাঁহার অপর ভাবটীর প্রতি অন্ধ থাকেন। কৰ্ম্মচক্কু কেবল দ্বিতীয় ভাবটী পরিজ্ঞাত হইতে সক্ষম হন, তাঁহার প্রথম ভাবটীর প্রতি তাহা কখনও বিস্ফারিত হয় না। যখন এই দ্বিবিধ ভাবের সাধন মিলিত হইল,—যখন বৈদান্তিক ও পৌরাণিক যুগের একত্র মিলন হইল, তখনই আৰ্য্যেরা এই মহাবাক্য উচ্চারণ করিয়া ইষ্টপদে প্রণত হইলেন,—“অব্যক্ত ব্যক্তরূপায় নিগুণায় গুণায়ান্, সমস্ত জগতাদ্যারমূর্ত্তয়ে ব্রহ্মণে নমঃ”।

ঐশ্বরিক ব্রাহ্মদা ঋষিরা তাঁহাদের বিশেষ ভাব কৰ্ম্মকে লক্ষ্যস্থলে রাখিয়া ধৰ্ম্মতীর্থের যাত্রী হইয়াছিলেন। যৎকালে ভারত ঋষিরা : হ্রস্ব ব্রহ্মাহ্মরাণে বহির্জগৎকে তুচ্ছ করিয়া

হিন্দু ও বৌদ্ধ জাতির বিশেষ ধর্মভাব । ১০৩

অন্তর্জগতের অভিযুখে মহাপ্রস্থান-পরায়ণ ; বৌদ্ধা ঋষিরা সে সময় অন্তর্জগতের কোন সংবাদ আদৌ গ্রহণ না করিয়া, ইহ-সংসারে সুখধাম প্রাপ্ত হইবার উদ্দেশে অনুরূপ অনুরাগে এক বিপদ-সঙ্কুল মহাযাত্রার অনুযাত্রী । তাঁহাদের ঈশ্বর ভারত-ঋষিদিগের ঈশ্বরের তায় সচ্চিদানন্দস্বরূপ, অন্তরের অন্তরতর অন্তরতম, অতীন্দ্রিয়,—অপচ প্রাণের প্রিয়তম পদার্থ নহেন ; কিন্তু বহিঃশব্দ্য বিষয়ীভূত, বহিঃজগতের পদার্থ বিশেষ, অন্তরের সঙ্গে তাঁহার কোন সম্বন্ধই নাই । তাঁহাদের ঈশ্বর ভারতঋষিদিগের পরব্রহ্মের তায় অব্যক্ত, নিগুণ ও নিষ্ক্রিয় নহেন ; কিন্তু তিনি সম্পূর্ণ সত্ত্ব, ব্যক্ত ও অনুরূপ কর্মলিপ্ত ;—তিনি তাঁহাদের কর্মের উৎসাহদাতা, এবং তাঁহাদের জীবনযাত্রার নেতা । তাঁহাদের ঈশ্বর প্রাণের প্রাণ এবং আত্মার অন্তরাত্মা নহেন, কিন্তু তিনি তাঁহাদের প্রাণ ও আত্মার বহির্দেশে ব্যক্ত থাকিয়া তাঁহাদিগের শ্রবণ-পথে দৈববাণী প্রেরণ করিয়াছেন, এবং সময়ে সময়ে তাঁহাদের দৃষ্টিপথের পথিক হইয়া কর্মক্ষেত্রে উৎসাহ দান করিয়াছেন । তাঁহাদের ঈশ্বর নিষ্কাম ও মনোবৃত্তি বিহীন নহেন ; কিন্তু তিনি বিবিধ প্রকার ভয়, মৈত্র প্রদর্শন পূর্বক, তাঁহাদিগকে নিজ ইচ্ছার বশবর্তী করিবার প্রয়াস পাইয়াছেন, এবং স্বকীয় অভিলষিত পথে নীয়মান করিবার জন্ত অশেষ প্রকারে আগ্রহ প্রকাশ করিয়াছেন । ভারত-ঋষিদের যাত্রা অন্তর্পথে, সংসারের পর-পার জ্যোতির্ময় ব্রহ্মধামের অভিযুখে,—বহিঃজগতের দূস্তর চতুর্বিংশতি তত্ত্ব অতিক্রম করিয়া আত্মস্থ হইবার দিকে । বৌদ্ধা ঋষিদের যাত্রা তাঁহাদের ঈশ্বর-প্রতিশ্রুত সুখধামের অভিযুখে,—সংসারে সুখময় স্বর্গ রাজ্য প্রতিষ্ঠার দিকে । এই সুখময়

শান্তিদাম লাভের আশ্বাসে আশ্রিত হইয়া তাঁহারা স্বজাতিব
আবাল বৃদ্ধ বনিতা লইয়া অরুণতানব্যাপী অতি উৎকট ও
অলোকসাপ্য এক মহাযাত্রা অঙ্গীকার করিয়াছিলেন। যীহদা-
দিগের এই কার্য্যে আমরা কৰ্ম্মেরই মাহাত্ম্য দেখিতে পাই। কি
অনুপম জীবন্ত কৰ্ম্মোৎসাহ ! ভারতের আৰ্য্যজাতি প্রথম হই-
তেই ধ্যানশীল, যীহদা জাতি প্রথম হইতেই কৰ্ম্মশীল। ধ্যানে
ভারতের আৰ্য্যজাতিকে এক স্থানে আবদ্ধ করিয়া অন্তর্পথে
প্রেরণ করিয়াছে ; কৰ্ম্মে যীহদা জাতিকে প্রতিক্রমিত স্মৃধামের
উদ্দেশ্যে এই সংসার পথে দেশ হইতে দেশান্তরে পরিভ্রাম্যমান
করিয়াছে। ধ্যানে ভারতের আৰ্য্যজাতিকে অন্তরস্থ, স্বধামস্থ
হইবার জন্ত কোন শ্রমকেই শ্রমজ্ঞান করিতে দেয় নাই ; কৰ্ম্মে
যীহদাজাতিকে সংসারে স্মৃধাম প্রতিষ্ঠা করিবার জন্ত কোন
প্রকার কষ্টকেই কষ্ট জ্ঞান করিতে দেয় নাই। ধ্যানে ভারতের
আৰ্য্যজাতিকে প্রথম হইতেই অন্তর্স্থ, —ব্রহ্মাভিমুখ করিয়াছে ;
কৰ্ম্মে যীহদাজাতিকে প্রথম হইতেই বহির্স্থ, —সংসারাভিমুখ
করিয়াছে। ধ্যানে ভারতের আৰ্য্যদিগকে ধৰ্ম্মের অন্তরঙ্গ আবি-
ষ্কার করিতে শিক্ষা দিয়াছে ; কৰ্ম্মে যীহদা জাতিকে ধৰ্ম্মের
বহিরঙ্গ সাধন করিতে নিযুক্ত করিয়াছে। ভারতের আৰ্য্যেরা
অন্তরঙ্গে অপূৰ্ণ ধৰ্ম্মমার্গ, —স্বধামস্থ হইবার সুন্দর পথ, ব্রহ্মজ্ঞান
উপার্জন করিবার প্রশস্ত সাধন আবিষ্কার করিয়া পৃথিবীকে
চিরঞ্জীৱী করিয়া রাখিয়াছেন ; যীহদার সাধুরা বহিরঙ্গে অপূৰ্ণ
নীতিমার্গ, —সংসারে স্বর্গের ছবি অবতারণা করিবার সুন্দর পথ
প্রদর্শন করিয়া জগৎকে চমকিত করিয়াছেন। ভারতের ঋষিরা
ধ্যান-প্রসূত অদ্বুত আধ্যাত্মিক তত্ত্ব সকল উপলব্ধি করিয়া তত্ত্ব-

হিন্দু ও য়ীহুদা জাতির বিশেষ ধর্ম্যভাব । ১০৫

প্রধান বেদান্তাদি শাস্ত্রের সৃষ্টি করিয়াছেন ; য়ীহুদার ঋষিরা কৰ্ম্ম-প্রসূত সত্য সকল আবিষ্কার করিয়া স্বজাতির কৰ্ম্মকাণ্ড লিপিবদ্ধ করিয়া ইতিহাস-প্রধান বাইবেল শাস্ত্র প্রণয়ন করিয়াছেন ।

য়ীহুদা জাতির ধর্ম্মশাস্ত্র নীতিতত্ত্বের অতি সুন্দর প্রদর্শন হইলেও, ইহাকে অবশ্যই পৌরাণিক বলিতে হইবে । ধ্যান-বীজ হইতে ব্রহ্মজ্ঞান উৎপন্ন হয়, কৰ্ম্মবীজ হইতে পৌরাণিক ধর্ম্মের সৃষ্টি হয় । ভারতীয় আৰ্য্যজাতির মধ্যেও পৌরাণিক ধর্ম্মের উৎপত্তি হইয়াছিল । কিন্তু তাহা তাঁহাদের সৰ্ব্বস্ব নহে, তাহা “অনাস্ত্র শাস্ত্র” মধ্যে গণনীয়,—অধিকারী বিশেষের জন্ত তাহার আবশ্যকতা স্বীকৃত হইত । তাঁহাদের এই পৌরাণিক ধর্ম্মও ব্রহ্মজ্ঞান এবং উপনিষদ-মূলক, এবং এই পৌরাণিক ধর্ম্মের নীতিতত্ত্বও য়ীহুদীয় ও খৃষ্টীয় নীতিতত্ত্ব অপেক্ষা কিছুতেই নিকট নহে । এদিকে য়ীহুদীয় ও খৃষ্টীয় ধর্ম্মশাস্ত্র ব্রহ্ম-জ্ঞানাত্মক নহে ; তাহা পৌরাণিক হইলেও ভারতীয় পৌরাণিক ধর্ম্মের জ্ঞান আধ্যাত্মিক তত্ত্ব পূর্ণ নহে । তবে তাহার যে এক অপূৰ্ণ বিশেষত্ব আছে, তাহা আর কোথাও দৃষ্ট হয় না ;—তাহা এই হুঃখ ও অশান্তিময় পৃথিবীকে স্বর্গীয় সুখধামে পরিণত করা,—পৃথিবীতে স্বর্গরাজ্য আনয়ন করা । ভারতীয় আৰ্য্যদের নীতিশাস্ত্র অপেক্ষা য়ীহুদীয় ও খৃষ্টীয় নীতির শ্রেষ্ঠত্ব কেবল এখানে,—ইহাদের পৌরাণিক ধর্ম্মের মহত্ব কেবল এই প্রদর্শন ক্ষেত্রে । লোকে যে য়ীহুদীয় ও খৃষ্টীয় নীতিশাস্ত্রকে ঐত তত্ত্ব করে, তাহা এইজন্য যে, ইহা কেবল নিজের উন্নতির বা পরি-জ্ঞাপ সাধনের জন্য নহে—ইহা সমগ্র জাতি, সমগ্র পৃথিবীর

নরনারীকে, কেবল পরলোকে নহে, কিন্তু ইহলোকেও উন্নত করিয়া স্বর্গীয় সুখ শান্তির অধিকারী করিবার জন্য । এই নীতি-শাস্ত্র কেবল নিজের পরিভ্রাণ সাধন করিয়া সন্তুষ্ট থাকিতে দেয় না, অপরের—সকলের পরিভ্রাণ সাধনে সহায়তা করিতে অগস্ত উৎসাহে উৎসাহী করে । এই জন্যই ইহাকে জীবন্ত নীতিশাস্ত্র বলিয়া গণনা করা যায় । ইহা নিরজীব মানুষকে জীবন দিতে পারে । ভারতের পৌরাণিক নীতিশাস্ত্র এ বিষয়ে ইহা অপেক্ষা অনেকাংশে নিকৃষ্ট, তাহাতে আর সন্দেহ নাই । ভারতের পৌরাণিক শাস্ত্র কতকগুলি নিস্তেজ, নিরজীব শাস্ত্র প্রকৃতি সমুৎপন্ন করিয়াছে ; কিন্তু গ্রীহদীয় ও ধৃষ্টীয় পৌরাণিক ধর্ম জীবন্ত অগস্ত ধর্মবীরদিগকে মূর্তিমান করিয়া জগৎকে উপকৃত করিয়াছে এবং আজিও করিতেছে । যদি গ্রীহদীয় ও ধৃষ্টীয় ধর্মবীরদিগের উপার্জিত ও আবিষ্কৃত সমস্ত ধর্মতত্ত্ব বিলুপ্ত হয়, তথাপি পৃথিবীতে ইহাদের পৌরাণিক ধর্মমূলক এই স্বর্গরাজ্য প্রতিষ্ঠার ভাব মানব-প্রকৃতি হইতে কখনই বিলুপ্ত হইবে না । কর্ম-মত্রে দীক্ষিত হইয়া গ্রীহদায় ও ধৃষ্টীয় সাধুরা এই মহৎ ভাব প্রসব করিয়াছিলেন । ইহা কর্মবৃক্ষের সর্বোত্তম ফল । ইহা ধ্যান-বৃক্ষে কখনই ফলিবার প্রত্যাশা নাই । কর্ম-মত্রে দীক্ষিত হইয়া গ্রীহদীয় শ্রোত যে কেবল ঈশ্বর প্রতিশ্রুত আরামস্থান লাভ করিবার জন্য মিসরদেশ হইতে কৈনান পর্য্যন্ত আসিয়া নিরস্ত হইয়াছিলেন, তাহা নহে ; পৃথিবীকে স্বর্গধাম করিবার জন্য তাঁহাদের মহাযাত্রার আজিও বিরাম হয় নাই । তাঁহাদের ঈশ্বর প্রতিশ্রুত সুখধাম উদ্দেশে তাঁহাদের মহাপ্রস্থানের আজিও 'বজরা' হয় নাই । তাঁহাদের কৈনান লাভ করিবার পর হইতে

হিন্দু ও যীহুদা জাতির বিশেষ ধর্মভাব । ১০৭

তঁাহাদের পূর্বপুরুষদিগের ঐশ্বর্য দৈববাণীর নূতন অর্থ তঁাহাদের শুভ বুদ্ধিতে উদয় হইতে লাগিল । তঁাহারা ক্রমেই বুদ্ধিতে পারিলেন যে, তঁাহাদের প্রতিশ্রুত কৈনান কোন প্রদেশ-বিশেষ নহে, তাহা সংসারে স্বর্গধামের অবতারণা করা ; অন্তরে ঈশ্বর-ভক্ত-দেব-সমাজের যে ছবি আছে, মনুষ্য-সমাজের মধ্যে তাহার প্রতিকৃতি প্রতিষ্ঠা করা । সে জন্য পর্বত, পাথার, অরণ্য ও বালুকা ভূমি অতিক্রম করিতে হয় না, কেবল নরনারীর হিত-ব্রতে জীবনকে উৎসর্গ করিতে হয়, জন সমাজকে স্বর্গের দিকে উত্তোলন করিতে হয় । সে জন্য কেবল ভূতার ধারণক্ষম হইলে চলে না, সে জন্য ভূতার উত্তোলনক্ষম হওয়া চাই । যীহুদীয় শ্রোতের খৃষ্টীয় শাখার এত বল ও এত তেজ, এই জন্মই । তঁাহারা স্বকীয় মস্তকে এই গুরুতর দায়িত্ব ভার গ্রহণ করিয়া মহাভারে ভারাক্রান্ত । মর্ত্য-ধামকে স্বর্গের দিকে উত্তোলন করিবার জন্য তঁাহাদের মধ্যে কত তেজ কত বলের ক্ষুণ্ণ হইয়াছে ! তজ্জন্য তঁাহারা কত কষ্ট, কত শ্রম, কত উৎপীড়ন অঙ্গীকার করিয়া জগৎকে স্তব্ধ ও চমকিত করিয়া রাখিয়াছেন ! তজ্জন্য তঁাহাদের মহাযাত্রার (Exodus এর) শ্রোত আজিও প্রবল বেগে প্রবহমান রহিয়াছে,—যে রূপ প্রবল বেগে মহর্ষি মৃষা ও যোদ্ধার সময় সে শ্রোত প্রবাহিত হইয়াছিল । ইহা যীহুদীয় ধর্মের শেষ পরিণাম । যত কাল নরনারীর আত্মা এ সংসারে দেহস্থ থাকিবে, ততকাল এই মহাযাত্রার শ্রোত ইহসংসারে প্রবহমান থাকিবে ; তাহাতে আর অনুমাত্র সন্দেহ নাই । পৃথিবীতে এখন যে-কোন যুগধর্ম সমুৎপন্ন হইয়াছে বা হইবে, সেই সেই ধর্মকে যীহুদী-জাতি প্রবর্তিত এই মহাযাত্রার অনু-

যাজী হইতে হইবে ; নচেৎ তাহাদিগের এ সংসারে অভ্যাস লাভ সম্ভাবিত হইবে না । ভারতীয় আৰ্য্য সম্ভানগণকেও এ বিষয়ে গৃহদীপ ও খৃষ্টীয় সাধুদের অনুসরণ করিতে হইবে, নচেৎ তাহাদিগেরও এ সংসারে দাঁড়াইয়া থাকা অসম্ভব হইবে । মর্ত্তো স্বৰ্গধাম প্রতিষ্ঠার যে সমীচীন ভাব, ইহা গৃহদীপ ও খৃষ্টীয় পৌরাণিক ধৰ্ম্ম ভিন্ন আর কোথাও প্রতিষ্ঠিত হয় নাই । এই ভাব খৃষ্টীয় নীতির প্রবর্ত্তক হইয়া অদ্যাপি বর্ত্তমান আছে, ও দেশ বিদেশে বিস্তার লাভ করিতেছে ; ভারতীয় পৌরাণিক ধৰ্ম্ম অধিকাংশ স্থলে ইহলৌকিক তুচ্ছ সুখের লোভ ও দুঃখের ভয় দেখাইয়া লোককে ধৰ্ম্মকর্মে প্রবৃত্ত করিতে চেষ্টা করিয়াছে প্রত্যেক নীতি ও ধৰ্ম্মানুষ্ঠানের পশ্চাতে সুদীর্ঘ ফলশ্রুতি যুক্ত ও গ্রাহিত করিয়া রাখা হইয়াছে, এক্ষণে উপদেষ্টা ও উপদিষ্টের মধ্যে অতি অল্প লোকেই তাহাতে বিশ্বাস স্থাপন করিয়া থাকে । কিন্তু একথা অবশ্যই স্বীকার করিতে হইবে যে, কোন কোন স্থলে ভারতীয় কৰ্ম সাধকদিগের মধ্যে অতি অপূৰ্ব্ব এক নিষ্কাম কৰ্ম যোগের ক্ষুণ্ণি দেখা যায় । গৃহদীপ কৰ্ম যোগীরা যে ভাবে কৰ্ম সাধন করিয়াছেন, তাহা অবশ্যই অনেকটা রাজসিক ভাবে সম্পন্ন হইয়াছে ; কিন্তু শুদ্ধ সাধিকী ভাবে, ফলকাম বিরহিত হইয়া, কৰ্মফল জৈশ্বর চরণে সমর্পণ করিয়া, নিষ্কাম কৰ্মযোগ সাধন কেবল ভারতীয় কৰ্মসাধকদিগের মধ্যেই প্রবর্ত্তিত হইয়াছিল । এক্ষণে ^{কৰ্ম সাধিত হইলে} তাহা কৃতার্থ হয়, কিন্তু সেই কৰ্ম সাধনে সেই মহাশক্তি-ক্ষুণ্ণির সংঘটনা হয় না,—যে শক্তি পৃথিবীকে স্বর্গের দিকে উত্তোলন করিতে সমর্থ হয় । সাধিকী প্রশান্ত শক্তিতে সে সম্ভাবনা নাই । কিন্তু তাহা

হিন্দু ও যীহুদা জাতির বিশেষ ধর্ম্যভাব । ১০৯

শান্তিপূর্ণ, সুমধুর এবং আত্মার পক্ষে অধিকতর কল্যাণ-কর ।

কর্মমত্রে দীক্ষিত হইয়া যীহুদীয় সাধুরা আর একটি অমৃত কল উপার্জন করিয়াছিলেন,—সেটি একটি ক্রিয়াবান ধর্ম্মবীরের আদর্শ লাভ এবং সেই আদর্শের অল্পরূপ সুন্দর জীবন লাভ । তাঁহাদের কৈনান যাত্রারও বহুপূর্ব হইতে তাঁহারা সেই আদর্শ পুরুষের ছবি মনোমধ্যে পোষণ করিয়া আসিতেছিলেন । তাঁহারা সেই সময় হইতে তাঁহাদের ঈশ্বর-প্রতিশ্রুত এই প্রত্যাশাকে হৃদয়ে স্থান দান করিয়া আসিয়াছেন যে, তাঁহাদের অন্তর্পোষিত সেই আদর্শ সময়ে মনুষ্যদেহ ধারণ করিয়া তাঁহাদের স্বজাতির মধ্যে অবতীর্ণ হইবেন, এবং স্বকীয় প্রভাব ও দৃষ্টান্তে তাঁহাদের বংশধর গণের মধ্যে স্বর্গের সুখশান্তি আনয়ন করিবেন, এবং তাঁহাদিগকে পরিভ্রাণের সুন্দর পথ দেখাইয়া স্বর্গরাজ্যে লইয়া যাইবেন । পৃথিবীর অন্য কোন জাতিকে এরূপ মহান্ আদর্শ পোষণ করিতে দেখা যায় নাই ।

বহুকাল হইতে এই সুন্দর আদর্শ সমগ্র যীহুদীয় জাতির গর্ত্তকোষে বিশ্বাস ও যত্নের সহিত পোষিত হওয়াতে সময়ে সময়ে অতি সুন্দর ফলও প্রসূত হইয়াছে । সেই বিশ্বাস ও যত্নপোষিত আদর্শবীজ হইতে প্রভু যীশুখ্রীষ্ট ও তাঁহার পূর্বপরাবর্তী বহুতর সাধুসজ্জন,—বহুতর ধর্ম্মবীর উৎপন্ন হইয়াছেন । যীহুদীয় খ্রীষ্টীয় শাখা খ্রীষ্ট চরিত্রে পূর্বপোষিত সেই আদর্শ দেখিয়া, পূর্বপুরুষ দিগের ন্যায় সেই আদর্শ পোষণে কাত্ত হইয়াছেন ; কিন্তু খ্রীষ্টের পুনরাবর্তনের মত ও খ্রীষ্ট চরিত্রের আরাধনা তাঁহাদের বিশ্বাস ক্ষেত্রে স্থল প্রাপ্ত হওয়াতে, তাঁহারা

একভাবে সেই আদর্শ পোষণে এখনও অমুন্নত রহি-
রাছেন ।

ধান্য-মস্ত্রে দীক্ষিত দিগের অন্তরে এরূপ ঐতিহাসিক জীব-
নের আদর্শ উদয় হইবার পথ পায় না । ধান-রাজ্যে ঈশ্বর
ও সাধকের মধ্যে ব্যবধান কোথায় ? কোনও মধ্যবর্তী আদ-
র্শের দাঁড়াইবার স্থল কোথা ? সেখানে পরস্পরের সাক্ষাৎ
সম্বন্ধ, সেখানে পরস্পর পরস্পরের অব্যবহিত সন্নিধানে, সেখানে
পরস্পর পরস্পরের মধ্যে অমুপ্রবিষ্ট, সেখানে নদী ও জলধিতে
মিশিয়া একাকার ! কস্মক্সেত্রেরে কিন্তু ঈশ্বর ও সাধকের মধ্যে
অনন্ত ব্যবধান । সে ব্যবধানের কিছুতেই হ্রাস বা তিরোভাব
হইবার প্রত্যাশা নাই । সেখানে কাহার সাধ্য সেই অনন্ত
পূর্ণ আদর্শকে হৃদয়ে অমুভব করে,—অঙ্কিত করে ? কাহার
সাধ্য সেদিকে দৃষ্টিপাত করিয়া সেই অনন্ত পূর্ণ আদর্শকে হৃদয়ে
আনয়ন ও ধারণ করে ? কস্মক্সেত্রেরে সেই অনন্ত পূর্ণ আদর্শকে
জীবনের আদর্শ করিতে গেলে একটি মধ্যবর্তী আদর্শ-ছায়া
আমাদের সঙ্কীর্ণ দৃষ্টির গোচরে আসিয়া উপস্থিত হইবেই
হইবে । এই মধ্যবর্তী আদর্শ-ছায়া কে দূরপরাহত করা অসাধ্য
ও অসম্ভব । সেই ছায়া আমাদের দৃষ্টির অন্তরায় হইয়া সেই
অনন্ত পূর্ণ আদর্শকে আচ্ছাদন করিবেই করিবে । অনন্ত আকা-
শের পানে চাও, তাহাকে কেহ কখনও দৃষ্টির আয়ত্ত করিতে
পারিবে না ; একটি দৃশ্যমান কর্নিত সীমা, বাহাকে “sensible
horizon” বলে, নিশ্চয়ই আমাদের দৃষ্টি-পথের অতিধি হইয়া
অনন্ত আকাশকে আচ্ছাদন করিবেই করিবে । ইহা অপরি-
হার্য । কিন্তু ইহাতে পরিভাপের কারণ কিছুই নাই । সেই

হিন্দু ও যীহুদা জাতির বিশেষ ধর্ম্যভাব । ১১১

দৃশ্যমান কল্পিত সীমা, সেই “sensible horizon” অনন্ত আকাশকে ঢাকে বটে, কিন্তু তাহাতে পর্য্যটকের পথ পর্য্যটনের যথেষ্ট সাহায্য হয়। সেই কল্পিত সীমা দেখিয়া পরিব্রাজক মনে করেন যে, সেই সীমান্তে তাঁহার পর্য্যটনের অবদান হইবে। এই চিন্তা পর্য্যটকের উৎসাহান্বিত প্রজ্বলিত রাখে। কিন্তু পরিব্রাজক যতই সেই সীমান্তের দিকে অগ্রবর্তী হইতে থাকেন, সেই দৃশ্যমান সীমান্তদেশ সেই পরিমাণে দূরবর্তী হইয়া তল্লিকটবর্তী হইবার জন্য পূর্ব্ববৎ প্রতিনিয়ত পরিব্রাজককে আহ্বান করিতে থাকে। তদ্রূপ কর্মক্ষেত্রে সেই অনন্ত পূর্ণ আদর্শের অভিযুখীন হইলে একটী কল্পিত আদর্শ মধ্যবর্তী হইয়া সাধকের কর্মপথে উদ্ভিত হয় এবং সাধককে তৎসমীপবর্তী হইবার জন্য সাদরে আমন্ত্রণ করিতে থাকে,—যেন সেই ধানেই তাঁহার সাধনের শান্তি ও পর্য্যাপ্তি। কিন্তু বস্তুতঃ সাধক যতই কল্পিত মধ্যবর্তী আদর্শের অভিযুখে অগ্রসর হইতে থাকেন, তাহা ততই দূরবর্তী হইয়া পূর্ব্বের ন্যায় প্রতিনিয়ত সাধককে তৎসন্নিধানে আহ্বান করিতে থাকে।

বাহিরের আকাশের প্রতি দৃষ্টিক্ষেপ করিলে যে, মধ্যস্থিত কল্পিত সীমান্ত দেশ নেত্রপথে উপস্থিত হয়, তাহা আর কিছুই নহে, কেবল অনন্ত আকাশের যতটুকু আমরা আমাদের ক্ষুদ্র দৃষ্টির আয়ত্ত করিতে পারি,—তাহা পরিমিত হইলেও অনন্ত আকাশের সঙ্গে অভেদ। কর্মক্ষেত্রে অনন্ত পূর্ণ আদর্শের পানে তাকাইলে যে মধ্যবর্তী কল্পিত আদর্শ অমুভূত হয়, তাহাও আর কিছুই নহে, কেবল সেই অনন্ত পূর্ণ আদর্শের যতটুকু আমরা আমাদের ক্ষুদ্র শক্তি দ্বারা আয়ত্তীকৃত করিতে পারি। তাহা সেই

অব্যক্ত পূর্ণ আদর্শের ব্যক্ত ভাব,—তাহা পরিমিত হইলেও সেই অনন্ত পূর্ণ আদর্শের সঙ্গে অভেদ ;—অভেদ হইলেও তাহা পুস্তরূপী, ভক্তরূপী, মহাব্যাক্তরূপী ।

খৃষ্ট জগতের এই পুস্তরূপ, ভক্তরূপ, মহাব্যাক্তরূপ,—সেই নিরঞ্জন অব্যক্ত পুরুষের ব্যক্তরূপ,—সেই গুণাতীত নিগুণ পুরুষের সগুণরূপ ভিন্ন আর কিছুই নহে । “হিরণ্ময়ে পরে কোষে বিরজম্ ব্রহ্ম নিকলম্”—পঞ্চ কোষাতীত তুরীয় হিরণ্ময় পরম কোষে সেই নিরঞ্জন অব্যক্ত পুরুষ বিরাজ করেন । কিন্তু এই “ব্যক্তরূপ” এই গুণাত্মনরূপ—এই আদর্শ মূর্তি বিজ্ঞানময় কোষেই অনুভূত হইয়া থাকে । হিরণ্ময় পরম কোষস্থ সেই অব্যক্তি পরম পুরুষের দ্বারা বিজ্ঞানময় কোষে আসিয়া কৰ্ম্মপথের যাত্রীদিগের নিকট ব্যক্তিরূপে এই ভাবে ব্যক্ত হইয়া থাকে । আৰ্য্য ঋনিরা ধানের উচ্চক্ষেত্রে দণ্ডায়মান থাকাতে তাঁহাদের অধ্যাত্ম দৃষ্টি বিজ্ঞানময় কোষের অনেক উপর দিয়া পরিচালিত হইয়া অব্যক্ত নিগুণধামের অভিমুখে বিক্ষারিত থাকাতে, এই ব্যক্তরূপ তাঁহাদের দ্বারা পরিলক্ষিত হইতে পারে নাই । ইহা কেবল কৰ্ম্ম-যোগী ব্রীহদা ঋষিদিগের দ্বারাই পরিদর্শিত ও সমস্ত প্রতিপোষিত হইয়াছিল । পৌরাণিক সময়ের ভারতীয় কৰ্ম্মযোগীরা, সেই অব্যক্তের “ব্যক্তরূপ”—সেই নিগুণের সগুণভাব উপলব্ধি করিতে শক্ত হইরাও, ব্রীহদাদিগের সহজাত ও সমস্ত-পোষিত কৰ্ম্মভাবের এই বিশেষত্বের অসম্ভাব হেতু এই কৰ্ম্মক্ষেত্রে তাদৃশ হ্রস্বদর্শী হইতে পারেন নাই ; সুতরাং ব্রীহদা জাতি-লব্ধ কৰ্ম্ম-যোগের সত্যপুঞ্জ ইহাদিগের লক্ষ্য পথে তাদৃশ স্পষ্ট উপস্থিত হয় নাই । ব্রীহদাজাতি-লব্ধ এই আদর্শমূর্তি ভারতীয় পৌরা-

হিন্দু ও রীহদা জাতির বিশেষ ধর্মভাব । ১১৩

নিক ঋষিদিগের অন্ত্যস্ত চক্ষে তাদৃশ অভিব্যক্ত হয় নাই ।

রীহদীয় কৰ্মবৃক্ষের আর একটি ফল খৃষ্টীয় ঐশ্বরিক Trinity বা ত্রিত্ববাদ । ঈশ্বরের এই ত্রিবিধ সংস্থানের ক্ষুধা কেবল খৃষ্টীয় সমাজে কেন, ভারতের আৰ্যসাধকগণ মধ্যেও অতি সুন্দরও সুস্পষ্টরূপে অনুভূত হইয়াছিল । তবে খৃষ্টীয় সমাজে তাহা যেমন একটি বিশেষ মত (Dogma) হইয়া দাঁড়াইয়াছে, সৌভাগ্যক্রমে আৰ্য-সমাজ মধ্যে তাহা কখনও সেভাবে দাঁড়াইয়া উঠিতে পারে নাই । বস্তুতঃ ইহা সাধারণে প্রচারিত হইবার বিষয় নহে । ইহা সাধকবৃন্দের অতি গুহ্য অনুভব্যা ও আরাধ্য বিষয় । খৃষ্টীয় সমাজের পিতা, পুত্র ও পবিত্রাত্মা পৌরাণিক ঋষিদিগের “ব্রহ্ম, ব্রাহ্মণ ও ব্রহ্মণ্যদেব,” এবং ভাগবৎ শাস্ত্রোক্ত, “ব্রহ্মেতি পরমাত্মেতি ভগবানেতি শব্দতে”—“ব্রহ্ম, ভগবান ও পরমাত্মা”তিন স্থলেরই ত্রিত্ববাদ একই অর্থে ব্যবহৃত হইয়াছে,—তদ্বারা একই বস্তুকে নির্দেশ করা হইয়াছে । এই তিন স্থলেই একেরই ত্রিবিধ সংস্থান,—একেরই ত্রিবিধ আধারে প্রতিষ্ঠা বিবৃত হইয়াছে । তবে এই ত্রিবিধ স্থলে এই প্রতিষ্ঠাত্রয়ের অনুভূতির কিঞ্চিৎ ইতর বিশেষ ও তারতম্য থাকিতে পারে । খৃষ্টীয় সমাজের পিতা, পৌরাণিক আৰ্য ও ভাগবৎ বৈষ্ণব সাধকদিগের ব্রহ্ম একই ব্যক্তি, অর্থাৎ নির্গুণ ও অব্যক্ত ব্রহ্ম । খৃষ্টীয় সমাজের পবিত্রাত্মা, পৌরাণিক আৰ্য সাধকদিগের ব্রহ্মণ্যদেব এবং ভাগবৎ বৈষ্ণবদিগের “পরমাত্মা” একই বস্তু, অর্থাৎ অন্তরে আবির্ভূত অল্পপ্রাণিত ব্রহ্মসত্ত্বা । এবং খৃষ্টীয় সমাজের পুত্র, পৌরাণিক আৰ্য সাধকদের

‘ব্রাহ্মণ’ এবং ভাগবত বৈষ্ণবদিগের ‘ভগবান’ একই পদার্থ অর্থাৎ মানুষে ‘অভিব্যক্ত’—প্রমুক্তভাবে অভিব্যক্ত পরমেশ্বরের পরম সত্ত্বা। নিলিপ্ত ব্রহ্ম God in himself কে ধূম্রীর সমাজ পিতা শব্দে উক্ত করিয়াছেন। এই নিলিপ্ত পুরুষ যখন অল্প-রক্ত ভক্তের দিকে অবনত হন—হলিয়া পড়েন,—যখন নির্মল মাধুর্য্য আবির্ভাব বা শক্তিরূপে, বিশুদ্ধ বিবেক বা শুভ বুদ্ধিরূপে, সাক্ষাৎ ধর্ম্মরূপে সাধকের প্রাণে সঞ্চারিত ও প্রকাশিত হন। তখন এই divine guest কে, পরম অতিথিকে পবিত্রাত্মা “ব্রহ্মণ্যদেব” বা “পরমাত্মা” শব্দে উল্লেখ করা হইয়া থাকে। এই ভাবে প্রাপ্ত নিলিপ্ত অব্যক্ত পরম পুরুষ সাধকের সঙ্গে আসিয়া সংলিপ্ত হন, সাধকের নেত্রপথে আসিয়া অভিব্যক্ত হন এবং প্রেমলীলা, ভক্তিলীলা উদ্‌যাপন করিবার স্বত্রপাত করেন এবং ভক্তদেহে অল্পপ্রবিষ্ট হইয়া বিবিধ কার্য্য সম্পাদন করেন। এই অবতারণার দ্বারা সেই নির্মল পরমব্রহ্মের—সেই অরূপের রূপ, ভাব, মাধুর্য্য ও শক্তি ভক্ত ও সাধকদেহে অভিব্যক্ত হইয়া, ইহসংসারে সেই পরম তুরীর ফুলের শোভা ও সৌরভ বিকাশ করিয়া জনগণের প্রাণাকর্ষণ করিতে থাকে। এই জাতীয় প্রতিষ্ঠা সেই পরম পুরুষের সাক্ষাৎ হস্ত স্বরূপ। এই হস্তদ্বারা তিনি একদিকে অল্পগতজনের জীবন—আত্মতাব—হরণ করিবার চেষ্টা করেন, এবং অপর দিকে সেই অল্পগতজনের পার্শ্ববর্তী জনগণকে ধরিবার জন্য চেষ্টা করেন,—তাহাদিগকে আকর্ষণ ও স্বেচ্ছাধীন করিবার প্রয়াস পান। এরূপ করিবার উদ্দেশ্য,—হৃতগ্য জীবকে ভুলাইয়া, অশেষ দোষের আকর তাহার জীবন বস্তুটা হরণ

হিন্দু ও যীহুদা জাতির বিশেষ ধর্ম্যভাব । ১১৫

পূর্বক নিজে সেই পরিত্যক্ত দেহটী নিজ স্বরূপে স্বতন্ত্ররূপে অধিকার করিয়া, ইহ সংসারে নরলীলার স্রোত রক্ষা করা। ইনি সেইজন্য তিথারির বেশে ঘারে ঘারে ফিরিয়া থাকেন; তিষ্কার বিষয়, দেহের মধ্যে একটু স্থান লাভ, —বসিবার— দাঁড়াইবার— কার্য্য করিবার স্থান লাভ। দেহের মধ্যে দুইজনের স্থান নাই; যদি সেখানে ব্রহ্মের আবির্ভাব হয়, অন্ততঃ তৎকালে জীবকে অবসর গ্রহণ করিতে হয়; সেখানে জীব থাকিলে ব্রহ্মের থাকিবার স্থান সম্বলন হয় না, সেখানে ব্রহ্ম সত্বা অতিথি হইলে জীবেরও থাকিবার স্থান কুলায় না। “Our heart its scantiness is such that it cannot bear the conflict of two rival tides.” (Madam Guyan)। এখন কে আত্ম-প্রাণ বিসর্জন করিয়া,—আপনার জীবদ্দশনটী নষ্ট করিয়া এই পরম অতিথিকে, এই দীন হীন তিথারিকে আপন ঘর নিজস্বরূপে নিঃস্বপ্নে ছাড়িয়া দিবে? প্রকৃত ধর্ম্মার্থীর ইহা জানা উচিত যে, তিনি সাধ করিয়া আপন মৃত্যু ফাঁস আপন গলদেশে দিয়া টানিবার আয়োজন করিতেছেন; আপনার ঘর বাড়ী যথাসর্ব্বত্র ব্রহ্মপদে সমর্পণ করিয়া আত্মনাশের জন্ত প্রস্তুত হইতেছেন। প্রকৃত ধর্ম্ম সাধন শুদ্ধ এই স্বকৃত মৃত্যুর আয়োজন ও চেষ্টা ভিন্ন আর কিছুই নহে,—প্রকৃত সিদ্ধি লাভ শুদ্ধ এই আত্মহত্যা সাধনমাত্র। এই পরম অতিথি প্রথমতঃ নিষ্ঠারূপে, শ্রদ্ধাভক্তিরূপে, আস্থা ও বিশ্বাসরূপে, বিবেক ও বৈরাগ্যরূপে সাধকের প্রাণে উদয় হন, ক্রমে আপনার নির্মল স্বরূপ প্রকাশ করিতে থাকেন। যীহুদা দেশে যে প্রাপ্তক আদর্শ পুরুষের-প্রতিকৃতি ক্ষুণ্ণ পাইয়াছিল, তাহা এই পরম অতিথির দ্বারা সম্পন্ন হইয়াছিল, এবং তারিতে যে

নিষ্কাম কর্মযোগের পথ প্রদর্শিত হইয়াছে, তাহারও মূল ইনি । উভয়ই তাঁহার প্রতিকৃতি-বিশেষ সাধক-নেত্রে প্রতিভাত হইয়াছিল ।

আর পুত্র যিনি, ব্রাহ্মণ যিনি, ভগবান্ যিনি, তাঁহার প্রতিষ্ঠ কোথায় ? তাঁহার প্রতিষ্ঠা সম্পূর্ণরূপে, স্বতন্ত্র ও নিজস্ব রূপে আধিকৃত এই জীবত্ব-পরিত্রষ্ট জীবদেহে । যেখানে জীবের জীবত্ব, মানুষের আত্মভাব সম্পূর্ণরূপে নিহত, নিকাসিত বা অভিভূত,—যেখানে জীবের পূর্ব বাসস্থান জনশূন্য হইয়া পড়ে, যেখানে দেহের মধ্যে যে অহং অভিমান বিশিষ্ট এক ‘আমি’ ছিল, তাহার আমিত্ব, স্বামীত্ব, কর্তৃত্ব সকলই কোথায় তিরোহিত হইয়াছে, তন্মধ্যে ‘আমি’ ও ‘আমার’ বলিবার কিছুই নাই, সেখানেই সেই পরম প্রভুর প্রভুত্ব, স্বামীত্ব ও কর্তৃত্ব এবং আবির্ভাব ও সত্তা স্বতঃই প্রতিষ্ঠিত হইতে থাকে ; সেখানে ‘পবিত্রাত্মা’ ‘ব্রহ্মণ্যদেব’ বা “পরমাত্মা” দেহ বিশিষ্ট হইয়া, ব্যক্তিত্ব লাভ করিয়া নরলীলা উদ্ঘাপন করিতে বসেন । এখানে সেই নিলিখ্ত অবাক্ত পুরুষ নরদেহ মধ্যে ব্যক্তিরূপে অভিব্যক্ত—সেই নিগূর্ণ পুরুষ “গুণাত্মন” হইয়া স্বপ্রকাশ । এখানে সেই হিরণ্ময় পরম কোষের পরম পুরুষ মানুষরূপে লীলাপর,—এখানে তাঁহার বাবতীর লীলার মধ্যে “সর্বোত্তম” যে “নরলীলা,” তাহা অবাদে সম্পন্ন হইতে থাকে । যেখানে দেহবাসী জীবের ঘর পূর্বোক্তরূপে শূন্য হয়, এই ঘরে সেই পরম বস্তু আসিয়া পূর্ণ করেন,—সেই ঘর তিনি আলো করিয়া বসেন । দেহ মধ্যস্থ জীবের এই ভাবে পরিত্যক্ত ঘর কদাপি শূন্য পড়িয়া থাকে না, তাহা এইরূপে নিত্যকাল পূর্ণ হইয়া আসিতেছে ।

হিন্দু ও যীহুদা জাতির বিশেষ ধর্ম্যভাব । ১১৭

এখানে তিনি স্বয়ং দেহবিশিষ্ট, ইন্দ্রিয়বিশিষ্ট ও ব্যক্তিত্ববিশিষ্ট । তিনি চিরকাল এই ভাবে ভক্তকে নিহত করিয়া তাহার পরিত্যক্ত ঘর নিঃস্বপ্নে অধিকার করিয়া, ভক্তের ভাব অঙ্গীকার করিয়া প্রেমলীলার নিত্য প্রবাহ রক্ষা করিয়া আসিতেছেন । ইতিহাস এ সুসংবাদ প্রাপ্ত হয় না, সাধারণে এ সুসমাচার প্রাপ্ত হয় না,—কেবল প্রাণার্পণ-কর্ম জীয়েন্তে মরণ-কর্ম ভগবন্তজ্ঞ জনেই তাহার সংবাদ প্রাপ্ত হয়েন ।

ভক্তদেহে পুত্ররূপে, ব্রাহ্মণরূপে বা ভগবানরূপে অবতারণার কথা উপরে যাহা উল্লেখিত হইল, তাহাতে সেই পরমপুরুষের মায়িক ঐশ্বর্য্য বিকাশের কোন কথাই নাই । বিশেষ প্রয়োজন ভিন্ন সে বিকাশের কোন সম্ভাবনা হয় না । সেই পরম পুরুষের সর্বজ্ঞত্ব ও সর্বশক্তিমত্তার বিকাশ এরূপ দেহে সচরাচর সম্ভাবিত হয় না । সেই পরম পুরুষ যখন ভক্ত উপাসকের প্রাণে আসিয়া প্রকাশিত হন, তখন সমস্ত ঐশ্বর্য্য বিবর্তিত হইয়া, শুদ্ধ মাধুর্য্যভাবে—দীন হীন কান্দালীর বেশে উপস্থিত হন । কান্দাল ভক্তের ভগবানকে কান্দাল বেশে অভিব্যক্ত হইতে হয়--- “বে যথা মাং প্রপদ্যন্তে তং তথৈব ভজাম্যহং” তাঁহার ঐশ্বর্য্যভাব তখন ভক্ত সংসর্গে স্বতঃই খসিয়া পড়ে । রাজা শাসনদণ্ড লইয়া বিজোহী প্রকার সন্নিধানে উপস্থিত হইয়া থাকেন । কিন্তু প্রয়োন্মুখ হইয়া যখন রাজমহিবীর সন্নিধানে উপস্থিত হন, তখন তাঁহার স্বতন্ত্রতাব—তখন তাঁহার স্বতন্ত্র বেশ । সে রাজ-বেশ সেখানে আপনা-আপনি তিরোহিত হয় ! সেখানে তাঁহার রাজদণ্ড হস্ত হইতে আপনা-আপনি খসিয়া পড়ে । যেখানে তিনি একটু হানতিকারী হইয়া আসিতেছেন,

সেখানে ষড়ৈশ্বর্য্য আসিলে চলিবে কেঁন ? সুতরাং পুত্র যিনি, ব্রাহ্মণ যিনি, ভগবান যিনি, তিনি সচরাচর ষড়ৈশ্বর্য্যহীন হইয়া, ভক্তের ভাব অঙ্গীকার করিয়া লীলাপর হন; এই জন্য ইতিহাসে সে লীলার আদ্যস্ত বর্ণিত হয় না, জগৎ তাহার বড় একটা সংবাদ রাখে না । যেখানে তিনি ঐশ্বর্য্য মিশ্রিত হইয়া যুগধর্ম্ম সংস্থাপনার্থ অভিযুক্ত হন, সেখানে ইতিহাস তাঁহার লীলা বর্ণনায় প্রবৃত্ত হয়,—ভাগবতে তাঁহার চরিতামৃত গান করিয়া থাকে ।

যখন যীশুর দেহস্থ জীব—আত্মভাব—ক্লেশ-হত হইয়া মরিলেন, তখন সেই দেহের শূন্যস্থান পবিত্রাত্মা আসিয়া পরিপূর্ণ করিলেন । তজ্জন্য যীশু মরিয়াও পবিত্রাত্মা সহযোগে জীবন্ত হইয়া পুনরুত্থিত হইলেন । পূর্ব্বের সে যীশু আর নাই; তুমি এখন যে যীশুকে দেখিতেছ, তিনি পবিত্রাত্মা ;—যদিও যীশুর শবদেহ অধিকার করিয়া,—যীশুর বাহ্যাবরণে আবৃত হইয়া, ভক্তের ভাব অঙ্গীকার করিয়া যীশু নামে পরিচিত হইয়া লীলাপরবশ হইয়াছেন ।

এই নিলিপ্ত ব্রহ্ম Father, God in himself মানুষের মধ্যে, ভক্ত সাধক মধ্যে প্রথমতঃ Divine Visitor or guest—ব্রহ্মণ্যদেব, পবিত্রাত্মা বা পরমাত্মারূপে সঞ্চারিত বা অনুপ্রাণিত হইয়া,—অনুপ্রবিষ্ট হইয়া লীলা করিতে লাগিলেন । এই লীলার শেষ পরিণাম,—জীবের সম্পূর্ণরূপে ব্রহ্মপদে আত্মসমর্পণ, ‘আমি’-র সম্পূর্ণরূপে আমিষ্য বিসর্জন,—জীব এক এক করিয়া আপনার সমস্ত ছুর্গ ব্রহ্মণ্য-দেবকে অধিকার করিতে দিয়া অবশেষে স্বকীয় মলিন চৈতন্য লইয়া অবসর গ্রহণ করিলেন ।

হিন্দু ও যীহুদা জাতির বিশেষ ধর্ম্যভাব । ১১৯

যাই জীব স্বকীয় চৈতন্য লইয়া সম্পূর্ণ অবসর গ্রহণ করিলেন, অমনি পবিত্রাত্মা, ব্রহ্মণ্যদেব বা পরমাত্মা তৎস্থান নিঃস্বেষ্ট অধিকার করিয়া সম্পূর্ণ স্বতন্ত্রভাবে লীলাপর হইলেন । এখানে সাধকেরা ব্রহ্মেরই নরলীলা মূর্তিমান দেখিতে পান, God in himsilfকে প্রথমতঃ Divine Visitor বা guest রূপে প্রাণের মধ্যে দেখিতে পাইলেন, পরে তাঁহাকে God in man দেখিয়া অবাক্ ও কৃতার্থ হইলেন ।

এই ত্রিবিধ প্রতিষ্ঠার মধ্যে ব্রহ্ম যিনি,—পিতা যিনি, তিনি কেবল ধ্যানপরায়ণ জ্ঞানীগণেরই ধ্যেয় বস্তু,—ধ্যান-যোগীরা তাঁহাদের ধ্যাননেত্রে তাঁহাকেই লক্ষ্য করিয়া থাকেন । আর পবিত্রাত্মা যিনি, পরমাত্মা যিনি, ব্রহ্মণ্যদেব যিনি,—তিনি কেবল প্রক্ৰিয়ানিষ্ঠ ও কর্ম্মপন্থী যোগীদিগেরই আরাধ্য বস্তু । তাঁহারা না মূলাধার ব্রহ্ম সত্ত্বার দিকে দৃষ্টিপাত করিতে চান,—না পুত্রকে, ব্রাহ্মণকে, ভগবান্কে ধরিতে পারেন । অন্তরের আবির্ভাব লইয়াই তাঁহাদের চলা ফেরা । তাঁহাদের যোগ-দৃষ্টি কেবল অন্তর মধ্যেই পরিক্রমণ করে । আর পুত্র যিনি, ব্রাহ্মণ যিনি, ভগবান যিনি,—তিনি কেবল শুদ্ধ ভক্তদিগেরই সাক্ষাৎ পরমারাধ্য বস্তু । তাঁহারা কেবল তাঁহার দিকেই আকৃষ্ট, তাঁহারই সহচর, অহুচর ও পার্শ্বদ হইবার প্রয়াসী,— তাঁহারই সঙ্গে থাকিয়া অপূর্ব রূপমাধুরী, বেণু-(স্বর)-মাধুরী, ও লীলা-মাধুরী সম্ভোগ করিয়া থাকেন ; সর্বত্র তাঁহারই প্রেম-লীলার,—ভক্তি লীলার সহায় হইয়া থাকেন । তাঁহারা অবশ্যই পবিত্রাত্মাকে, পরমাত্মাকে, ব্রহ্মণ্যদেবকে হৃদয়দেশে পূর্ণ দেখিতে পান ; কিন্তু তাঁহাদের আরাধ্য বস্তুকে বর্তমানে পাইয়া আর সে

প্রতিষ্ঠার প্রতি দৃষ্টিপাত করিতে চান না,—তঁাহারা বর্তমানেই ত্রিবিধ সংস্থান দর্শন করেন । এক স্থানে সকলই পান ; অন্যত্র দৃষ্টি করিবার, অন্যত্র অমুরাগী হইবার তাঁহাদের প্রয়োজনাত্মক । নিম্নলি ভক্তিতে জ্ঞান, যোগ, কর্ম,—ইহারা সকলে আসিয়া মিলিত হয় । নিম্নলি ভক্তিতে পিতা, পুত্র ও পবিত্রাত্মা,—ইহারা সকলে আসিয়া বর্তমান হন ।

পিতা, পুত্র ও পবিত্রাত্মা,—এই ক্ষুণ্ণি বা পুরুষত্রয়ের যেটাকে যখন দেখিতেছ, অংশ বা অপূর্ণভাবে দেখিতে পারিবে না । তুমি যেটা ধরিবে, সেটা অন্য সত্বাধ্বয়ের সঙ্গে অভেদ ও অখণ্ড । খণ্ড ও ভেদজ্ঞানে ধরিলে তোমার কিছুই ধরা হইল না । ত্রিবিধ প্রতিষ্ঠার প্রত্যেক স্থলেই তিনি “একমেবাদ্বিতীয়ং” এক অনন্ত, পূর্ণ, অদ্বিতীয় পরমেশ্বর । সেখানে দ্বৈত-ভাবও নাই, ত্রি-ভাবও নাই । ত্রীষ্টীয় সমাজে এই জন্য “পিতাও অনন্ত, পুত্রও অনন্ত, পবিত্রাত্মাও অনন্ত ; কিন্তু তিন অনন্ত নহে, একই অনন্ত,”—এইরূপ মত শিক্ষা দেওয়া হইয়া থাকে । বস্তুতঃ এই ত্রিবিধ প্রতিষ্ঠাতেই এক অখণ্ড পূর্ণ পদার্থ, এক অদ্বৈত-তত্ত্ব বিরাজমান রহিয়াছে ।

পরব্রহ্মের পরম লীলার এইরূপে প্রকট হইয়া থাকে । ইহাতে আশ্চর্য্য কিছুই নাই । ইহা তাঁহার স্বাভাবিকী জ্ঞান-বল-ক্রিয়ার অমুপ্রাণন দ্বারা সম্পাদিত হইয়া থাকে ।

এই ত্রিভাবাদ বুদ্ধি-চক্ষুর নিকট চিরকালই অর্থশূন্য লাগি বলিয়া অগ্রাহ্য হইয়া আসিতেছে । কিন্তু ভক্ত সাধকদিগের উহা অতি আনন্দরসী, সম্ভজনীয়, অমুভব্য সামগ্রী । এই ত্রিবিধ ত্রিভাবের মধ্যে ভারতের পৌরাণিক ত্রিভাব, ভক্ত সাধক-

দিগের প্রাণে ভূমি পুরিত্যাগ করিয়া, শাস্ত্রমধ্যে কখনও পূর্ণাঙ্গ প্রচারিত হয় নাই। ঈহা তাঁহাদের প্রাণের প্রিয়তম সামগ্রী ছিল। ভাগবতের ত্রিষবাদ সাধকবৃন্দের অতি গুরু সামগ্রী হইলেও পূর্ণাকারে শাস্ত্র-মধ্যে বিবৃত হইয়াছে। খ্রীষ্টীয় ত্রিষবাদ খৃষ্টের ও তাঁহার শিষ্যবর্গের পরবর্তী সময়ে খ্রীষ্টীয় সমাজ দ্বারা মতাকারে বিবৃত ও সাধারণ্যে প্রচারিত হইয়াছে। ভারতের দ্বিবিধ ত্রিষবাদ অতি উদার ও অতি প্রশস্ত; খ্রীষ্টীয় ত্রিষবাদ অপেক্ষাকৃত সঙ্কীর্ণতর। ভারতের দ্বিবিধ ত্রিষবাদের একই অর্থ, কেবল ব্রাহ্মণের স্থানে ভগবান্ এবং ব্রাহ্মণ্যদেবের স্থানে পরমাত্মা আখ্যা প্রযোজ্য হইয়াছে। ভারতীয় এই দ্বিবিধ ত্রিষবাদে পরব্রহ্মের স্বাভাবিক কার্য্যপ্রণালীই বিবৃত হইয়াছে। সেই ত্রিষ-বিকাশ কোন দেশ বা কালে আবদ্ধ নহে; তাহা নিত্য স্রোতরূপে প্রবহমান রহিয়াছে। সে স্রোত জাতিবিশেষের মধ্যেও আবদ্ধ নহে;—হিন্দু, যবন,—উভয় জাতির মধ্যে তাহার ক্ষুণ্ণের সমান সম্ভাবনা রহিয়াছে। খ্রীষ্টীয় ত্রিষবাদ, কেবল একবার মাত্র, কেবল একমাত্র দেশে, কেবল একমাত্র অনুগৃহীত জাতির মধ্যেই প্রকট লীলা বিস্তার করিয়া চিরকালের জন্য লীলাধাম পরিত্যাগ করিয়াছে। খ্রীষ্টীয় সম্প্রদায় ভারতীয় সাধকগণের ন্যায় এই প্রকট লীলার নিত্যত্ব সার্বভৌমিকত্ব দেখিতে পান নাই,—এই ত্রিষবাদে নিত্য লীলার তরঙ্গপ্রবাহ দর্শন করেন নাই।

কর্ম-বৃক্ষের অন্যান্য সমস্ত ফল, বাহ্য কিছু কর্মবীজ হইতে উৎপন্ন হইবার সম্ভাবনা বলিয়া এই প্রবন্ধ মধ্যে উল্লেখিত হইয়াছে, তৎসমস্তই খ্রীষ্টদা দেশে বিশেষ ভাবে এবং ভারত-বর্ষের পৌরাণিক সময়ে সাধারণভাবে ফলিয়াছিল;—যেমন

ঈশ্বরের নিকট প্রার্থনার ভাব, তাঁহার বিশেষ অনুগ্রহ ও করুণার ভাব, জীবনের দৈনন্দিন ঘটনার মধ্যে ও জাতীয় ঐতিহাসিক ঘটনার মধ্যে ঈশ্বরের হস্ত দর্শন, তাঁহার প্রতি নির্ভরের ভাব ইত্যাদি। এস্থলে তাহাদের বিশেষ উল্লেখের প্রয়োজন নাই। তবে বিশেষ কয়েকটি কথা না বলিয়া প্রস্তাবটি উপসংহার করিতে পারিতেছি না।

খৃষ্টীয় সমাজের কয়েকটি নীতিমূলক শিষ্টাচার দেখিলে বিমোহিত হইতে হয়। তাহার একটি,—ঈশ্বরোপাসনার পূর্বে দেখা যে, আমি কাহারো বিরুদ্ধে কোন অপরাধ করিয়াছি কি না? যদি কাহারও নিকট আমি কোন অপরাধে অপরাধী ছইয়া থাকি, উপাসনার আগে তাঁহার নিকট গিয়া ক্ষমা প্রার্থনা দ্বারা অপরাধ ভঞ্জন করা,—তৎপরে উপাসনায় প্রবৃত্ত হওয়া। ঐ ব্যবহারের মূল, খৃষ্টের উপদেশ। কৰ্ম্মক্ষেত্রে স্বর্গরাজ্য স্থাপন করিতে গেলে এ উপদেশটি সর্বোপায়ে পালনীয়; স্বর্গরাজ্যে ঈশ্বর সন্নিধানে পূজোপহার লইবার পূর্বে বিবাদ ভঞ্জন আবশ্যিক। ইহা সহজসাধ্য নহে,—ঈশ্বরের নিকট ক্ষমা প্রার্থনা দ্বারা কাহাকেও হীন হইতে হয় না; কিন্তু মাহুষের কাছে অপরাধের ক্ষমা প্রার্থনা দ্বারা হীন হওয়া বড়ই কঠিনসাধন। ইহা সাধন করিতে অনেক স্থলে আমাদের ক্ষমতায় কুলায় না। এরূপ অপরাধে অপরাধী হইলে সকলেই ঈশ্বরের কাছে সহজে মিটাইয়া লইতে চান।

তাঁহার আর একটি,—আমাদের প্রতি বাহারা অপরাধ করিয়াছে, তাহাদিগকে আগে ক্ষমা করিয়া, তাহাদের সঙ্গে আগে অন্তরে মিলিত হইয়া, পরে উপাসনা করা। বাহারা মর্ত্যে স্বর্গরাজ্য সংস্থাপনে প্রবৃত্ত হইয়াছেন, ইহা তাঁহাদের পক্ষে নিতান্ত

হিন্দু ও মীলদা জাতির বিশেষ ধর্মভাব । ১২৩

আবশ্যক । এই দৃষ্টি ব্যবহারের মূলও ধৃষ্টের উপদেশ । যীশু বলেন, তুমি যদি কল্লারো অপরাধ মার্জনা না কর, তবে কেমন করিয়া ঈশ্বরের নিকট স্বকৃত অপরাধের মার্জনা চাহিবে ? তুমি অগ্রে ক্ষমা করিয়া রাখিলে, ঈশ্বরের তাঁহাকে ক্ষমা করিবার কোন বাধা থাকিবে না ।

এই শিষ্টাচার ঘৃষের অনন্ত মূল্য । এরূপ ভাবে আর কোথা-য়ও নিজের দোষ ক্ষমা প্রার্থনা করিবার ও অন্যের দোষ ক্ষমা করিবার উপদেশ দৃষ্ট হয় না । ব্রাহ্মদিগেরও এই উপদেশ ঘৃষের প্রতি বিশেষ দৃষ্টি ও মনোযোগ আকৃষ্ট হওয়া আবশ্যক । নচেৎ একটি উন্নত সমাজ গঠন তাঁহাদের পক্ষে নিশ্চয়ই অসম্ভব হইবে ।

অন্যের প্রতি যে অপরাধ কৃত হইয়াছে, তাহা শুদ্ধ ঈশ্বরের নিকট সকাতির অমুতাপে বিধোত হইবার কোন সম্ভাবনা নাই । অতএব যৎপ্রতি অপরাধ কৃত হইয়াছে, সে জীবিত থাকিতে,—পথে থাকিতে, অপরাধ জন্য ক্ষমা প্রার্থনা কর ; নচেৎ তোমাকে নিশ্চয়ই অবশ্যম্ভাবী কর্মফল ভোগ করিতে হইবে, তাহা হইতে কিছুতেই নিষ্কৃতি লাভ করিতে পারিবে না । যে মানুষের প্রতি অপরাধ কৃত হইয়াছে, সেই মানুষের দেহে বসিয়া, তাহার সঙ্গে মিশিয়া ভগবান্ অপরাধ ক্ষমা করিয়া থাকেন, অন্যত্র বসিয়া তাহা কদাচিত করেন না ।

এই সকল সমীচীন ভাব খৃষ্টীয় শাখার কর্ম-বৃক্ষ হইতে ফলিয়া জগতে প্রচারিত হইয়াছে । এ সকল মর্ত্যে স্বর্গরাজ্য স্থাপনের পক্ষে সর্বোপযোগী আবশ্যক ।

